

ASO TOFI, 21 IUNI 2018

Na nofoia le Nofoa e le Fofoga Fetalai i le itula e 9:00 i le taeao.

Tatalo.

FOFOGA FETALAI: Ou te faasilasila atu ua toe amatalia nei Taulumaga ma Galuega a le Fono Aoaofa Fofoga Fetalai.

MALELEGA MAI LE SUI O LE FONOA A SUI TOFIA

Na fofogaina e le Fofoga Fetalai le Malelega Mai le Sui o le Fono a Sui Tofia.

“TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa, ua ou tuuina atu nei le maliega i le Fono Aoaofa Fofoga Fetalai na te iloiloaina ai le Tulafono Tau Faaofi ua faaalua i nei:

1. Tulafono Tau Faaofi o Teuteuga o le Tulafono o Fua Faatatau o Lafoga o Oloa Gaosia i le Atunuu 2018.
2. Tulafono Tau Faaofi o Teuteuga o le Tulafono o Lafoga o Tupe Maua 2018.

TUUIINA ATU i lou nei Lima i lenei Aso Lulu 20 o Iuni 2018.

(Sainia): **Le Mamea Ropati Mualia**
SUI O LE FONOA A SUI TOFIA.”

20 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 ma le Tulafono Tau Faaofi o le Faatatauina o
Tupe 2018/2019 - faitauga faalua**

Ou te talitonu o lea ua tatou taunuu mai i iu o galuega o lenei aso, o le upu moni e le mama i le Nofoa le matau atu i lo outou logosaia o le faatonufofauina o tatou felafolafoaiga. Na lia lava le faiva i aga a le tai e pei o le fetalaiga i ulugalu o o Salafai, na to ai le faiva o le faatufugaga o lo o upeti ai tu ma le aga faaaloalo e mamalu ai Samoa. E faapena le agalelei faasoa o le Atua e faavae ai Samoa. E amata mai le taeao ananeila seia oo mai i lenei itula afiafi, o lele ua paega lelei le alofa i le Maota, le alofa Silisiliese o le Atua e foi ai pea ma tumau atu ia te Ia Lona viiga e oo i le faavavau. Ae momoli atu le faamalo ma le faafetai i lau Afioga i le Palemia ma lau Kapeneta ae a le galuega soosootau a Afioga i Minisita Lagolago. E faapea foi le maualuga i lea itu o le Maota, malo le onosai, malo foi le tauatai, faamalo le faatoatoa, malo le onosai i tulaga o le aso. Faafetai mo le tofa tatala ma le utaga fetuutuunai ua toafimalie ai ma filemu le faatautaiga o le tatou galuega.

E momoli atu foi le faafetai i le tapuaiga a Faauluuluga o Mataglauega o lo o lavapapale mai pea lea ua outou faafofoga i saunoaga a le Palemia, e tele le aoga o lo outou auai, aemaise foi o Faalapotopotoga Tumaoti a le Malo. Malo tapuai mai. I le tapuaiga a Samoa ma le nofo i Ekalesia e fia, faamalo tatalo, faamalo tapuai mai, ua manuia faiva o le Palemene i lenei aso, ona o la outou tapuaiga. E manatu le Nofoa e lelei ona tatou sailiili malosi ua oo i le taimi e manava ai a tatou galuega. Ia talo soifua ia i le agalelei o le Atua ia momoli atu i ai le soifua ma le ola i le aso a taeao e faaauau ai le tatou galuega ma talifuaitau ai a outou Afioga i Minisita e pei ona saunua le Taitai o le Maota.

A o le i tolopoina le tatou galuega i lenei itula afiafi, ou te talosaga atu i le sui usufono Aoao Fesoasoani mo Faasaleleaga Nu.3 e te saunia se tatalo e faaiu filemu ai le Fono Aoao Faitulafono. Ma le faaaloalo.

Na tolopo Taualumaga a le Fono Aoao i le itula e 7:23 i le afiafi, seia aulia le itula e 9:00 i le taeao o le Aso Tofi, 21 Iuni 2018.

21 IUNI 2018

**TULAFONO TAU FAAOFI O TEUTEUGA O LE TULAFONO O FUA
FAATATAU O LAFOGA O OLOA GAOSIA I LE ATUNUU 2018
– faitauga muamua**

Afioga Hon TIALAVEA FEA LENIU TIONISIO HUNT (Minisita mo Tupe Maua): Faafetai i lau Afioga i le Fofoga Fetalai, ou te tulai atu e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fua Faatatau o Lafoga o Oloa Gaosia i le Atunuu 2018 i lona faitauga muamua.*

Faaluaaina e le Minisita o Tupe, Minisita mo Aoga, Taaloga ma Aganuu ma le Minisita mo Tina ma Tamaitai, Atinae o Nuu, Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga muamua.

**TULAFONO TAU FAAOFI O TEUTEUGA O LE TULAFONO O
LAFOGA O TUPE MAUA 2018 – faitauga muamua**

Afioga Hon TIALAVEA FEA LENIU TIONISIO HUNT: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Lafoga o Tupe Maua 2018 i lona faitauga muamua.*

Faaluaaina e le Minisita mo Tina ma Tamaitai, Atinae o Nuu, Afioga ma Agafesootai, Minisita mo Aoga, Taaloga ma Aganuu, ma le Minisita o Tupe.

Na faamaonia le lafo ma faitauina le Tulafono Tau Faaofi i lona faitauga muamua.

**TULAFONO TAU FAAOFI O LE FAATATAUINA O TUPE
FAAOPOPO (NU.2) 2017/2018 & TULAFONO TAU FAAOFI O LE
FAATATAUINA O TUPE 2018/2019 – felafolafaiga faaauau i luga o le
faitauga faalua – Aso 3**

FOFOGA FETALAI: E tolopo Galuega a le Fono Aoa anapo ua maea ona saunoa sui usufono mamalu o le Palemene e uiga i le Tala Faatatau Autu o le Tupe 2018/2019 ma le Tala Faatatau Faaopopo 2017/2018.

O le avanoa lenei o le a amata ai ona talifuaitau le Malo i mataupu sa laga e le mamalu o sui usufono e uiga i le Tamaoaiga ma Faiga Faavae tau Tupe a le Malo o Samoa.

Tulai mai le Afioga i le Minisita mo Fesootaiga, Faamatalaga ma Fesootaiga Vavave Faaneionapo mo lau saunoaga e tusa ai ma mea sa laga e sui usufono mamalu.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaaauu i luga o le faitauga faalua – Aso 3**

Afioga Hon AFAMASAGA LEPUIAI RICO TUPAI (Minisita mo Fesootaiga, Faamatalaga ma Fesootaiga Vavave Faaneionapo): Faafetai i lau Afioga i le Fofoga Fetalai, ua tala mai i le lagi le mamalu o le Atua i lenei taeao, ua faaalua foi e le vanimonimo galuega a Ona aao. E ofo alofa atu ma faatalofa atu i lau Afioga i le Fofoga Fetalai, ua maleifua mai i faguga lelei, ae faafetai i le Atua ua toe faafoisia le malosi i lou soifua ua tatou toe mafuta ai i a tatou galuega o lenei aso. E faatalofa atu foi i lau Afioga i le Taitai o le Malo, le mamalu o le Kapeneta aemaise o le paia o le Fonousu a Samoa i lenei taeao. E matou te faatulou atu foi i le paia o Samoa o lo o faafogafoga mai i tafa e fia, e manatu lava, o ou paia o sa ma faiga e le toe tau mamanuina faalauti titi i sa matou faamatalaga, pe sui ai se ula. O Samoa o le atunuu ua uma ona tofi. O le fue lavelave e leai se tasi na te toe lagalaga.

E manatu o lenei taeao e tulai atu le Malo mo le amataina o se tali aua ia finagalo sa faaalua e le mamalu o le Maota. O lea ua lafo ia le tupe mua, maua foi le aumua o taulafoga, o le tali a le Malo o lea sa taimua le Afioga i le Palemia i le aso ananafi. Ona matou tulai atu lea tau ina faapea ona faaopoopo ma tali atu i nisi o manaoga, ae faapea nisi o finagalo foi sa faapea ona lagalaga e le mamalu o le Maota sa faapea ona alo i ai.

E le tele ni mataupu sa faapena ona fofolaina ia ma faaalua i ai finagalo o sui usufono mamalu i matafaioi a lenei Matagaluega, o le Matagaluega o Fesootaiga, Faamatalaga ma Fesootaiga Vavave Faaneionapo, o le Ofisa o le Pule Faatonu, aemaise o le Falemeli o Samoa. O Matagaluega ia e tolu o lo o faapena ona ma feagai ma le Afioga i le sui usufono mo Faleata Sisifo mo le faafoeina. O finagalo sa faaalua i tulaga tau fesootaiga i telefoni aemaise i Televisi, ia e faamalulu atu ona o le lē lelei o tulaga o le auunaga i o outou itumalo, ae o lo o faapena ona faatulaga ia le toe asiati atu ma le toe faaleleia o auunaga uma sa faapena ona outou saunoa ia ma faaali i ai o outou finagalo.

Ua tali atu ia le Komiti o Tupe i tulaga sa faapena ona lagaina i tulaga tau tupe o Matagaluega, ae faapea foi ona laga i finagalo le auunaga i a tatou uaea o fesootaiga, ua amata nei ona faaoga nei le tatou Tui Cable mai lava i le masina o Fepuari, ua faaogaina uma kamupani o fesootaiga o le BlueSky, o le Digicel, e faapea foi i isi kamupani uma o lo o faapena ona faia le auunaga o fesootaiga i le atunuu. Ou te manatu, e tele le faamamaavega i le tulaga ua i ai nei, e le gata i lea, o le vave ua i ai nei fesootaiga. A i ai se tulaga o lo o faaletonu i le taimi nei, ou te molimau atu, o lo o faia nei le toe faaleleia uma upgrade ia local networks, o le faamoemoe o lo o i ai, o le faaiuga o le masina o Iulai ogatotonu o Aokuso, ua lelei uma tulaga ia ma le toe i ai se bottleneck i a tatou fesootaiga. Ua vave le sau o le Tui Cable ma lona saosaoa, ia o lea la ua toe faatulaga i ai ia tatou fesootaiga i totonu o le atunuu, auunaga a kamupani o lo o faapea ona feagai ma le auunaga o fesootaiga uma.

21 IUNI 2018

**Tulafono Tau Faaofi o le Faatatauina o Tupe Faaopopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

O le sau ai o le Tui Cable, o lo o faapena ona manaomia ai foi ma se isi uaea, a i ai se faaletonu i luga o le Tui, ia ae o lo o faapena ona i ai se tasi e tua i ai fesootaiga mo le faaleleia, ia aua ne i motusia fesootaiga i totonu o le atunuu. O lea o lo o outou faafofoga i ai i nisi o saunoaga ananafi, o le Manatua Cable, o lea amata ana galuega, o le uaea lea e au mai Tahiti fesootai mai i le Atu Kuki, o Niue e faapena ona fesootai ma Tonga, ia ona taula mai lea i Samoa nei. Ona lua ai lea o uaea tetele o fesootaiga.

Tofa Olo Fiti Afoa Vaai (Salega Sasae): Lau Afioga i le Fofoga Fetalai, e na o se mea lava lea e fia malamalama, ae le i see ese le Afioga i le Minisita.

FOFOGA FETALAI: Ia se i tulai mai le sui usufono mo Salega Sasae.

Tofa Olo Fiti Afoa Vaai: E leai o lea ua agai tonu lava le saunoaga a le Afioga i le Minisita i tulaga tau cable, ma o lea foi ua faamoemoe o le a toe toso mai ia le Manatua Cable e backup i le tatou Tui Cable. Ae faafesili atu lava, po o le a le tulaga lea o le a i ai ia le tatou S Cable foi lea e agai e ui atu i Tutuila. Po o le a la le tulaga pe o le a taofi loa pe o le a motusia lena cable? Ona o le mafuaaga lava o le fesili ona o lea e avatu lava tupe foi ia mo le tatou lisiina o le cable lea. Ma le faaaloalo.

FOFOGA FETALAI: Saunoa mai le Minisita.

Afioga Hon AFAMASAGA LEPUIAI RICO TUPAI: Lau Afioga i le Fofoga Fetalai, faafetai i le sui usufono mamalu mo le faafesili. Ae o lo o agai atu pea i ai lau faamatalaga.

FOFOGA FETALAI: Ma ou te fautuaina lau Afioga i le Minisita, e saunoa e tali i sui usufono mamalu i mea sa laga e sui usufono mamalu, ia ae le talia e le Nofoa ia nisi o mataupu fou e laga e toe fesiligia ai le paia o le Malo, ae faaauau le saunoaga.

Afioga Hon AFAMASAGA LEPUIAI RICO TUPAI: Faafetai i lau Afioga. O le agai mai la o uaea nei e lua o fesootaiga, ua i ai le faamoemoe ina ia fausia se uaea fou i le va o tatou ma le Motu i Sasae. O le ueaea lea sa fesiligia e le sui usufono mamalu, ia o le uaea lea e patino lava i le kamupani a le BlueSky, sa faatauina ai le capacity a le Malo i le tausaga ua mavae ma saina ai se feagaiga e faamaea i le tausaga fou. O le tausaga fou la, ia o le a maea ai ona totogi ia lea feagaiga ma le toe faaogaina ai e le Malo le uaea lea. A o le faamoemoe o i ai nei, o lo o faatalanoaina e le Samoa Submarine ia ma nisi o kamupani tumaoti i totonu o Amerika Samoa, le faataatiaina o se uaea e connect atu ai mai Upolu ia i le motu o Amerika Samoa. O le faamoemoe ua i ai, a taunuu, ona tatou faapena foi lea ona....

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafaoga faaauau i luga o le faitauga faalua – Aso 3**

FOFOGA FETALAI: E faamalie i lau Afioga i le Minisita, o lo o faapena ona tulai mai le Taitai o le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui (Palemia): Lau Afioga i le Fofoga Fetalai, ou te faamalamalama atu le itu lea. O le uaea lea o le S-Cable, o mea o uaea ua toeitiiti lava pepe, e mafua mai i le laina na tai mai i le 1920 mai Niu Sila e pau tusa ma le 100maila i le itu i Sasae o Amerika Samoa, e agai atu i le itu i Matu o Hawaii ma Amerika. Ua oo la i le taimi o le a tape ai ua le toe umi se ola, ona omai ai lea o tagata e toatolu mai Amerika, sa faatalanoaina ma le sui o Amerika i lena vaitaimi o Faleomavaega. E manao pe mafai lava ona toe aumai mea o uaea ia ua toeitiiti pala, e aumai e toe lipea e latou ina ia mafai ona toe faaoga ae faalagolago la ia uaea ia ia Samoa i le faaogaina e Samoa, na omai muamua la alii ia i Samoa nei, pe talia e tatou, a talia loa, ia ona o loa la ea e toe lipea uaea ia e toso mai ia fasi uaea ia ua pepe ua amata ona pepe mai le 100maila lea i le itu i Sasae, ona connect up ma Tutuila ma faaoga, e le ola mea ia e le variable, pe a tatou le faaogaina. O le ala lena na omai muamua ai ia te au. E omai la tagata nei e suti uli uma e pei o se au Mafia, o lea la ua uma ona ou fesootai ma Faleomavaega le sui o Amerika Samoa e faatatau la i le mea lea, a o tatou i le taimi lena, manatua e le i leva lava ona pepe uma a tatou telefoni ma fesootaiga ona ua congest ua tumutumu ua tau le mafai ona maua se avanoa i luga i sakelite. O ina la na fai ai le iuga, e sili loa ona tatou faaoga le uaea lea for the time being, ina ia faatali ai le tatou fuafuaga mamao ua agai i ai, ae le mafai ona tatou faalagolago i le uaea lea, for the long term mo le taimi umi, o lea na faatoa tatou ioeina loa lea, ia ona faatoa ai loa lea o le aualii lea i Tutuila e faafeagai ma Tutuila ma logo i ai lo latou faamoemoe, o le a faatuina se kamupani e toso mai ai uaea ia ua amata ona pepe e ono faaoga i le tulaga lea e i ai, ae o lea e ola pea. O le mafuaaga la lena, na o ai loa i Tutuila ma fesootai foi i le Kovana i lena taimi, i le telefoni e alofa e tali ane le mea na e fai ai ia tatou atunuu nei e lua mo le taimi nei, a o talia ai le tatou agai atu e fai ia le tatou cable.

E tusa la po o le a le... sa logo mai la au o lea o le a aumai se fesoasoani mai foi Amerika e toe faafou ai uaea ia, ae e le mafai lava ona faalagolago tatou i i ona e le tele se capacity o uaea ia, o le mea la lena na ala ai ona tatou o lava tatou fai ia le fai ia le fesootaiga le ma fafo faataoto loa le tatou lava cable, ae lea la ua agai mai ma Malo ia o se vaega o atinae, e galulue faatasi ai atunuu uma o le Polenisia.

Ua leva ona i le tulai mai o le fono a le Pasefika, ma ua amata ona taa foi lea vaega a le Pasefika, ua ese ia le vaega a le au Melanesia, i le itu i Sisifo, ese le vaega a Micronesia i le itu i Matu. A taa vaega loa ia ni faalapotopotoga faapenei, e tataua loa ona mafaufau Samoa, amatamea tatou i le faamaopoopo mai o atunuu nei o le Pasefika, ona ua i ai le mea ua tupu.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaaauu i luga o le faitauga faalua – Aso 3**

Ua amata ona afaina ia tatou tagata foi ia faatutu pe a outou manatua, lea sa tatau ona malo le tatou sui o ia o le Deputy Secretary General, o le ACP i le taimi lena i le tausaga 2003, sa tatau lava o le tagata pito sili lea ona qualify i le Pasefika atoa sa tatau loa ona ina ua oo mai ia le sailiga o se o le a pulea atoa le ACP e 117 atunuu i Europa i le lea sa ou galue ai. O lea ua oo mai ia le saili atu o se tagata ua oo mai i le taimi o le Pasefika, lea ua taa vaega loa le filifiliga o le tagata pito sili lea ona atamai, tama o Dr. Pao, ae na oti ai i i tatou ona ua taa vaega ia le Pasefika i le 2003.

O le ala lena na ala ai ona active loa tatou e faatalanoa e tatau lava ona i ai se vaega amata loa ona faagaoioi ia le atu Polenisia i totonu o le lio lea o le Pasefika. O lea ua malosi tele le sau a o i le atu Melanesia, malosi le sau o le atu Micronesia, ae o lea lava e nofonofa lava tatou, fapena foi ma Tonga faapena foi ma le isi atunuu o le FSM. E leai se vaega o pipii ai ona o le taofi o Samoa, o le Pacific Forum Leaders, tasi le body, ae a vaevae loa i vaega, o le amataga lena o le vaivai o le Pacific Forum Leaders, sorry o le Faapotopotoga lea a Taitai o Atunuu o le Pasefika. Lea la na faatu ai loa le faalapotopotoga lena i nei i Apia, i le aso 17 o Novema 2011, ona to mai ai lea o le faaloalo a atunuu uma o le Pasefika i le atu Polenisia e lafo mai le taitaiga o le atu Polenisia, Faalapotopotoga a Taitai o le Polenisia ia Samoa, o tatou la lea na muamua ona avea ma Taitai o le Faalapotopotoga lena. Ma o se taimi muamua lea ua leva ona tele taumafaiga, ina ia faatu ia se Faalapotopotoga o Tagata Polenisia i totonu o le Pasefika. Na amata mai lava i le tausaga e 1975, na fono ai ia Malietoa, Mara ma le Tupu o Tonga, e tatau ona faatu se faalapotopotoga se body tuufaatasi ai le au Polenisia.

Ou te manatua foi i le taimi lena a o ou i o i le Ofisa o le Tupe, na tofia ai lea o le tagata lena ia Afamasaga Faamatala Toleafoa, e avea ma failautusi, o le uluai fono lena na fai i ina, o le last fono foi lena na fai, ua fiu e tau faaola e le ola se tuufaatasiga o le Polenisia atoa. Lea la ua tulai mai nei le Polenisia, le atu Polenisia lea e fai nei le fono i le vaiaso fou e fai i Tuvalu. Ua i ai lou faamoemoe ou te auai, ona o le tulaga sinia lea e vaavaai mai ai le Polenisia o Samoa lea sa amatamea i le mea nei. Ia lea la ua valaau mai, o lea e tele ia feau, o lea e oo mai nei e le i faia ia sau faaiuga, a o le faalavelave, so o se fono lava a le atu Polenisia i le taimi amata o le Faalapotopotoga lena e tatau lava ona i ai Samoa.

E toavalu ia Malo o le atu Polenisia na amata faatuina le faalapotopotoga lena o atunuu uma lava o le atu Polenisia. E aofia ai tatou, o Tutuila, Amerika Samoa ia e aofia ai foi ma Toelau, o Tonga, Tuvalu, o Tahiti, o atunuu na o lea e aofia ai i totonu o le faalapotopotoga lea. E toavalu la ia atunuu o lea la e Taitaifono ia au i le faasologa o le toavalu lea, ae faaiu ia Amerika Samoa i le tausaga fou, ia ona toe alu foi lea o le taamilosaga o le taitaiina o le fono. O lo o mulimulitai lava i le auala o mea lea e pulea e faafoe ai ia le tatou Pacific Island Forum le PIF po o le Faalapotopotoga lea o Taitai o le Pasefika.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

Ua umi lau faamatalaga ona o le cable lea, lea e fai nei, o le a fesootai uma ai lava ia atunuu uma ia e aofia ai foi ma Uea ma Futuna. Lea la o le a fesootai ai uma lava, e fou foi i le atu Polenisia ae o se atinae aupito maoae lea ua faatu. Lea la na faailo ina ua fono mai ia Taitai o le Pasefika i Samoa nei, ia ae tutulai atu loa tatou faataoto loa fuafuaga ia. Ua uma foi la ona fai ia matou fesootaiga ma Minisita o le Malo o Niu Sila, ina ia lagolago mai i le faamoemoe, ona o le faamoemoe lenei o le a fesootai uma ai lava atunuu uma o le atu Polenisia. Ia ma le tulaga foi lea e siitia atili ai ia le teletelevave o tatou fesootaiga. O le background atoa uma lena, e tele le aoga o le mea lena, aemaise o fesootaiga ma le tulaga o le maopoopoga, o le faamaopoopoga o atunuu uma o le Polenisia o lea e tilotilo mai ia Samoa, i le tatou faamaopoopo mea.

O le tulaga la lena, e le mafai ona tatou toe alofia ai le vaega lea, ona o polokiki i le vaitaimi lenei, a tutu faatasi le atu Polenisia, ona e pito toatele tatou lea e toavalu. Ia o i pe na o le toalima ea i le atu Melanesia, ia e le toatele foi luga pe na o le toatolu ea pe toafa. Ae pito tele lava la ia le faalapopotoga lena o Atumotu o le Pasefika, ae lea pe agai mai le vaai o le Laumua o le Faalapopotoga, o Samoa.

O le mea la lena ou te manatu e lelei ona silafia e le Maota atoa, le fua taualuga lea i tua o le mataupu lenei o fesootaiga lea televavave, ona o tulaga ia sa tatou i ai i aso ua tuanai, toetiiti lava atoa le masina i le isi tausaga o pepe atoa ia tatou telefoni, ona ua le mafai ua feomia le faaogaina o satelite sa tatou faaogaina.

Lau Afioga i le Fofoga Fetalai, o lo o i ai le faamoemoe lea ona o lea sa ou....sa aumai ananafi ia nisi o manatu foi lele pei o lea e vaai i le taimi nei o lena e sao le finagalo o lea e vaai i le taimi lenei, o lea e faatu le tatou lea ua i ai le tatou cable ae o lea foi ua tatou toe faamaopoopo maia ma o tatou uso ia, e atili ai ona saosaoa ia le atinae o fesootaiga nei. Ma o le mea moni lava lau Afioga i le Fofoga Fetalai, o atinae uma lava a Malo nei e aupito i saosaoa le tamaoaga, e agai uma e tasi lava le mafuaaga o fesootaiga nei faaneionapo.

Lau Afioga i le Fofoga Fetalai, o le faamatalaga o lea ua tatou faataotoa ia mo mea o maa tulimanu e faavae ai le lumanai manuia o Samoa mo a tatou fanau o le lumanai. Lau Afioga i le Fofoga Fetalai o le faamatalaga atoa lena, ona o lea sa ou maitauina i le aso ananafi ia le popole tele, o lea foi ua fai le tatou mea lea, ae lea foi ua tatou agai i le mea lea, e le mafai ona tatou nofonofo, ia tatou vaavaai i mo mea o auala eseese e manuia ai Samoa.

Afioga Hon AFAMASAGA LEPUIAI RICO TUPAI: Lau Afioga i le Fofoga Fetalai ma le mamalu o le Maota, o le faamoemoe la lea e i ai e pei ona saunoa le Afioga i le Palemia, i le tausaga e 2012, ua 14 atunuu Polenisia o le Pasefika ua fesootai mai ia Samoa, e ala i uaea o fesootaiga. O le aumai uma o nei uaea, o le a aumai ai se capacity e aupito i sili ona tele. E laititi lava le faaoga a Samoa o lo o i ai i le taimi nei, afai ou te faaata le mea lea i le capacity lea ou te talanoa ai, o lea ou te talanoa pei o se malae lakapi.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

O le faaaoga a Samoa o lo o i ai nei i capacity ia pe a aumai uma e cable nei e kava ai le malae lakapi, e na o se vaega lava o le laina siko a tatou. O lona uiga, o le isi vaega atoa o le malae lakapi, o lea e avanoa uma.

O le a la le mea lea e fai e le Malo? O le taimi lenei, ia ua agai le Malo ia faapena ona faatosina mai ia pisinisi mai fafo, ina ia faapena ona faaaoga atu ai le isi vaega o le malae lakapi capacity uma nei e mafai ona aumaia e uaea o fesoootaiga. O le taimi la lenei, ua i ai ia kamupani ia mai fafo ua omai i tulaga tau Call Centres e tilotilo, ma vaavaai ia ma amata ona faatulaga le agai i luma o a latou kamupani.

O le Aso Gafua o le vaiaso fou, e amata ai ia tatou lava ia training, i Samoa nei mo Call Centres. E koleni ai le faiga paaga a le Malo Afaatasi le UNDP ma le Iunivesite Aoao o Samoa. Ia o le a faapena ona train ai loa ia tatou tagata e faigaluega i Call Centres, ona e i ai ia kamupani ia o le a agai mai e amata ia le latou Pilot Programme e faafaigaluega ai nai o tatou tagata.

O lona lua, lua vaiaso talu ai sa outou silasila lea sa fai mai i Samoa ia le faatasiga o le Digital Pacific, ua agai le Pasefika e tilotilo ina ia digitize uma lava services i totonu o le Malo. A lea la ua taimua ai Samoa e ala i lana faiga paaga foi ma Malo Afaatasi. O lea sa faia le fonotaga lea, o lea ua tilotilo ia le tatou National ICT o lo o Taitaifono ai le Afioga i le Palemia, o services uma lava ma auunaga i totonu o le atunuu, ia ua tataua ona digitize.

O le a le mafuaaga? Ina ia tuutiitia ai tau a le Malo i auunaga, faasaoina ai tupe i auunaga, ae aupito i sili ona faataua e le Malo le auunaga mo nai tagata lautele. O se vaega o a tatou digital services nei, o le tatou National ID, lea ua amata lona faatulagaina ma ana galuega. O le National ID lenei, e tasi lava lau ID e te fealuai ma oe, e kava uma ai lava ia mea o lo o faapena ona eseese mea e manaomia i le taimi nei. O lou laisene avetaavale, o lou tusifolau, o manaoga o pisinisi, laiseneina o pisinisi, ia ma nisi auunaga e tele ia ituaiga mea e manaomia ai i le taimi nei ina ia faapena ona faamaonia ona maua ai ia auunaga uma.

A o le faamoemoe o le Malo lea ua i ai, ia fai le National ID lenei, e tasi lava la, po o fea lava e te fealuai ai ma oe, e le toe manaomia nisi faamaumauga ma le tele o mea o lo o faapena ona alu ai le taimi o le tatou atunuu, ma le tele o nofoaga e feoai ai, ia faapea foi i auunaga i totonu o le falemai, ia ma nisi o auunaga e aupito i sili ona taua i totonu o le atunuu.

O lea la tou te faafofoga mai, ua taimua ai Samoa, i le amataina o services nei digital i totonu o le Pasefika faatasi ai ma le fesoasoani mai a le Malo Afaatasi ma Malo o Niu Sila ma Ausetalia ma isi atunuu o le lalolagi.

Sa outou silasila talu ai nei o tatala se tasi pisinisi tele i luga o le uafu, o le kamupani ua faipaaga ma le tatou Samoa Submarine ia ma le tatou Matagaluega o le Samoa Port Authority, ua faatu ai i luga o le uafu ia se warehouse, e 4,000mita lona tele. O le warehouse lea, o le a fai ai le maintenance o uaea uma lava i totonu o le Pasefika.

21 IUNI 2018

**Tulafono Tau Faaofi o le Faatatauina o Tupe Faaopopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafaoga faaauau i luga o le faitauga faalua – Aso 3**

E tusa ma le 70,000kilomita le tele o uaea ia o lo o faapena ona fai atu i iinei ia latou maintenance. E 22 kamupani e aofia ai ma le 16 atunuu o le Pasefika e lavea ai ma Niu Sila ma Ausetalia, o lea o le a fai atu iinei le maintenance o cables uma lava nei i totonu o le Vasa Pasefika atoa. O le kamupani lea o lo o tu nei i Niu Kaletonia le latou vaa, ma e i ai le faamoemoe e aumai le vaa lena e faatu i totonu o Samoa, ma o le auvaa, e 60 tagata faigaluega i le taimi e tasi. A o tagata nei o tagata e omai Filipaina ma isi atunuu o le Atu Asia. O le faamoemoe la lea e i ai le Malo, o skills nei e i luga o le vaa, o le a faapena ona tuu i totonu o le tatou aoga Marine ina ia faapea ona aoaoina ai ma le faamoemoe o totonu o le isi lua tausaga ua amata ona faigaluega tagata Samoa i luga o le vaa lena e replace ai pe 50% ma le agai atu i le isi fa tausaga ua take over e tatou tagata faigaluega i luga o lea vaa. A o lo o faia foi fesootaiga ma isi kamupani e fauina uaea o fesootaiga ina ia faapena ona maua atu ai avanoa o tatou i luga o vaa e faigaluega solo ai i le lalolagi e pei o le tulaga o i ai nei nai o tatou tagata i luga o meli ma nisi o auunaga i luga o vaa i le lalolagi atoa. O le tele la o nei faanaunaga o le Malo o lo o i ai lau Afioga i le Fofoga Fetala ma le mamalu o le Maota, o avanoa maua e faigaluega ai nai o tatou tagata ma le agai i luma ina ia faapena ona tu maualuga Samoa i totonu o le Pasefika ma lona lio i auunaga faatekonolosi aemaise i uaea nei o fesootaiga.

Ua saunoa le Afioga i le Palemia i le tulaga o lo o i ai Samoa i totonu o le Pasefika ma lona va ma isi atunuu, o lo o faapena ona fausia agai i ai Samoa e ala i fesootaiga. O le taitaiga a Samoa po o le leadership o lo o tu maualuga i le silasila a atunuu ia, a faamalosi atu la ma le itu lea o fesootaiga, o le a atili ai ona tu maualuga Samoa e le gata la i le Pasefika, a o le lalolagi atoa.

O lo o galulue pea ma faaauau galuega a le tatou Samoa National Broadband ua fesootai ai ua faaaogaina e le tele o Matagaluega a le Malo ma ua faafaigofie ai le tele o galuega ma tele ai le tau faasaoina. O lo o faapea foi ona toe faatulaga uma lava i le taunuu mai loa i le taimi nei o le tatou cable le Tuisamoa ua toe faatulaga ai le auunaga ina ia faapena ona oo i totonu o aoga ma totonu o falemai. Ua taumafai foi e faaaoga le Samoa National Broadband e fesoasoani ai i le lava o fomai o lo o faapena ona lagaina pea i saunoaga a sui usufono mamalu ae le gata i lea o le lava o faiaoga o lo o taumafai fesootaiga i le taimi nei ina ia faapena ona faaaoga le tatou Samoa National Broadband ina ia faafaigofie ai tulaga uma e fesoasoani i le tulaga e le gata i le soifua maloloina ae faapea foi i a tatou aoaoga. O le tele lea o tulaga o lo o faapena ona agai i ai tatou fesootaiga i le taimi nei. O le fesootai mai la o atunuu nei e 14 ua ou taua ia Samoa, ua i ai nei le fuafuaga ina ia fausia ai i totonu o Samoa se nofoaga ogatotonu ina ia faapena ona fesoasoani ai i atunuu uma o le Pasefika. O le Data Center, e fai uma lava digital services nei ua ou taua i le taimi ua fano ina ia faapena ona fesoasoani ai i le tele o atunuu o le Pasefika ma maua ai foi auunaga e maua ai a tatou seleni maua aua le service ina o isi atunuu o lo o fesootai mai ia tatou.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

A o le tele o le agai mai o nei vaega uma a outou Afioga, ia e le mafai foi ona moemoenoa le Malo i le taimi nei i le puipuiga i le tele o tulaga o lo o tulai mai pea ma o lo o lagalaga foi i outou finagalo i le puipuiga po o le national security, ae le gata i lea o le tatou cyber-security i luga o tatou uaea nei o fesootaiga. Aua e le na ma le laina, o le tele o avanoa nei o lo o sau faatasi foi ma i latou o lo o taumafai e faaleaga ma omai e faaleaga auaunaga i totonu o le atunuu. O lo o galulue malosi le Malo i le taimi nei faatasi ai ma fesoasoani a Malo mai fafo ina ia faatulagaina nei itu uma, taumafai aoaoga aua le aufaigaluega a le Malo, ae le gata i lea o lo o agai pea i luma le tele o aoaoga o lo o taumafai. O lo o galulue faatasi foi le Matagaluega o Fesootaiga faapea ma le Matagaluega o Aoga, ina ia toe tilotilo ina ia faatulaga le curriculum i totonu o aoga ina ia faatauaina le galulue i luga o computer. Coding programmes, ina ia faapena ona amata aoaoina mai fanau i lalo i le galuega computer e pei ona outou faafofoga i ai ananafi ua amata le polokalame a le Ofisa o Aoga ina ia faapena ona tofufufusia tamaiti aoga i tablets ma laptops ina ia faatulagaina i totonu o aoga ia tofua lava le aoga ia ma lana lap, ona faasolo atu loa lea o le faiga o aoaoga nei e ala i le tatou curriculum.

Ia, o le tele lena o nisi o auaunaga o lo o taumafai le Matagaluega o Fesootaiga, Pule Faatonu aemaise le Falemeli ina ia faapena ona agai ai i luma tulaga uma o fesootaiga i totonu o le atunuu ina ia avea a tatou fesootaiga o se fesoasoani tele i le tamaoiga o Samoa, e ala i avanoa faigaluega, e ala i le faafaigofieina o tatou auaunaga ina ia faaitiitia ai tupe alu a le Malo, a ia faafaigofie auaunaga mo tagata lautele ina ia aua ne i pologa nai o tatou tagata e feoai solo a ia tasi lava le mea e o i ai, faafaigofie mo latou laitiiti lo latou taimi e alu ai. O le agaga maualuga lena o le Malo i tulaga tau ICT. A o le tatalo lava ia, a o tatou faatalitali i ai i lenei taimi i le tatou cyber-security ma le taumafaiga o le puipuiga o le agai mai pea o tulaga e faaleaga ai le tatou atunuu e ala i fesootaiga, o le tatalo lava ia ina ia faamautuina pea le mafutaga faa-matua ma fanau i totonu o aiga. O le tatalo lava lea a le Malo, o le tatalo foi lea a le Matagaluega. O le tele foi o faalavelave ua tulai mai ma molimauina i totonu o le lalolagi, ua tele ina nonofo lava matua i a latou telefoni ae tuufau le fanau. O le tatalo lava ia a le tatou atunuu i ana tu ma ana agaifanua, ina ia faatau le mafutaga a matua ma fanau i totonu o aiga, tuu ese le telefoni pe a oo i le taimi o le faigalotu. Ia [faaitiitia le taimi e faaoga ai e le fanau telefoni i totonu o fale pe a oo ina malolo.](#)

E le faaitiitia le aoga ma le taua o fesootaiga aua le lelei o aoaoga a le fanau ma le agai i luma o le soifuaga o tatou, a o le tatalo lava lena ina ia faapena ona faatau le tulaga i totonu o aiga, ina ia aoaoina ai pea fanau ina ia faapena ona iloa manage ma iloa fuafua tatau le faaogaina le tatou tekonolosi ua i ai nei.

Lau Afioga i le Fofoga Fetalai ma le mamalu o le Maota, o le tali atu lena i le tele o finagalo sa lagalaga....

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafaoga faaauau i luga o le faitauga faalua – Aso 3**

FOFOGA FETALAI: Malie lau Afioga i le Minisita se i tulai mai le sui usufono mo Gagaifomauga Nu.3 ma le sui usufono mo Salega Sasae.

Susuga Hon Laauli Leuatea Polataivao Fossie Schmidt (Gagaifomauga Nu.3): Faafetai mo le avanoa. Viia foi le Atua i lenei taeao foi tatou te piiama i le tatou taulaga osi . E leai se agaga e faalavelave i le saunoaga a le Afioga i le Minisita, leaga o lea sa taumafai atu le lauga a lenei itumalo ona o le talitonuga o se tasi lenei o atinae aupito sili ona tatou manatu tatou te faalagolago i ai mo le lumanai. O le ala foi lea o le fesili faafetai tele lava i le faamalamalama a auiliili a le Afioga i le Minisita. Na ona ou toe valualusia aa o le fau, ou te le i taua le mea lea o le Broadband ananafi, leaga e i ai le Matagaluega a le Malo sa ou fesili i ai po ua gaoioi le Broadband ua fai si umi. Time is money. O le agaga lena e avatu pea le faamanatu i le Afioga i le Minisita ona e taua tele le mea na ala ai ona aumai le polokalame lenei, ona o le fesootaiga, internally communication a le tatou Malo e le toe felauaia ai le tele o mea, ae lafo atu.

O le isi itu, o fea lava tatou te aga i ai i le faatofalaiga a le Malo e ala i le tatou cable, faafetai i le mea ua fai. O le mea taua, affordable, capacity, e taugofie mo nai o tatou tagata. O lea foi ua manaia le mea lea sa ou fesili ai i le matua, its a standby cable. A o le taua ia o le mea lea sa saunoa ai se tasi o sui usufono i le ash cable, because o le ash cable e connect i Tutuila, connect loa i le Malo tele. That's what we need, o le connect sao lava o tatou i le fatu, i le mea o lea tatou te fia transform ma trade ai, o le Malo tele o Amerika. O le ala foi lena e taua tele ai le tatou pipii tele i uso i Amerika Samoa, aua o i ina le auala aupito sili ona televave. Ae faafetai o lea ua maua, ua maua foi le tulaga o le faanaunautiga i le tatou maintenance company lea ua i luga o le uafu, a mea o le ula lea. Ae faafetai i lau Afioga i le Minisita o lea faatoa e papale mai, ae faafetaia foi le galuega a nisi o Minisita na asaasa le galuega tele lea. O le manatu lena lau Afioga ma le faaloalo.

FOFOGA FETALAI: Malo. Ia se i tulai mai le sui usufono mo Salega Sasae.

Tofa Olo Fiti Afoa Vaai: Faafetai mo le avanoa. Leai ua manino lava le saunoaga a le Afioga i le Minisita, o le ituaiga saunoaga lea sa ou talitali i ai i lona silafia i le tulaga lelei o le faaogaina o le tatou broadband. O lea la ua saunoa manino, o se tulaga foi lea e tau aumai ai i lalo le tau o fesootaiga i totonu o Matagaluega ma Faalapotopotoga a le Malo. O le itu lena, ae i ai lava si vala lea sa ou taua lau Afioga i le Minisita, e le o taoto lelei totonu o lau Matagaluega o Fesootaiga ma le Matagaluega a le Regulator po o le Pule Faatonu. O lena e fefaloai lava le mea lea, o la e tu mai le Pule Faatonu e le mafai ona toe avatua se laisene e run faapisinisi ai le tatou broadband, ma e sao lelei le mea lena e tulai mai ai le Pule Faatonu.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

Ia a o lea e taumafai le isi au vaega o lau Matagaluega tulei e fai faapisinisi. Na ona ou faamanatu atu i lau Afioga, e leai o mea a le Malo e le tatou ona toe o e toe fai le competition ma tatou ISPs lea e i ai le Digicel ma le Bluesky, ae na ona faamanatu atu, o lena e i ai le faaletonu o lea e fetosoai le tatou mea lea fua i le le lelei ona faatino. Ma le agaga faaaloalo. Faafetai.

FOFOGA FETALAI: Malo. Tulai mai le Minisita o Aoga.

Afioga Hon AFAMASAGA LEPUIAI RICO TUPAI: Lau Afioga i le Fofoga Fetalai, ia faafetai i finagalo faaalua o sui usufono mamalu. E pei ona ou tali atu i le aotelega, o lea ua toe faatulaga le tatou uaea lea o le broadband. O le tulaga o lo o saunoa i ai le sui usufono mamalu, e leai e le o i ai se feteenaiga i le va o Matagaluega. Na o le pau le mea o lea e toe faatulaga le tatou uaea lea. O le commercialise lea e saunoa i ai le sui usufono e leai e le faapea e fai ai e le Malo se auaunaga e le o le lagona lena. O le faamoemoega o lo o i ai, o lo o taumafai ina ia centralise services a le Malo. O le taimi lenei, e alu faapea le initaneti a le isi Matagaluega, alu faapea le initaneti a le isi Matagaluega. Ae i lalo o faiga faavae a le Malo ma tulaga i procurement a le Malo, o le a tilotilo loa o le a fai, tender out internet services a le Malo, afai e uma ifo e malo ai le Bluesky, ia fai uma e le Bluesky Matagaluega uma. Afai e malo ai le Digicel, fai uma e le Digicel mea uma. Afai e malo ai le CSL, ia e faapena le lagona o lo o taumafai nei i ai ina ia agai i ai le toe faatulagaina. O le taumafaiga ina ia tele se tupe faasao, o le tilotilo i ai a le Matagaluega, e ono oo i le 30% le tupe faasao a le Malo pe a faapena ona toe tilotilo e toe faatulaga lelei le national broadband ua i ai nei. O le toe fesoasoani atu lea i le saunoaga a le sui usufono.

Ae faafetai tele i finagalo sa faaalua ae pei o se faaata atu lena o le tulaga o fesootaiga o lo o i ai nei ma le tulaga o le fesootaiga i totonu o le tatou Malo, e le gata i le auaunaga i totonu o le atunuu, ae o le tulaga ai o Samoa i lona va i fafo ma isi Malo e le gata i Malo Polenisia, a o le atu Pasefika atoa ma le silasila mai a le lalolagi atoa ia i tatou. O le a le ituaiga Samoa lea tatou te fausia mo a tatou fanau i le lumanai? O se Samoa e tamaoia i so o se itu. O se Samoa ina ia mafai e tatou fanau ona fesootai i so o se atunuu o le lalolagi ina ia faigofie ai mo aiga uma. O le taimi nei, so o se uaea lava tatou te faaaogaina, e agai uma lava i Amerika, o le o le Tuisamoa, o le Manatua o le Ash, o uaea uma lava nei e o uma lava i Amerika. Ma o le faamoemoe foi la e i ai, e le gata ia alu i Ameerika a ia tatou alu foi la ma Asia. O i o lo o faatupulaia ai le tamaoia ina ia tele ni avanoa maua mo i tatou.

Lau Afioga i le Fofoga Fetalai ma le mamalu o le Maota, faafetai tele lava mo lenei avanoa ua maua e le Matagaluega e le gata ina tali atu ai, ae faataatitia ai nisi o faiga faavae a le Malo e taua mai i le national ict.

FOFOGA FETALAI: Se i tulai mai le Afioga i le Palemia.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, na pu lava le mea ia tatou manatua o le tatou atunuu o se tamai atunuu laitiiti lava. A laitiiti, e laitiiti foi a tatou pisinisi. O le mea lena e masani ona galo i o tatou tagata o le ala lena tatou te taumafai ai e aoao mai a tatou pisinisi ia toatele ma atunuu ia latou te faaaogaina ma fai ai le latou sao ona feoloolo ai lea o tupe maua e maua ina ia malamalama lelei ai i mea e tatau ona tatou fesootai atu i isi atunuu e pei o Amerika Samoa, o le Atu Kuki, o Toelau, o le vaega lea a Uea ma Futuna. o lea foi e taumafai e fesootai atu ia Tuvalu, a o lea foi e sau faafesili mai i New Caledonia, o mea na e maua ai a tatou seleni, ae le faapea e faafesootai atu lava i Amerika, ia ai Amerika e tatou te faaaogaina e na o tatou telefoni a nei e telefoni atu ai i aiga, se i aumai ni tupe se i faatau ai ni sikareti, ia pau na. E le faapea o le a fesootai atu ia Amerika ona otometi lava lea ona maua tupe. E faamoemoe i tagata, i tagata e faaaogaina. A o ai tagata? Pisinisi. O le mea lena e tatou te manatua, a o le tatou atunuu, e pei lava, e na o si atunuu lava laitiiti, e le i oo lava i se 200,000. O le afe la lena o lea e fai ma faamaimaia atu ai ma le tatou Manu Samoa, a faitau i le....e toeitiiti lava oo i le milliona ia tagata Fiti. O lona uiga, e tele ia le aofai o tamafanau a Fiti e piki mai ai a latou au, masalo pe silia, pe latalata i le 100,000 i le 200,000, a o tatou, masalo a maua se 8,000 ua feoloolo tele. O le ala la lena o lea e fai ai lava i le loto, fai i le loto le mea lea e fai nei ma le mafaufau. O lea e tatou te oo foi fai ai, ia vaai ia Tonga e le ato se 200,000 tagata, a o lea e kilikiti ai Tonga ia te outou, o le upu lena anapo na ou alu fai ai, o lea e aliali mai, e matua leai lava ni o outou ake, e sefulu taaloga e matua leai lava se malo. O le a la le mea lea e tau mai i? E leai ni tou ake. O le upu lena o lea sa fai i ai anapo, ia outou malo i le taaloga lea o lea e omai i luma o le atunuu, afai e tou te le mafai ona fai se mea, faamavae mai nei, aumai tamaiti ia e taaalo i i le Super 9 pe afai ua outou le mafaia se paupau. O lea ou te vaai atu, o mea o tagata e tamomoe e tamomoe ma le polo. A palasi mai le polo pue ia maua, ae le o le pue le polo pau. Aisea? Palaai. E vaai atu loa ua faapea mai le faamalumalu mai o le Tonga, te i lava ua misi le polo. A o lea ua outou malamalama uma lava i le faiga o le taaloga. O uiga na o lea e moomia, tatou tagata e toalaiteiti tagata, e galo ia tatou, e le faapea la na ona pipii atu lava ia Amerika omai uma kamupani Amerika. O le a te i lava ua omai, e leai se mea e mafua ai ona telefoni mai. O lona uiga e na o tatou tagata lava e telefoni mai i aiga, o a mai outou? O a mai tou alofa? Ona fai atu lea i ai, aumai se \$10,000 na e fai ai le mea lea, fiu e tatali e leai se mea e aumaia.

Lau Afioga i le Fofoga Fetalai, e faapena le mea. E te tilotilo i le mea o i ai tagata, ia toatele ia ola ai a tatou atinae i Samoa nei.

FOFOGA FETALAI: Malo faafetai. Faaauau mai le saunoaga a le Afioga i le Minisita.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

Afioga Hon AFAMASAGA LEPUIAI RICO TUPAI: Lau Afioga i le Fofoga Fetalai, e na o se faaopoopo laitiiti atu lava i le mea lea na saunoa i ai le Afioga i le Palemia.

O le lua vaiaso talu ai lea sa ou taua sa fai ai le Digital Pacific koneferenisi sa fai iinei, e i ai le mea faapitoa sa faia ai mo tupulaga talavou e tau o le Youth Go Lap ae na o tatou tamaiti lava sa i ai ia ma nisi na omai mai fafo e faatautaia. O le mea matautia na i ai i le mau a tagata mai fafo, e ese le atamamai o tatou tagata, ese le atamamai o tatou tamaiti. Ma e i ai nisi o vaega sa i ai, ua faapena ona tilotilo mai ai ia kamupani ia sa i ai e faafaigaluega atu iinei, aua la o lea ua faafaigofieina ia fesootaiga, e faigaluega atu lava iinei i Samoa, ae o la e faigaluega i le kamupani mai fafo. Pei o isi la itu ia e moomia e le Malo e faaleleia fesootaiga, ina ia agavaa ai tatou mo tulaga faapea, e hire mai lava mai fafo a o lea e faigaluega atu iinei, ia pei lava o la e faigaluega i o pe faigaluega faatasi ma le kamupani iinei, ona o le lelei o tulaga o fesootaiga. O fesootaiga ua taugofie. O le tulaga sa i ai, ia afai sa faapea ona e matamata i le lakapi i le lua itula i le \$100, o le taimi lenei, ua mafai ona e matamata i le lakapi lena i le lua itula i le \$50 pe lalo ifo. O le tulaga lena ua i ai le tulaga o fesootaiga.

Ona faatai lea ma so matou leo lau Afioga, ia e faapai atu isi ou itumalo pele o Aana Alofi Nu.3, e mai lava i Fasitootai, Vailuutai, Faleatiu, Satapuala ma Satuimalufilufi, faafetai lava i la outou tapuaiga i tupu ma ee, o nofo a too, o tina, o tupulaga talavou e oo lava i fanau iti, o le nofo a Faafeagaiga e fia i totonu o fatafaitaulaga e fia, ia faafetai tele lava i la outou tapuaiga a o matou alofaiva. E faapea foi ona ou tauavea ai outou finagalo i totonu o le Faigamalo ma ona upufai, aua so tatou sao ia Manuvao mo le atinae o le atunuu.

Ia agalelei tele le Atua ma ia faamanuia tele i la outou tapuaiga. Lau Afioga i le Fofoga Fetalai ma le mamalu o le Maota, ia manuia tele le Fonotaga ma le faaauauina o le Fonousu i le aso, faafetai.

FOFOGA FETALAI: Malo faafetai.

Afioga Tafua Maluelue Tafua (Aleipata Itupa i Lalo): Malie lau Afioga i le Fofoga Fetalai....

FOFOGA FETALAI: O se mea e fia faasao?

Afioga Tafua Maluelue Tafua: Ioe lau Afioga faafetai lava.

FOFOGA FETALAI: O le a se mea? O lea ou te fesili atu po o se mea e fia faasao.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

Afioga Tafua Maluelue Tafua: E le fia faalavelave le Afioga i le Minisita a o saunoa. E pau lava lau tuualalo ma le faaaloalo, lau Afioga i le Minisita, o lo matou itumalo e mamana le tapuaiga. O le uiga o lea mea, a ola lelei TV a Aleipata, ou te talitonu e malo le Manu Samoa i le aso 30, ma le faaaloalo.

FOFOGA FETALAI: Ia lelei. Ou te faamanatu atu i sui usufono mamalu, ona o le tatou galuega e manatu e vave pasia ia le tulaga o le tatou Tala o le Tupe ae sagai atu le Malo e faatino o le atinaeina o o outou itumalo i mea sa laga. E pau le avanoa e mafai ona ou tuuina atu, o le mea e fia faamalamalama ma le mea e fia faasao o mea sa aafia i lau saunoaga. A o isi la mataupu fou ma tulaga uma faapena, ia po o le tulai mai foi e momoli le faafetai po o le a i le Minisita, e le talia i tatou Tulafono Tumau. Ae faamanatu atu ina ia televave ai le faiga o le tatou galuega.

Tulai mai lau Afioga i le Minisita mo Faamasinoga ma Pulega Tau Faamasinoga.

Afioga Hon FAAOLESA KATOPAU T. AINUU (Minisita mo Faamasinoga ma Pulega Tau Faamasinoga): Lau Afioga i le Fofoga Fetalai faafetai mo lou avanoa, ou te muai faatalofa i le tapuaiga a Lana Afioga Mamalu, O Le Ao ole Malo ma le Masiofo, faapea foi le Sui o le Fono a Sui Tofia ma lau Masiofo. Ou te faatulou atu foi i le tapuaiga mamalu a Samoa i ona tulaga faalupe, o outou sa ma faiga o le a ou le gafataulimaina i sau faamatalaga, ona o le paia mai le vavau e oo i le faavavau. E le galo foi le nofo tatalo mai le Aufaigaluega faauuina a le Atua i lea fatafaitaulaga ma lea fatafaitaulaga o lo o nonomanu aua se manuia o Samoa.

Ou te faatalofa atu foi i le Tafatolu Fefaatauagai a lo tatou Malo, le susu o lau Afioga i le Palemia, le Kapeneta, ma le mamalu o Faauluuluga o Matagaluega ma Faalapotopotoga Tumaoti, ua mafai ona tatou faatasi i lenei aso. I lau Afioga i le Faamasino Sili ma le Faamasinoga a Samoa, faapea lau Afioga i le Fofoga Fetalai, ma le mamalu o le Palemene o Samoa. O paia na ma mamalu o le tatou Malo Tutoatasi o Samoa. E faapito sau faamalo i le tapuaiga a si ou itumalo o Vaimauga Sisifo Nu.2, i le afifio o Tama o Alo o Sina, le Fuaifale o Salevalasi, Afifio Matua ma le paia i Aiga. Faapea le fetalai i le Faletolu le Vainalelepa ma Tuisamau, tainane le tapuaiga a nai ou nuu o Tanugamanono, Vailima ma Vaoala, i le afifio o Usoalii, afifio Matua, Alo o Malietoa faapea ona puipui e le fetalai i le Faletolu ma le Vainalelepa.

Ou te faatalofa atu foi i le paia ma le mamalu o Samoa o lo o nonofo ma papaa o lo ta itumalo. E ui ina ufitia lo tatou nuu o Apia ma lo tatou itumalo i le ao pouliuli i lena masina na se i mavae atu, ona o le valaau a lo tatou Matai sili i le Alo o Sina ia Seumanutafa, ma e talitonu le agaga o lo o soifua lo tatou Alii. O le tatalo ia alofa le Atua ma faamafanafanaga i le fanau ma le aiga loto faavavau ona o Lana valaau.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

I lau maitau atu lau Afioga i le Fofoga Fetalai, e tolu lava sui usufono mamalu o le Palemene sa afea le Matagaluega o Faamasinoga ma Pulega Tau Faamasinoga, o lau matau foi i ai, e le o ni mataupu ogaoga nei mataupu. A o le mea e sili ai ua faaleo ma ua talia i le agaga maualalo e le Matagaluega o Faamasinoga ni fautuaga pei ona folasia i luma o le Fonotaga lenei.

E pau lava le mataupu lea e manaomia ai se faamalalamaga, o le mataupu lea na laga e Safotulafai le sui usufono mai Faasaleleaga Nu.2. Ua maea ona faamautuina le 4eka o le fanua o le Malo i Salelologa o lea e fuafuaina lea fanua mo le lotoa fou o le Faamasinoga, ua maea foi ona avatu talosaga i a tatou paaga i fafo mo se seleni e faatinoina ai lea galuega tele. Lau Afioga i le Minisita mo Galuega, ua tele ma anoanoai ma soloi talosaga a lea itumalo ma lea itumalo, mo latou auala ua taatia i luma o lau Afioga, o le fautuaga e le o toe mamao foi le Paketi o le tausaga fou, ae faasaga ane e faaleleia o ta auala o moli ma vai, o mea uma o le ta taulaga aua sauniuniga mo Taaloga o le Pasefika i le tausaga fou. O lea e musumusumu mai le Minisita o Aoga, Taaloga ma Aganuu e matua tele nua le faaletonu lea e i ai o a tatou auala, e manaomia le toe faaleleia. E le agai tagata taaalo i nuu i tua ma Savaii, leai, e agai tonu mai lava i le fatu o le taulaga.

E faamalulu atu i le paia ma le mamalu o sasao nei, ae o le mea tonu lava lea o lea ou te fai atu ai nei lau Afioga i le Minisita, ua fiafia lava nai o ta nuu o Tanugamanono, Papauta, Vailima, Vaoala isi o latou auala fou, e ui e le o se auala mautu....

FOFOGA FETALAI: Malie le sui usufono o lo o tulai mai, ou te fautua atu i le Afioga i le Minisita, o a uma mataupu na saunoa i ai sui usufono mamalu, ia ona faaiu mai lea o le saunoaga. E i ai le manatu e taialalo le ia a Sa Saumani i lotoifale ma tulaga o finagalo e pei ona saunoa i ai lau Afioga, o mea a le Kapeneta e faapena ona fetuunai.

Afioga Hon FAAOLESA KATOPAU T. AINUU: O lea e i ai nai mataupu e fia avatu foi lea agai i lou itumalo i le talosaga i le Afioga i le Minisita.

FOFOGA FETALAI: Ia e le taofia e le Fofoga Fetalai le tulaga lea, e i lau Afioga le aiatatau, ae manatu i le faafofoga tapuai mai a le atunuu ma le galuega fai i le faiva ma le pule faatonu.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, masalo e le tau faailoaina lene mea i itumalo, e tatau lava i sui usufono ia le pitolaau e pei foi ona lagalaga mai e le la itu, a o tatou lava ia o le Kapeneta, ia o mea lava na e fai lava e tatou i lo tatou vafealoaloi e le faapea e tau faailoaina i le faafofoga mai a le itumalo, ae faataua le agaga e pei ona saunoa le Fofoga Fetalai e faagasolo ai le tatou galuega.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

FOFOGA FETALAI: O se mea e fia faasao po o se mea e fia faamalamalama lau Afioga i le sui usufono mo Gagaifomauga Nu.3?

Susuga Hon Laauli Leuatea Polataivao Fossie Schmidt: Lau Afioga i le Fofoga Fetalai, o le mea e fia faamalamalama i le saunoaga a le sui usufono.

FOFOGA FETALAI: Ia saunoa le sui usufono. Ua maea le saunoaga a le Minisita a o lea ua faatautuapega lou tulai mai

Susuga Hon Laauli Leuatea Polataivao Fossie Schmidt: O le ala lea o le talosaga atu leaga o lea e faalauaitele le saunoaga ia matou uma. Ia o la foi e saofai ane ma fautua ane e fai na o la mea ae tuu matou. Se i fai fuafua lau Afioga i le Minisita ma le....

FOFOGA FETALAI: E faamalulu atu i lau Afioga o lea ua....Saunoa lau Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neiotei Aiono Galumalemana Dr. Sailele Malielegaoui: Lau Afioga i le Fofoga Fetalai, e faanoanoa ona o le saunoaga a le sui usufono sa saofai i totonu o le Kapeneta ona e le faapena ona faia ni mea, o le a foi le faafogafoga mai, ia o mea lava na o nai a tatou suaga lava e faatalie ai. Ae o lena e te silafia lelei e leai ni mea faapena e faia i totonu o le Kapeneta, e faavae lava i luga o faiga masani o ala o mea.

FOFOGA FETALAI: Malo faafetai. Se o tatou uma sa i le Kapeneta. Ia e faapena, i le faafogoga mai a Samoa ina ne i latou ave sese le tulaga lea, leaga e le tau aumaia i luma, leai o tulaga lava masani a ave ifo lava le fasipepa a le isi Minisita i le isi Minisita, se se i tautuana ifo le vai, ioe, ia ona uma lava lea, ae le tau aumaia i luma. O le ala lea o lou pipiii atu, leaga ua leva foi ona ou i le Kapeneta o faiga faavae na. O le mea la lea, a ua maea le saunoaga a le sui usufono o mea sa laga e sui usufono mamalu, ia malie e faaii maia le saunoaga a lau Afioga i le Minisita, ae se i pasi ifo i le Minisita mo Aoga, Taaloga ma Aganuu.

Afioga Hon FAAOLESA KATOPAU T. AINUU: Ia e faamalulu atu i sui usufono ua afaina finagalo ona o le agaga latou e momoli atu i le Afioga i le Minisita ia nai vaivaiga o lo matou itumalo.

Lau Afioga i le Fofoga Fetalai, o lea ua maea lau tali, e lagolagoina malosi e le itumalo o Vaimauga Sisifo Nu.2 le Tala o le Tupe 2018/2019. Faafetai lauAfioga.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

FOFOGA FETALAI: Malo faafetai. O lea ua oo mai le faasologa i le Afioga i le Minisita mo Aoga, Taaloga ma Aganuu, ia pei o le Minisita lea sa feoloolo foi i ai saunoaga a sui usufono mamalu.

Tulai mai lau Afioga i le Minisita mo Aoga, Taaloga ma Aganuu.

Afioga Hon LOAU SOLA KENETI SIO (Minisita mo Aoga, Taaloga ma Aganuu): Ia e manatu ia e taoto ia faamanu o le tai loloto le paia o sa o le taeao ma le aso, afio lau Afioga i le Fofoga Fetalai, afio foi le Taitai o le Malo, Afioga i le Kapeneta nei, aemaise o sui a Minisita, o le mamalu foi o lena itu o le mamalu tau ee mai o lena itu o le malu aua le Palemene o Samoa ma lana Fonousu.

Ona manatu lea e le tata i tua le tili lau Afioga i le Fofoga Fetalai, ua paia sa o lea ua uma ona paelago foi e tootoo e pei ona saunoa le Afioga i le Minisita mo Fesootaiga, Faamatalaga ma Fesootaiga Televavave Faaneionapo. Ae ou te manatu ona e toatele tele ia sui a usufono ma le Palemene foi sa laga ia finagalo foi e afea ai ia lenei Matagaluega o le ala lea o le a taumafai atu ai se agaga vaivai o lenei taeao fou.

Ia e maitau i le aso ananafi ia ua faiva lava i ipu ae le faiva i ola, i le maitau totoa foi i saunoaga a Afioga i sui usufono, i le tele ma le anoanoai foi o a latou finagalo faaalua. E pei e lilifa lava i le faafetai mai i le Minisita ia ma le Matagaluega ia faatasi ai ma a latou fautuaga ma timaiga, ina ia faapena ona aanoa ia le galuega. Ia e pei e foliga mai la o la e tuu mai ia lo latou tauau, ia e matimati ai foi le sa o le Matagaluega aua le agai i luma. Ae o le agaga lea e avatu ai foi le agaga faafetai, i le paia o le malu nei. E le gata i lena itu ia a o Sui Minisita po o Minisita Lagolago, malo le tauatai, malo le fautua.

Ae o nai vaega e taumafai atu e ootoo atu sa laga i lauga a sui usufono, ia o le a ou amata mai i le NUS, ia po o le Iunivesite Aoa o Samoa. E tele manatu na faaalua, e lilifa agai i le tofogiina o pili o tamaiti aoga, tasi lea o matafaioi o lo o faapena ona lagotua ai le galuega. Aisea? E le tutusa uma aiga, e le tutusa foi matua. Lea ua oo mai ia te au ia faamaumauga mai le taimi na amata amata mai ai e pei foi ona saunoa le Palemia ananafi ma tau faamalamalama lea itu.

Ioe, o le aua lava ia aua nei tutulia nai fanau, e lilifa lava le tilotilo ma le tagatagai a le Iunivesite, ina ia aua nei faamaumaua ia aso aoga o nai fanau talu lenei mea o le pili aoga. Peitai ane, o le a le avea le tulaga nei ma mea e foliga mai ia o se masani ia po o se amio a matua talosia o faalogologo mai. Lea na saunoa i ai le Afioga a le Palemia ananafi i le mea e ave i ai lau faamuamua. Ioe, e oti mai loa le toaina, alu uma i ai le sosia ma le tamaoaiga o le aiga, ae galo le pili o le atalii la e \$1,000 ma ona tupu i gauta, lea na saunoa manino i ai, o le mea e ave i ai ia lau faamuamua.

A ou vaai i le data analysis lea ou te vaai atu i ai, ia e 5 loa vaiaso, ona taofi loa lea o lau resitala o le a le mafai ona e toe aoga, ia a tau lena 5 vaiaso o se taimi umi ma tele, e faufau ai le mafaufau o le matua po o fea e ave i ai lau faamuamua.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafaoga faaauau i luga o le faitauga faalua – Aso 3**

Ioe o le upu moni lena, o lea la ou te tilotilo atu, 80% o tamaiti uma ona totogi ia latou aoga i totonu o le 5 vaiaso lea, ae o le isi la 20%, lea la e i ai le faafitauli. Ioe, o le ono vaiaso ua alu atu le isi 10% ua uma ona totogi. O lona uiga, ana le faia nei le mea lea, e faatalatalanoa atu ai a faapena matua ma le totogia ai pili a latou fanau. E oo mai i le vaiaso lona valu, ua 91% tamaiti ua uma ona totogi pili, ia ona faapena lea ona toe talia i totonu o le aoga.

Pau lea o le faiga ua tilotilo i ai ia le Iunivesite ae taua ia outou finagalo ina ia faaauau ia le aoga a le tamaititi, tuli i le 5 vaiaso ae 6,7,8 tolu vaiaso o le a aoga ai, e taua ia lo outou finagalo i le tulaga lea. Ia ae o le matua lava ia e naunau ia atamai ia 6 loa ia vaiaso, totogi loa le pili. O le agaga lena ina ia malamalama lelei, ia ma faataua matua ia fanau. O le isi vaega ua oo lava i le vaiaso 8 e leai, e maitau foi e fefiloi lava le saito ma le titania, ia e i ai foi ma le autafafao la e i ai i le Iunivesite. O tama na e o atu loa fai mai e sili ai le alu e faigaluega, ia fiu loa le NUS e faatali mai, ae la ua agai i le tulaga lea, ua maua galuega po ua o foi i fafo i galuega foi nei ua amata ona o i ai le tele o tupulaga. Ia e pei o foliga na o le pili aoga.

O le tulaga e pei ona laga foi e nisi o sui usufono i le....

Afioga Leaana Ronnie Posini (Safata Sisifo): Lau Afioga i le Fofoga Fetalai....

FOFOGA FETALAI: Ia se i maea le saunoaga e leiloa po o maua mai ai le mea lea e tau tulai mai ai. Ia se i malie lau Afioga i le Minisita, se i tulai atu le sui usufono mo Safata i Sisifo ma le sui usufono o Falealili.

Afioga Leaana Ronnie Posini: Faafetai tele i lau Afioga, faafetai i le folasaga ma le saunoaga a le Afioga i le Minisita, talitonu foi e le faalavelavea i le saunoaga. Pau lava lea o si vaega sa ou laga i lau lauga faamolemole lau Afioga i le Minisita, ia afai o lea o le a,, ua lava ia le faasala mo le 5 vaiaso ona malolo lea o le tamaititi e le toe aoga, i le 2 i le 3 vaiaso ona faatoa toe maua lea o le pili lea, aua o le tele o pili la e tai \$1,800.

Afai la ua uma ona totogi le \$800, ae totoe le \$1,000 ona toe ae mai lea o le tamaititi lea e aumai le \$1,000, toe faaopoopo i ai ma le 10%. Lau Afioga i le Minisita pei o le ala lea o lau tatalo, pe le ua lava ia le faasala lea e faatea mai ese e le toe auai i totonu o vasega, ae toe ae mai toe totogi ia le \$1,000, ia afai e toe faaopoopo i ai le 10%, ua taugata i lau lea faitau lau Afioga i le Minisita.

FOFOGA FETALAI: Ia masalo ua maea faauilavea. Ia se i tulai mai lau Afioga i le Minisita.

Afioga Hon LOAU SOLA KENETI SIO: Ia, faafetai foi mo le saunoaga foi a le Afioga i le sui usufono. E sao lelei e oo foi ia ta ita ia ta te lagona foi, ioe le mamafa o lenei foi 10%.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaaauau i luga o le faitauga faalua – Aso 3**

A o faalogologo mai, o i i le Iunivesite? Ia a o outou faalogologo mai ia e sao le mea lea e saunoa mai ai le sui usufono, aveese lena 10%, ia o lea o le a tagatagai i ai lau Afioga. Ua le ese ma le mea lea e tiga ona o atu ua sisi le ua ae o atu foi toe fasi.

Ia o tatou sikolasipi ia na laga e agai i Iapani, e taua foi le finagalo na faaalua. Lea ua aumai le faamaumauga a le NUS e tusa ma le tulaga lea, e maitau foi o sikolasipi ia a Iapani e faasalalau. Ia i nusipepa, o le TV, o le social media, e alu i ai, ona o lea o tamaiti e apply i ai. Ia o conditions la, e sau sao mai lava i le Ofisa o Iapani e i ai le latou Ofisa iinei o le Amepasa, ia ma le faatulagana foi o a latou sikolasipi ina ia faapena ona apply i ai ia tatou alo ma fanau. O aiaiga foi, e le aiaia e le tatou Iunivesite, o conditions lava ua uma ona malilie i ai, ia ma talanoa i ai le Malo o Iapani. O lona uiga, e tatau ona e tilotilo lelei i conditions, ioe, ona e apply ai lea.

Vaai po o se mea pe e te alu atu nofo i se faleoo pe e te alu atu nofo i se hotel. Ia o mea uma na e tatau ona e tapena i ai. Ia na ma o nei i le ma malaga i le State Visit lea na ma o ai ma le Afioga i le Palemia i Iapani, ia na ma talanoa ai lea ma le Amepasa ma ona faaalua mai lea o le tulaga lea, e tele la galuega a le tatou Amepasa Iapani o lo o faapena ona fesoasoani ai i nai alo ma nai fanau ia, ona na amata atu e le i lelei ia le latou tilotilo i conditions o le faiga o le sikolasipi. Ioe, ae le o se mea e.... o mea e tatau ona tilotilo totoa i ai alo ma fanau ma matua.

O le mea la ua tupu, e i ai pasene e tatau ona totogi pe a faapea e le.... ui o lea, ia e fai lava si umi o le faamalamalama, ae o le auga atoa lava, e le malamalama le tamitiiti i le mea na ala ai ona alu e sikolasipi i Iapani. Ioe, atonu o malamalama ae le o atoatoa. Ioe o le agaga lea ua ala ai ona tulai mai ia le faafitauli lea. Ae o lo o i ai ia le tatou Ofisa i Iapani o lo o fesootai ma alo ma fanau ia pe a faapea o i ai se agaga ua afaina ai i le faaaauuina o aoga.

Ae o le tele o tatou sikolasipi la e o i Iapani, ia ua foi mai ma Master Degrees, foi mai, o lona uiga, o la sa aoga ai lava ma le faalogo atu i le naunau tiga lava ona fiaai ae taumafai lava ia maua lava le fasipepa lea na ala ai ona alu. O lona uiga e fai i le loto le mea, ioe, ou faalogo i le isi aualii aua o au ou te le i sikolasipi, tiga le fia aai ae taumafai, tiga le malulu ae taumafai lava. O le a la le mea na oo i ai? Ia lea ua sau ua Pule, Pule Lua, Pule Tolu, aisea? E lelei le aoga na aoga ai, ma le taumafai la e,, talosia o faalogologo mai matua.

Ia o le tulaga lea na laga e uiga i le merge foi lea....

Afioga Fuimaono Teo Samuelu Teo (Falealili Sasae): Lau Afioga i le Fofoga Fetalai....

FOFOGA FETALAI: Ia se i tulai mai le faauilavea a le sui usufono mo Falealili i Sasae lau Afioga i le Minisita.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

Afioga Fuimaono Teo Samuelu Teo: E momoli lava le agaga faafetai tele i le Afioga i le Minisita, ua manino ma malamalama le vaega lea, e sao lelei lau saunoaga, e le o malamalama ia tamaiti i conditions o sikolasipi. O le ala lena o le tuualalo, ina ia mafai ona aami atu matua, e faatalatalanoa lelei, ina ia iloa e matua ae le i malaga ia latou fanau, i tulaga o le a oo i ai, ia aemaise foi ia mea o le a o atu faamautu ai, aua e faateia matua i le toe fai mai, e i ai tupe e toe totogi. Ae o le ala lena, o la e po malae i matua e le o malamalama. Ae pei o le va leai ai latou o lo o vaaia mea ia ina ia mafai ona,,,

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai....

FOFOGA FETALAI: Ia malie le sui usufono mo Falealili o lea ua tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Masalo ua manino ia le saunoaga a le Afioga i le Minisita, o le a vaavaai i ai. Ia masalo o le tali sao o le mea lea, taatia mai, aua a vaavaai i ai, na o le vaavaai lava i ai, ia ae a taatia mai, e le gata ina saofai ai, ia faapula, ma fai i ai le iuga.

Ae o lena ua saunoa atu le Minisita, o le a ou faatalanoaina foi ma le matou vaega, aua o mea ia e sau sao lava mai fafo. Ia e sao foi latou, ae tuu pea i ai se fesoasoani, e pei la o mea ia e tulai mai pea, e i ai foi le tiute o matua, aua e leai lava se matua e le malamalama i mea ia, ae pei e maitau atu e talanoa i le tamaitiiti. O le mea moi e tatau ona fai, o le talanoa i matua, aua e le mafai lava ona aveesea le mea lea e faatamaititi lava le mafaufau o le tamaitiiti ia.

Ae o le mea sao lava, talanoa i matua, aua o matua i le fanau, ia ma le faamoemoe e 10% o le mea na o le a manatua e fanau, aua e o atu loa fanau ia i fafo, e tele lava ina galo uma ia mea. E i ai le isi tamaititi na ona ita lava, alu atu fasi faamoamoia toeitiiti lava oti le tamaitiiti Iapani, ia ona logo mai lea, ia o le mea lena, na o atu loa le Malo, fai le fesoasoani i le mea e tatau ona fai. O la foi e i ai le tatou Amepasa i o e mafai ona fesoasoani ane ae o le tele lava o sikolasipi ia e ofo mai e Malo, e o sao lava latou ma faatalanoa, e leai la se matua, e le tatau ona le malamalama i mea ia, e malamalama uma lava i mea ia.

Ae i ai lava le tulaga lena e tulai mai loa ia le faapefea ona o mai loa lea e talosaga mai ia se fesoasoani. E leai se mea e eseese ai ma le autau apu foi lea, e ta te fiu e talanoa atu a outou o i o teu le amio, teu le tou amio aua o le mea lea e manao ai le Malo ina ia toatele nisi e o atu i o aua a leaga loa le tou amio, ia ona liliu mai loa lea o le kamupani aumai Toga ma Fiti, ae oti faasasao ai isi fanau ia e fia o atu. Ia ae na ona tago loa i le ava, pogisa loa le mafaufau.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

O lau asiasiga lea na alu nei i Dunedin, na matou aso atoa ai lava i le matou feiloaiga ma le 60 o latou na e fasimanu na avatu sao lava i Samoa nei, e fulisia lava e vaega ia o atu i Faleula ae omai i tua isi. Ia o le mea foi la ua tau taa nuu foi lele le mea, o le tele ia o le fautuaga o le tou omai i inei, tou te le omai ai fai ai ni uiga faapena. Pau lava le mea o oe o le tagata faigaluega e te sau e saili le manuia mo ou matua ma ou uso ma ou tuafafine ma le anoano o mau fanau o la e faatali mai Samoa. Ae e te le i sau i inei e te tilotilo po o ai tou te aiga i inei ma a, ma a, ma a, ma e soona tago i le ava ma inu faavalevalea ai. O isi ua tai 9 masina o i latou ia, e uma ane le 9 masina fai mai le isi alii, ua lima taavaleafi a le latou aiga, o la ua feoi ai lona tama, le isi vaega na e o atu i Faleula, e lima taavale la e feoi le tama ma ona uso. O ituaiga mea la ia, aua o lea e aumai nei e outou e le malamalama, se ua leva lava ona malamalama a o le mea lava lea e o atu loa lava e le toe manatua mai upu ia na fai i inei. Leaga o le tiute lava lenei o le Malo e tataua ona fai. Ae taatia mai lo outou finagalo, ia semanu o lea foi e i ai lenei matai o le atunuu e igoa ia Taatiamai e sulufai i ai mea uma, ae taatia mai.

FOFOGA FETALAI: Ia malo faafetai. Ia tulai mai le Minisita e faauau le saunoaga.

Afioga Hon LOAU SOLA KENETI SIO: Ia o lenei ua faamalalama atili e le Afioga i le Palemia, lau Afioga i le sui usufono, e le puaoa ai le vaai a matua i le tulaga lea, e te iloa foi tatou e alu atu loa le tamaititi fai mai o au ua sikolasipi, e muamua lava talai e le toeaina i lo latou nuu atoa. Se o si ou atalii ua sikolasipi, ioe, o le na e matua malamalama lelei ai matua i le tulaga lea.

Ona ou oo mai ai lea i nisi foi o sui a usufono sa latou laga le SQA. O le SQA o latou ia e latou te faamalalaina tulaga aupito sili ona manaomia aua aoga faaauau. Tasi lenei lala o le Matagaluega o Aoga sa talanoa ai le Kapeneta ma fai mai, ua vave tele ona escalate ma tele inflate, ioe, na amata atu e toatolu tagata a o le taimi lenei, ua toa 50 le aufaigaluega. O le fesili pe aisea? Lona uiga e taua tele, e taua tele le galuega a le SQA o lo o faapena ona fai ina ia faapena ia ona faaauau ia ma kava mai polokalame o aoaoga faaauau. O lea foi la e galulue faatasi lava ma le NUS ina ia faapena ona **upgrade polokalame i totonu o le NUS, ina ia faapena aua foi alo ma fanau o lo o faapena ona malaga atu i fafo, a o lenei e faapena ona talia e Fiti, Niu Sila, Ausetalia.** O se galuega taua tele o lo o faatinoina e lea lala o le aoaoga. Ia masalo ai ua tali ai foi fesili sa faapena ona laga e uiga i le NUS ma le SQA.

O nisi o sui a usufono, ia talanoa mai e tusa ai ma le totogi o faiaoga o aoga a ekalesia ma aoga tumaoti, ua saunoa i ai le Afioga i le Palemia, a se o se miti o se mea ua leva ona mafaufau i ai lo tatou Malo, ae faapefea ona faatino?

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

Ia o le agaga lena, ioe, a o le matou foi lena vaavaai ma ma talatalanoa ma le toeaina fai atu, se ua tatau ona tatou tilotilo e totogi ia faiaoga a ekalesia, ioe, ona aisea? O alo ma fanau a Samoa la e aotauina ai. Ia ua i ai foi le agaga o le Kapeneta e tilotilo i le tulaga lea, ae a faapefea ona faatino? Ia o lea e fai atu ai e ao a tatou tax ia ma taumafai ina ia tatou galulue faatasi, aua le tulaga lea. Ae talosia ia vave, ioe, ia fai i lou taimi ae ou te le i aluese ma le Minisita o Aoga, o le matua manaia lava. Ae talosia ia mafai ona tatou i le tatou Tala Faatatau o le Tupe ona faatino. O lea ua uma ona aumai ia le analysis ma aumai ia figures ia au, ia tatou te tilotilo i le \$30miliona e faatino ai lea tulaga. A o fea la e aumai ai? Ia o le na. O lena e ia te oe le tali. O tatou aoga ECE Early Child Education lea na saunoa i ai le Afioga i lou sui a Minisita po o si ou uso le sui usufono mai Anoanaa Sasae e taua lena, o lea e fai mai isi o le 4 tausaga ua amata, e leai, compulsory, 4 tausaga ua tatau ona totonu o le ECE le tamaitiiti aoga, ae le o le 4 tausaga o la e fealualuai lava i tua, 5 loa i le Primary School i le Premier One. Ia o le a la le mea e oo i ai? E fiu le faiaoga e tau falo le mafaufau. O le mea lena e fai atu ai e amata atu i lalo o le ACE lea ua agai i ai le Ofisa o Aoga e aumai a latou analysis ma aumai datas e tilotilo i ai le Kapeneta, ia ona fai lea o se tulaga aua le tulaga lea, ia ma totogi e le tatou Malo ia faiaoga. O lea foi ua faatu ia le Teachers Council, o latou la ia o le a vaai le aotelega, aua e le faapea o le a totogi faiaoga ae le i o i gauta i le NUS, o vaega uma ia, quality of teachers, e tatau ona lelei faiaoga, aua e ese lava le aoao i le Premier One, ese le aoao o le tamaitiiti lea e i lalo i i. Lona uiga la, e tatau ona qualify teachers, pe tatau ona latou aoaoina ia tamaiti. O la e faagasolo i aoga a ekalesia i le taimi lena aua foi o la e i ai le faletua e lelei le mafaufau ma lelei le faafoeina, o la foi ua i ai le tatou Council la e i ai i tai i Sogi e agai i ai faiaoga, a o le auga tonu ia faia ni qualification mai gauta i le NUS ona mafai lea ona faafoe le tulaga lea ma totogi e lo tatou Malo faiaoga.

Masalo o le aotelega lava o le tele o finagalo faaalua o sui a usufono, e lilifa lava i faiaoga, e sao lelei outou, e le o lava a tatou faiaoga. Aisea? E tele ona mafuaaga, malaga i Niu Sila, sui le galuega, a o tatou faiaoga o la ua level faatasi lava totogi ma loia ma fomai. O le faataua lena a le tatou Malo lea o faiaoga. E te iu mai loa i gauta i le NUS, Bachelor of Education, e \$30,000 lou totogi e te amata ai, sau lava level faatasi ma le fomai na iu mai Fiti ma iu mai Niu Sila, a o le mafuaaga la lea e tupu, e le o lava le tatou faalauiloa o tatou ia o sui usufono. O lea tou te tagitagi mai i le lē lava o faiaoga, se o le mea lena a outou tou te o e fai i tua i o outou nuu, aua e le mafai ona alu atu se tamaitiiti Solosolo faiaoga i Siumu, e le mafai ona alu atu se tamaitiiti i Apia faiaoga i Lalomanu. O lona uiga e tatau ona i ai ni faiaoga i totonu o lo tou itumalo, ina ia mafai ai ona accommodate aoga i totonu o tou itumalo. A le mafai la ona outou fetagisi mai, fai mai e sau le tamaitiiti mai Taufusi e alu e faiaoga i Lepa, o lona uiga e oo atu i Lepa ua tuua le aoga. O le a la sa outou tilotilo i ai i le tulaga lea?

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

Ae o mea lava e faapea e tatau ona tatou mataituina, e tatau ona i ai ni faiaoga i totonu o lo tou nuu, o tamaiti ia ua Yr.12, Yr.13, faatalanoa, o le mea lena a le matou Matagaluega lea e fai nei, o i tua e faalauiloa, o le a le galuega e te agai i ai, a o le a lau mea e fai? Ioe, ina ia omai e o i gauta i le tatou aoga ia ona o ai lea. A e fia loaia, ua lava ia matou lea ua pasi i le faaloia. Ae omai e o e fai a tatou aoga. O foliga vaaia ia ua ala ai ona le lava a tatou faiaoga. O le agaga tonu lena, a o le agaga o le Ofisa o lo o agai lava, e fa tausaga e te aoga ai maua lou P Ed, ia ona e sau loa lea e te fiafia lava, e earn lava lou earning i o i lau salary i tua, e te tau le sau i inei i le taulaga, e te alu ifo lava i le primary school ia fai ai lau earning, e te tau le sau i inei i le taulaga. A o le isi loomatua e mana'o lava isi ana tama e sau, se alu i o e te ofisa i o, ae sau i le ofisa, ia e \$8,000 le totogi i le tausaga, ae la e tuu le aoga e \$30,000 ia se i vaai i ai i le eseese, ia se i tautuana ma outou sui usufono, o le tasi lena a outou galuega e fai, faalauiloa ina ia faapena ona mautinoa e matua e tasi galuega e aoga mo si ou alo teine aemaise teine. Ia o le lē lava lena o faiaoga. O malae. Oi, e i ai se mea o e....

FOFOGA FETALAI: Ia malie lau Afioga i le Minisita, se i tulai mai le sui usufono mo Vaisigano Nu.2.

Afioga Tapulesatele Mauteni Tamasona Metuli II Esera (Vaisigano Nu.2): Faafetai i lau Afioga i le Fofoga Fetalai, leai aua e te faateia lau Afioga i le Fofoga Fetalai i lou tulai atu. E aoga foi si faalavelave laitiiti se i tau mapu ai lou finagalo e tapenapena mo le isi taimi.

Ae lau Afioga i le Fofoga Fetalai, ua ou tulai e lua lava nai vaega laiti e i ai le faamatalaga foi sa taumafai atu ae pei o lou finagalo sa le faaauauina ai le tulaga lea muamua, o aoga amata. O lea ua saunoa le Minisita i le tulaga lava lea i le tausaga amata o le aoga amata. E i ai lava le talitonuga, e matua aoga lava le fuafuaga lena foi lea i le 4 tausaga, ae le tatau foi ona taofia ai le lē atoa o le 4 tausaga, aua e tele lava ina molimauina i le tulaga foi lea o le 4 ane tausaga vagana ua oo atu ia Novema po o Tesema, ae ave pea le avanoa foi lea e mafai ai ona vave amata ia tamaiti i le fuafuaga lea mo aoga amata.

O le tulaga foi lau Afioga i le Fofoga Fetalai, lau Afioga i le Minisita o Aoga, o le tulaga lea e aluese ai le tamaitiiti mai le aoga amata. E i ai le manatu foi lea, e aua e te faatali se i 5 ou tausaga. O le 5 o ou tausaga, o totonu o le tausaga lea e 5 ai ou tausaga, afai e 5 ou tausaga ia Me, ave le avanoa e te agai sao ai loa i le primary school, ae aua le faatali se i aulia le isi tausaga....

FOFOGA FETALAI: Ua maua atu lou finagalo lea sa e saunoa i ai, o lea foi ua maua atu e le Afioga i le Minisita. Ona o lea o le a foliga o le a e toe saunoa, ona alu ai lea o le tatou taimi, ioe. O le tiute o le Fofoga Fetalai, o le tulituli o le tatou galuega. Malie la le sui usufono, e te le toe saunoa faalua i le tulaga lea.

21 IUNI 2018

**Tulafono Tau Faaofi o le Faatatauina o Tupe Faaopopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

O lea ua maua atu lou finagalo, ia o le tau tata lava i le moa o le ala. Ae pei lava ona ou fai atu, o le Tulafono lena o lea e aumai nei le Teuteuga o le Tulafono o Aoga lea sa tatou semina ai, ae o le tulaga sa taua ai lau saunoaga, o lea lava e tau tulituli atu ia maua ai se saunoaga tali a le Minisita i saunoaga faalauaitete a outou Afioga, leaga a tatou o loa i le mea lena, ia o lea foi ua e oso i mea taitasi, tulou le paia o le faafofoga mai o le itumalo ma le atunuu, ae taumafai i le tulaga o le tatou galuega.

O le mea la lea, ia malie ia lau Afioga i le Minisita, ia aumai pea sina faamalamalamaga ua mafai ona e maua e tusa ai o le saunoaga a lau Afioga i le sui usufono.

Afioga Hon LOAU SOLA KENETI SIO: Ia o lea ou te maua atu lau Afioga i le Fofoga Fetalai le....ia a vailiu a ae le o i ai se agaga foi nei.

O le 4 tausaga e compulsory, pe a maua mai, e tatau ona oo atu i le 4 tausaga ua i totonu le tamaitiiti lea, a o le sau lea i lalo, e tasi le masina, aoga loa e leai se lava se mea e taofia ai, sau i lalo i luga i le 4, tasi loa le masina ave loa i le aoga e leai se mea e taofia ai.

FOFOGA FETALAI: Ia ua faafofoga i ai le sui usufono i le vave tele ona piki mai e le Afioga i le Minisita. O le mea lena na ou faauilavea ai i lau saunoaga, leaga a tuu atu e faaauau, ia o le isi foi afa itula e tatou te asaina. Ae malie ona o lea ua tatou taunuu i le tatou malologa masani. Ae ou te fautuaina le Minisita, a i ai nisi faamalamalamaga, ia se i faamalamalamaifo i tua a o taumamafa le tatou i le sui usufono mo Vaisigano Nu.2.

O le a faataatiaese Galuega a le Fono Aoa mo lana malologa masani.

Na faataatiaese Taualumaga a le FonoAoa mo lana malologa masani i le itula e 10.41 ma toe faaauau i le itula e 11:25 i le taeao.

Na toe faaauau Felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopopo (Nu.2) 2017/2018 ma le Tulafono Tau Faaofi o le Faatatauina o Tupe 2018/2019.

FOFOGA FETALAI: Ou te faasilasila atu ua toe amatalia Taualumaga ma Galuega a le Fono Aoa. Ma e faia le malologa o saunoa le Afioga i le Minisita mo Aoga, Taaloga ma Aganuu. Ou te tapa lau Afioga i le Minisita e tulai mai e faaauau le saunoaga.

Afioga Hon LOAU SOLA KENETI SIO: Ia, faafetai i lau Afioga i le Fofoga Fetalai.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaaauu i luga o le faitauga faalua – Aso 3**

E manatu foi o lea ua matu i fau le palega auau o le taliga o le sua i le paia o le Maota nei i lau Afioga i le Fofoga Fetalai aemaise foi o le Palemia ma le mamalu o le Palemene, o Faauluuluga foi o Matagaluega ma Ofisa Tumaoti. Ou te manatu o le a faaaauu se faamatalaga e tusa ai foi ma le mea na laga e sui usufono. Ia e le o toe tele foi lau Afioga i le Fofoga Fetalai nisi o manaoga sa faapea ona laga e afea ai lenei Matagaluega. E pei ona silafia, o lea foi ua saunoa le Afioga i le Minisita mo Fesootaiga i le tulaga foi o le galulue faatasi ai, aemaise lava o le Matagaluega i le faaaogaina o auala televavave e fesoasoani ai i le utiuti o tatou faiaoga aemaise lava nuu i tua. O lea la ua faagasolo faatalatalanoaga ma ua faapena foi ona feutagai Matagaluega ia e lua ina ia vave ona faia le fesootaiga lea ona mafai lava lea ona aoaoina atu tatou fanau i le taulaga, a o la e maua atu le courage i tua i tatou nuu i tua, i le tulaga lava lea ona o le utiuti o faiaoga. Tasi lea auala ua faapena ona vave ona o lea ua faapena ona taunuu mai le tatou cable e pei ona i ai le Tui cable e fesoasoani malosi i le tulaga lea o le le lava o faiaoga.

O nisi o sui usufono na saunoa foi ua lilifa lava i tatou malae taalo pei ona i ai le tulaga e fia faaleleia aua alo ma fanau. E sao lelei outou, o le tele o asiasiga ua faapena ona agai i tua ma maitauina ai le tele o malae taalo e tatau ona faaleleia, o malae i Manonouta, malae i Aopo, malae i Mulifanua, o le malae o le sui usufono mo Salani. O malae uma ia e le o faapea o faapena ona lepa ai le silasila a le Matagaluega aemaise au nei, a o le tatou galuega e fai faatasi, ioe. E tatou te tuitui lava, a ua galo foi e lelei lava ona fai ma afe atu i lou ofisa, the door is open any time. You can come to my luma and we talk.

Ia, ua saunoa foi nisi o sui usufono e tusa ai ma le tapenapenaga a le tatou Malo i a tatou taaloga e pei ona alo atu foi i ai le tatou Malo ia host taaloga a le Pasefika mo le tausaga a sau. E \$11miliona lea ua faamatuu e le tatou paketi mo le tausaga faaletupe lenei e tapena ai le tulaga lea pei foi ona saunoa e ala i accommodation pe faapefea ona accommodate a tatou Malo le au taaalo. E tasi lea tulaga manaia pei ona saunoa lau fetalaiga Lauofo, o lo o tilotilo foi i ai le Pulega pe mafai ona faamatuu i tua i hotels. O se faiga fou ia a o le taua o le a sefe mai ai foi le isi tulaga foi lea o le toe fai o tatou faleaoga e faapena ona nonofo ai ona toe talepe lea. E tele a tatou tupe ua faamaumau i le tulaga lena. O lea foi la ua tilotilo totoa i ai po o fea se faiga e talafeagai ma lelei mo le tatou taligamalo. A o le tulaga lea pei ona saunoa i ai le sui usufono, ua matua lelei, ma ua mataituina foi e le Pulega ina ia faapena ona tino mai lea tulaga ma faaoga tatau tatou seleni i le auala e fai ai.

FOFOGA FETALAI: Ia, se i tulai mai le sui usufono mo le Itumalo Tu Taulaga Sisifo.

Afioga Faumuina Asi Pauli Wayne Fong (Itumalo Tu Taulaga Sisifo): Faafetai lava i lau Afioga i le Minisita. E leai sa afea foi i lau tuualalo foi lau Afioga, e le gata i lena sa tatalo atu foi po o lava lau tupe e fai ai lau taaloga, ou te talitonu o lea toe tasi le tausaga e le o toe mamao foi.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

Masalo na o se tuualalo, pe leai se tupe o i ina se i fesoasoani ifo i le footpath o Vailoa lea e sau mai luga e tau mai i, na malepe lava i le tasi tausaga ina ua uma ona fai, e pei e manaia ae toe... e lelei lau Afioga e tasi lava le upu, a e fai mai nei lava e fai, e fai nei lava. Ma le faaloalo lava lau Afioga.

FOFOGA FETALAI: Malo. Tulai mai lau Afioga i le Minisita, saunoa oe aua e te... aua e le o se mea e aafia i le...

Afioga Hon LOAU SOLA KENETI SIO: Ioe lau Afioga i le Fofoga Fetalai. Ae le afaina, o le tali se i tilotilo i ai pe talafeagai e pei ona e saunoa. O le tulaga o le lava ma le le lava, ua e faitau foi i le Tusi Paia i le fetalaiga a Iesu i i'a e tolu ma falaoa e fa? O lea ou te fai atu pe na e faitau ai i le Tusi Paia i le...

Afioga Faumuina Asi Pauli Wayne Fong: Lau Afioga i le Fofoga Fetalai, leaga e leai sou tusi tau Tusi Paia, a o lea ua fai mai e le fa e lima. Ae ala ona tatalo atu, o le popolega lea e i ai, i uma foi tou taaloga ae aitalafu outou i hotels. O le mea sili lena ona popole i ai le sui usufono lenei. Ma le faaloalo lava. Faafetai.

FOFOGA FETALAI: E kava uma lava e le faataoto lena.

Afioga LOAU SOLA KENETI SIO: Ioe, o le faataoto lena a Iesu, e tolu ia ma falaoa e lima. O le lima a o le fa lena. Aua tatou te faatuatua iti, a lea na fafaga uma le motu o tagata e toatele. E \$11miliona lea i le financial year lenei a o la e follow mai tua le isi mea lapoa i le isi foi financial year e faaatoatoa ai tatou taaloga aua o Iulai 2019, next year. Ia, o nai faleaoga o lo o talosagaina mo le kolisi o Alataua, o lena ua uma ona tali atu, o le kolisi lea is a must, e tataua ona fai, ma ua maumaututu faamaumauga e tataua ona fai se kolisi i le Alataua ona e vavamamao ma le mea e agai i ai le kolisi i Asau, ae talofa e i nai tamaiti. O lea la ua i ai le agaga o le Malo e ave i ai le latou faamuamua ina ia fai le kolisi lenei i le Paeaiga lenei. Ma o le tele lava o faleaoga na talosagaina, o le matou matafaioi a le Matagaluega, e alu atu le matou letter of support, e alu atu le matou asiasiga, tuufaatasi ma la outou talosaga e pei ona talosaga ai foi le Vaisigano, ona ave lea i le JICA o latou e faia primary schools, a o kolisi ma mea na, e gafatia lava. O le tele lava foi o isi tatou faalapopotoga e pei o Saina, Kanata, Amerika, o lo o galulue ai ia aua ne i mapu le tuitui a outou. E ave la outou talosaga faaopoopo atu i ai ma le lagolago a le Matagaluega e o faatasi, maua le tou faleaoga fou.

FOFOGA FETALAI: Malo faafetai.

Afioga Hon LOAU SOLA KENETI SIO: Ia, masalo lau Afioga na pau ia o le tele o mea na laga e sui usufono.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

FOFOGA FETALAI: Ia ua mea mea sa laga e sui usufono. Ae se i tuu atu le avanoa i le sui usufono mo Faasaleleaga Nu.4.

Afioga Peseta Vaifou Tevagaena (Faasaleleaga Nu.4): Lau Afioga i le Fofoga Fetalai, talu ai le mataupu lea lau Afioga i le Minisita sa tele i ai lau lauga i le aso ananafi, o le tulaga foi lea o le safety, o le puipuiga o le saogalemu i totonu. O se talosaga na tuuina atu i totonu o le tatou aoga faa-Aperenitisi. Silasila foi lau Afioga, o lea ua atoatoa uma matafaioi ma matata i totonu o le aoga lea, ae toe tasi lava le matafaioi lea o lo o misi i le tatou aoga, toe o se tasi e aoaoina le puipuiga o le saogalemu i luga o galuega. A silasila i le tele o tupe lau Afioga i le Faalapotopotoga o Tau i mo Faalavelave Faafuasei po o le ACC, tasi lea vaegatupe tele a le Malo o lea o lo o alu nei i le Tau i mo Faalavelave Faafuasei lau Afioga.

FOFOGA FETALAI: Malo. E sao sa taua i le saunoaga a le sui usufono, ae saunoa ia pe lavea i lou finagalo.

Afioga Hon LOAU SOLA KENETI SIO: O le Aperenitisi, o le mea tonu lava lena a le aperenitisi e fai, e fai le safety requirements o lo o aoaoina i totonu i le taimi lena e te alu ai e aoao le aperenitisi. Po ua maua mai e le sui usufono? O lona uiga la, o lona atoaga lava lena e i totonu o le aoga lea, e le toe i ai lava se isi aoga e sili atu ma le Aperenitisi lea ua uma ona fai ua matua atoatoa lava i ai requirements e agai i ai le tamaitiiti i le falefaigaluega.

FOFOGA FETALAI: Malo faafetai. Ia ai ua silafia e le sui usufono aua o le sui usufono foi o le Minisita Lagolago e malamalama i lau faapupulaga. Ae faaii maia le saunoaga a lau Afioga.

Afioga Hon LOAU SOLA KENETI SIO: Lau Afioga i le Fofoga Fetalai, e ese le lauga na aafia ai le matou aoga foi lea na....

FOFOGA FETALAI: Oi ia, se i tulai mai lau Afioga i le sui usufono mo Siumu.

Afioga Faalogo Iosefa Sopi (Siumu): Lau Afioga i le Fofoga Fetalai, leai na ona faamanatu i le Minisita le talosaga foi a lenei nuu i le faleaoga ma le malae faamolemole.

FOFOGA FETALAI: Ia tulai maia lau Afioga i le Minisita.

Afioga Hon LOAU SOLA KENETI SIO: E sao si ou uso o lea e mau i lalo o lau api le aoga a Siumu. O le aoga foi lea na faatamaia i le malaia, o la e la ua toe maua le tupe mai le insurance e toe fausia ai le latou faleaoga fou, o la e ua faapena ona gasolosolo foi fuafuaga ae vave ona fai le latou faleaoga fou.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaaauu i luga o le faitauga faalua – Aso 3**

O le malae ua matua atoatoa le malae i le taimi lenei. Ae a i ai nisi fuafuaga e fia faaleleia atili, ia o le a alu atu foi le asiasiga lau Afioga i le sui usufono.

Ia, na taua e le sui usufono mo Faleata Sisifo i le aso ananafi le matou faailoga foi lea na maua i le faaloia, ma na saunoa mai ai o lea e fia avea au ma ana loia. O le faalavelave, o le civil lea na matou faia, a o le moliaga o Leala, o le moliaga o le criminal. E le mafai la ona ou faia, e tatau ona alu ia Pau aua o Pau e i ai lona faailoga e fai ai.

Ia ona faagata mai ai lea i i o se faamatalaga lau Afioga i le Fofoga Fetalai. I le tapuaiga foi a si ou itumalo, malo le tapuai, malo le fai tatalo i le aufaigaluega, o lo o malosi lava le tou sui usufono, o lea tatou te feiloai lava i aso uma aso uma i le tatou itumalo, o lea tatou te usuina le pese lea e sau i le TV, I've been everywhere man. O lona uiga, o la e lava e silasila le itumalo ia Loau i aso uma. Faafetai i la outou fai tatalo ua manuia ai foi faiva o lo outou sui usufono aua le alo atu i le fonotaga ma tofi e pei ona tofi ai. Ia manuia le Fono.

FOFOGA FETALAI: Malo. Faafetai saunoa i lau Afioga i le Minisita mo Aoga, Taaloga ma Aganuu. Ua oo mai le faasologa i lau Afioga i le Minisita o Tupe e te malele ma saunoa i mea sa laga e sui usufono mamalu.

Ou te tapa lau Afioga i le Minisita o Tupe.

Afioga Hon SILI EPA TUIOTI (Minisita o Tupe): Faafetai tele i lau Afioga i le Fofoga Fetalai ua maua foi lenei avanoa e tali atu ai i nisi o lauga a sui usufono mamalu o le tatou Palemene i nisi o fesili sa laga. Ae fia tomua atu lau Afioga se faamatalaga i le tulaga o le tapenaina o le Tala o le Tupe. Na amata ona faatalanoaina e le Matagaluega o Tupe Matagaluega uma a le Malo ma Faalapotopotoga mo le tapenaina o le tatou Tala o le Tupe lenei, masalo o le masina o Novema i le tausaga ua tea, ona o le faaunautauga lava e tatau ona malamalama uma Matagaluega i le fesuiaiga i faiga faavae a le Malo e ono manaomia ai le toe fetuunai o le faasoaina o tupe ma toe talatalanoa ai foi i le tele o Matagaluega, pe le o i ai ni suiga talafeagai e tatau ona faatino e tatau ona toe fai i le faatinoga o a tatou galuega o lo o faifaiepa i aso taitasi, pe le tatau ona toe tilotilo i se tulaga e faafaigofie ai le faatinoga o galuega, pe tilotilo i le tulaga po o i ai le tomai po o i ai foi ma le capacity e mafai ai ona faatino galuega o lo o i totonu o le Tala o le Tupe. Aua o le mea mautinoa lava lau Afioga ma le mamalu o le Palemene, i tausaga uma lava, e ui ina faataatia le Tala Autu o le Tupe, o le tele o le taimi i le faaiuga o le tausaga, e le o faaogaina uma vaegatupe ia. O lea sa i ai foi le talitonuga o le Pule Sili ma le Matagaluega o Tupe ina ia faapea ona toe vaai totoa i le tulaga o talosaga a Matagaluega ina ia mautinoa e mafai ona faaoga uma nei tupe i le tausaga ma ia maua taunuuga ia na faatauaina ua ala ai ona faapena ona faasoa atu nei vaegatupe o lo o i ai. E tele ni fonotaga sa fai e le Matagaluega o Tupe faapea foi Matagaluega.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaaauu i luga o le faitauga faalua – Aso 3**

Sa maua foi le avanoa e mafai ai ona faatalatalanoa i le aotelega o fuafuaga a le Malo i le agai i luma i le tulaga o tatou faiga faavae, i le tulaga o le toe faaleleia o le auunaga, ina ia faapena ona tatou taunuu mai i le taimi ua faapena ona tuufaatasia ai le Tala o le Tupe lea ua i luma o le Laulau a Fono a ua i ai le mautinoa, e pasia loa e le Palemene ia faapena loa ona faatino, e faatino ma le mautinoa e uma le tausaga ua maua le taunuuga o atinae tetele a le Malo ia ma tatou galuega faifaiepa i le tulaga e tatau ona i ai. O le tele foi o taimi ia sa toe aamia ia nisi o faaululuga o Matagaluega ina ia toe omai e toe talanoa lelei ia malamalama lelei ma manino i le tulaga o le faataatiaina o talosaga mo tupe nei. Ia ma sa tilotilo foi i tulaga ia lau afioga e pei ona taua i le lauga o le Tala o le Tupe i vaega aupito i sili ona taua lea e ave iai le tatou faamuamua. E pei o le Matagaluega o le Soifua Maloloina ia faapea le Matagaluega o Aoga ina ia se i toe tagai lava i le tulaga lea po o fetai ia vaega ia e ave iai le tatou faaso. O le mea mautinoa lava e le mafai ona toe faaitiitia tatou vaegatupe ia ua tuuina atu i matagaluega tetele nei ona o le talitonuga o le tatou faamuamua i matagaluega nei ma auunaga nei o le a sili atu ona tele lona sao i le faatupulaia o le tamaoiga o le atunuu i tausaga o i luma. Ia aua foi a aoaoina lelei a tatou fanau ma maua le soifua maloloina ma le soifua manuia o tatou tagata o le a faapena i tausaga o i luma ona faaitiitia vaegatupe e alu i le tulaga o le tausiga ma le faatinoina o auunaga nei, aua o le a siitia le tulaga o le aoaoina o fanau ia ma le tulaga o le soifua maloloina. O le taimi lenei pei ona silafia, o se faataitaiga o le Matagaluega o le Soifua Maloloina ia o lo o tele a tatou tupe o lo o faaalu ai i le auina atu o le mamalu o le tatou atunuu o lo o gasegase i atunuu mamao ona e le mafai ona faatino auunaga na i totonu o le atunuu. E le o maua foi le tomai e tatau ona faatino ai nei galuega.

Lau Afioga ma le mamalu o le Palemene, o le tele o nisi auunaga na e le o mafai ona sustainable e le mafai ona tatou faaaauu pea le faatupeina. Sa fai le suesuega sa galulue faatasi ai le Ofisa o Tupe ia faapea foi ia ofisa sinia o matagaluega nei fesoasoani mai iai ma tatou paaga mai fafo lea sa faamatala atu ai i le lauga o le tala o le tupe ia nai suiga ma nai toe teuteuga o tatou faiga faavae ma le faatinoina o auunaga, ina ia ia faapena ona faaoga tatau ma faaoga lelei ia tatou vaegatupe ia ua tuuina i totonu o le tala o le tupe. O se iloilogia e tatau ona faaaauu pea aua atonu o ni suiga i le taimi lenei e **talafeagai ia a o le isi lua i le tolu tausaga ia ua tatau foi ona toe vaavaai pe** toe iai nisi fetuutuunaiga ina ia faapena ona agai i luma ia le tatou tamaoiga. Ia e faapena uma foi lau Afioga i le Fofoga Fetalai ma sui usufono mamalu o le Palemene ia tulaga i tatou auunaga i isi vaega pei o faatoaga ma faigafaiva. Ia faapena foi i feutanaiga o lo o faaaauu pea ma tatou paaga mai fafo i le faaleleia lea o tatou galuega tetele, o auala, suavai, eletise ia ma tulaga faapena i se tulaga e mafai ai ona tatou tapena lelei i le afaina o tatou i le fesuaiga o le tau.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafaoga faaaauu i luga o le faitauga faalua – Aso 3**

Atonu i totonu lava o le faasoaina o tatou vaegatupe o lo o maua i totonu e foliga mai e laititi le tupe, e le lava le vaegatupe e faatino ai ia nei vaega taua. Ae e pei ona taua foi i le lauga o lo o faaaauu pea ia tatou talanoaga ma tatou paaga mai fafo aemaise ia tatou paaga ia o le World Bank faapea ia le faletupe o Asia ia ma isi a tatou paaga. O latou na o lo o tele le latou fesoasoani ma latou tupe o lo o aumai ia i tatou, o tupe e aumai e le toe totoigiina. Ia manatua foi le tatou \$40miliona lea na maua mai i le Green Climate Fund ia ma ni tuutuuga mama ina ia mafai ai ona tatou tapenaina ma faaleleia tatou galuega tetele ina ia faapena ona aua nei tele se afaina. E le gata i le faaleagaina o nei aseta ia a o le tulaga foi o le afaina ai o soifua o tatou tagata pe a iai ni faalavelave faalenatura matuia e toe tupu mai i le lumanai.

Lau Afioga i le Fofoga Fetalai, ia e pei lava ona taua i le lauga o le Tala o le Tupe so o se Tala lava o le Tupe e tele lava ia filifiliga taua ma le faigata e tatau ona fai. E tatou te fesiligia po o a galuega e tatau ona ave iai le faamuamua aua o le mea mautinoa e le mafai ona tali atu i manaoga o tatou Itumalo ma le tatou atunuu, e le mafai ona faatupe i totonu o le tausaga e tasi. E pei lava ona masani ai ma le o le tulaga e tatau ona fai iai o le faataatia lea o le tulaga o le taua ma ave le faamuamua i nisi o atinae taua ae faatali mo le isi tausaga faaletupe e faapena ona faaaauu ai a tatou galuega. O le Sini Autu foi o le tatou lauga i le Tala o le Tupe ia o le filifiliga toa ma le filifiliga to'a, aua o lena sini o lo o faaaauuina ai pea le tatou feau na folafolaina atu i tausaga ua mavae ina ia mafai ona tatou tali atu i manaoga o le atunuu i le taimi lenei ma faapena ona tatou tapena se faavae mo se fuafuaga mautu mo le lumanai manuia ma le saogalemua o Samoa. E le gata i le isi 5 tausaga ae ua tatau ona tatou vaai mamao i le isi 20 po o le 25 tausaga. O le a le ituaiga Samoa tatou te mananao i ai? O le a le ituaiga o le tamaoiga tatou te mananao i ai? Le tulaga o le aoaoina ma le tulaga o le soifua manuia o tatou tagata? Ia ona tatou toe tilotilo mai lea i le taimi lenei ia e tatau ona fai ni suiga talafeagai ina ia oo atu ai i lena 20 tausaga ua mafai ona tatou aulia ia mea ia tatou te tapena atu i ai.

Lau Afioga i le Fofoga Fetalai ma le mamalu o le Palemene sa tele ni fesili i le tulaga foi lea faapea ua pau ia tatou tupe e faagaga mo tatou atinae. O le mea mautinoa lava ia ma o lo o manino foi i le Tala o le Tupe i pepa ia faaroma o lo o pito i luma o i ina o lo o auiliili ai ma faamanino ai ia nisi o tulaga ua alai ona foliga mai ua pau le tatou tupe faagaga mo le atinaeina o tatou galuega tetele. E le o pau ona faapea ua le mafai ona fai pe ua leai ni tupe, ua alai ona pau ona o lea ua maea ia le tele o tatou galuega tetele pei ona saunoa le afioga i le Minisita o Fesootaiga. E tusa e \$40miliona le tupe lea ua uma ona faaalu i le faataatiaina o le tatou Submarine Cable le paipa lea i le ogasami o fesootaiga ia lea ua uma masalo o le \$10miliona lea e totoo o le a faamaea ai ia nisi o galuega o lo o totoo o lenei tausaga.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

Ia e aofia ai foi ma le faia o se tatou sao i le vaega lea o le Manatua Cable, ia o lona na faamalamalama atu e le Afioga i le Minisita le tulaga lona ma le taua e tatau ai ona fai se tatou share po o se tatou equity i lona foi atinae. O lea e tatou fesootai ai ma Tahiti ma nisi atunuu ona o le tulaga e laititi se tatou tupe e tuu iai i totonu a o le taimi lenei tusa o Tahiti o le atunuu lona aupito sili ona maua luga le faaogaina e latou o le internet ma le technology i le vaiataimi lenei. O lona uiga la e laititi le equity e tuu iai ia ae o le a faapena ona fesoasoani ia mafai ai ona faatele atili le tatou capacity e mafai ai ona tatou fesootai atu i so o se atunuu. Ia ma faapena ona faafaigofie ma faataugofie ai fesootaiga ma le tau o tatou fesootaiga. Lau Afioga e tele nisi galuega ua maea ona faagasolo ia o nisi foi masalo ua toetiiti lava ni vaega e tatau ona faauma i le tausaga lenei lea e alai ona faafoliga mai le tala o le tupe faapea ua le lava le tupe e fai ai a tatou atinae ona o le tulaga lona. Ae o lo o faaauau pea lau Afioga i le Fofoga Fetalaia feutanaiga a le tatou Malo ma tatou paaga. O lo o i ai le tatou pipeline o le lisi o nisi o tatou atinae tetele o lo o faia nei ia feutanaiga ma nei paaga ina ia faapena ona faaauau ai pea ona faamalosi ma faaleleia atili le tulaga o le atinaeina o le tatou tamaoiga.

Lau Afioga i le Fofoga Fetalaia ia pei ona silafia foi i le lauga o le Tala o le Tupe le tulaga lea o le tatou tupe maua. I le tapenaina o le Tala o le Tupe e le i ausia ia le taunuuga o fuafuaga o lo o i ai ae o lo o faaauau pea. O le tulaga foi lea ua tatau ai ona tatou vaavaai pea i le tulaga o le faaoga lelei o vaegatupe o lo o i ai nei. E talitonu foi o le vaegatupe ua faaavanoa mo galuega a le Malo fuafuaina mo tatou atinae ma galuega fai o lenei tausaga ua lava ma totoe lea pe a fuafua i le capacity a le tatou vaega o le public service ia ma tatou vaega tumaoti mo le faatinoina lea o nisi o galuega e tatau ona fai. O le mafuaaga foi lona sa taua foi e le Afioga i le Palemia le tulaga o le toe tagai i galuega fai a nisi o matagaluega taua po o le Public Service Commission faapena foi i le Ofisa o le Tupe ia ma nisi matagaluega ina ia vaai pe iai se auala e mafai ai ona faaoga ia tupe ia i le taimi e tasi, i se taimi vave. Ia ma mafai ai foi ona faapena ona faamatuu atu nisi o faaiuga e tatau ona faatino e faaululuga o Matagaluega ma Faalapotopotoga. Ai ai le tulaga foi lea o le oversight monitoring and evaluation e faatino pea e matagaluega e i ai ia le Ofisa o le Tupe faapea le Public Service Commission.

Lau Afioga sa fesiligia e nisi o sui usufono le tulaga lea o a tatou tupe maua masalo lea sa fesiligia foi le \$6miliona lea e faamoemoe e maua mai i le tatou Matagaluega o le Soifua Maloloina. Mo le silafia e le o i ai ni fesiiataiga i le tau o auunaga, e pei ona silafia o le tausaga faaletupe lea i ai nei o le NHS o le SOE sa le i aumaia tupe i totonu o le Malo ae sa taofi e latou. O le vaegatupe la lea e \$6miliona sa tatau ona maua e le auunaga o le Soifua Maloloina i tausaga uma ma o lo o tumau pea ia lona fuainumera, e leai ni siitaga. O lea ua i lalo o le Ofisa o le Tupe latou te aoina mai sei faamaea le tulaga o le tuu faatasia o le NHS ma le MOH ia ona faapena lea ona toe tuu atu iai ia i latou.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

O le faafesili foi i le tulaga o tupe maua a le Malo mai le totogiina o lisi o fanua o le Malo. O le tulaga lea i ai nei e le o ni toe fetuunaiga o lisi a o le tulaga foi lea ua lelei tele le aoina mai o a tatou lisi o lo o i ai nei. I le agai i le lumanai e tatau lava ona toe tilotilo i le tulaga i le faatulagaina o nei lisi ina ia faapena ona ogatasi ma le tulaga o le value o nei fanua. Sa i ai le faafesili i le tulaga lea pe le o tele se sao o faatoaga ma faigafaiva i le tatou tamaoiga, pei ua tele i le tulaga lea o le trade ia ma le tourism....

FOFOGA FETALAI: Ia se i tulai mai le sui usufono mai Anoamaa i Sisifo.

Tofa Hon Laufo Fonotoe Nuafesili Pierre Laufo (Anoamaa Sisifo): Lau Afioga i le Fofoga Fetalai ua ou vaelupeina le lauga a le Minisita o Tupe ona e pei o au lea sa fesiligia le tulaga tonu lea o le faaupuga o le lauga o le faamalamalamaina o le Tala Autu o le Tupe, ona e pei e foliga mai e i ai se tupe lea e fuafua e aoina mai i le Auaunaga Faasoifua Maloloina e \$6miliona. A o lea la ua maua atu o le faamaninoga lau Afioga, e le o se tupe faaopoopo, e leai foi se siitaga i le tau po o totogi o le auaunaga. O le sao lea o le saunoaga a lau Aafioga? O lea ou te faitau atu i le faaupuga o lau lauga e pei e foliga mai o se tupe lea o le a aoina mai, pei se tupe fou.

Afioga Hon SILI EPA TUIOTI: Faafetai i le sui usufono mamalu mo le fesili, e faamaonia e le i ai ni fesiitaiga i le tau o auaunaga. O le tupe lea o lea sa aoina e le auaunaga o le Soifua Maloloina i lenei taimi, ia o lea o le a faaauau pea ae leai ni siitaga fou. E le o i ai foi se fuafuaga faapea e toe vaavaai i ai i tau o auaunaga.

Lau Afioga i le Fofoga Fetalai o lo o i ai foi ia le fesili sa fesiligia ai le tulaga lava lea o le sao o tatou faatoaga ma faigafaiva i le GDP. O lo o manino i le taimi lenei e tele le sao masalo ua uma aso ia sa oo i le 20% le malosia o le sao o faatoaga ona o le taimi lenei e le i diversify le tatou economy. O le taimi nei ua tele ia tatou pisinisi ua tele le tulaga i tatou atinae tetele i auala ma tulaga faapena ia ua faapena lava ona alu i luga ia ae ua faasolosolo lava ina pau i lalo ia le sao o faatoaga ma faigafaiva i le tatou GDP. Ae le aveeseina ai le taua tele lava ona faaauau ia galuega ia, o le tele o tatou oloa o lo o aveatu i fafo i le taimi lenei ia ma le toatele foi o le tatou atunuu o lo o faigaluega e le gata i faatoaga a o pisinisi o lo o latou faatauina ma gaosia ma aveatu i fafo ia oloa ia. Ia o lo o tele ai le sao, atonu e le o manino tonu mai po o le sao tonu o le matagaluega ae mautinoa lava ona o galuega o lo o fai i faatoaga ma faigafaiva lea ua faapena ona fesoasoani ai i isi sectors o le tatou economy. Ia aemaise foi le tulaga lea o le faaitiitia ai ia oloa taumafa ma isi oloa o lo o aumai fafo talu ai le atinaeina o le tatou atinae lea o tagata tafafao maimoa mai.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafaoga faaaauu i luga o le faitauga faalua – Aso 3**

Sa i ai le faafesili faapea e foliga mai i le faataatiaina o le Tala o le Tupe ua tele i le tulaga o totogi o le aufaigaluega ma isi mea ae ua le lava se vaegatupe e faatino ai galuega. Ia pei foi ona taua sa tele ia le taimi sa faatalatalanoa ai e le Ofisa o le Tupe sa i ai foi ma le Matagaluega o le Public Service Commission ma matagaluega i le tulaga lava lea ina ia faaitiitia le aufaigaluega. O lo o i ai le faiga faavae e amata i le Tala o le Tupe leni, o avanoa faigaluega uma e lei faatumuina i le taimi lea na tuu atu ai le Tala o le Tupe i le Kapeneta ua aveese uma. Ia se i vagana ai ia nisi o avanoa ia mo Deputies, ia e le toatele foi mo le taimi leni. Ae pei ona silafia e ese mai lava i tatou tupe mai le Ofisa o Tupe, ae tele foi ia vaegatupe o lo o mafai ona maua mai tatou paaga o lo o faatupe ai ia le faatinoga o galuega nei i le tele o matagaluega. Sa fesiligia foi le tulaga lea pe le tatau ona tatou tagatagai loa i tulaga ia o tupe fou, o new digital currencies. E pei ona silafia ua tele ina fai faasalalauga a le Faletupe Tutotonu ia sa fai foi ia faatalanoaga ma le tatou media e lapataia ai o tatou tagata ina ia matua faaeteete lava i le faaogaina o tulaga ia. Ai se i vagana ua fai mai ia le IMF ia ma le Federal Reserve a Amerika ma nisi atunuu maualuluga faapena i le lamatia ma afaina ai tatou, ae o le tatalo foi lena mo le taimi leni ina ia aua ne i o tatou vave faaogaina ia nei vaegatupe. Na saunoa foi le tele o Afioga i sui usufono e tuu atu ai pea le lapataiga lena ina ia tatou aloaloese mai ai ma ia faiga i le taimi leni.

Sa i ai foi ni faafesili i le tulaga i le tatou deficit e \$12 miliona o lo o i ai nei po o fea la le mea e faatupe mai ai? Mo le silafia lau Afioga i le Fofoga Fetalai ma sui usufono ia e faapea uma lava i tausaga uma e iai lava le tatou tupe lea o le deficit. Ae o le fuafuaga lena i le taimi leni ae a o faagasolo le tausaga e ono i ai nisi tatou tupe maua, aemaise o lo o taumafai pea lava i le tulaga lea pei ona saunoa foi nisi o sui usufono i le tulaga lea o le faamalosia o le aoina ma le totogiina mai o tatou lafoga. E le gata o lafoga mai pisinisi ma tagata taitoatasi ia ae iai le talitonuga o le a faapena ona toe maua nisi a tatou tupe faaopoopo i ai, ia ma nisi foi fetuunaiga o tatou galuega i ni fesoasoani mai fafo o lo o faatalanoaina i le taimi nei ina ia mafai ai ona tatou see ese ma le tulaga lea o se deficit ia a o se tulaga e maua tatou tupe faasili. E pei foi ona silafia le 2015/2016 ma le 2016/2017 ia sa fuafua lava o le tatou deficit e ova atu i le \$3.5 miliona pasene o le tatou GDP. Ia ae peitai o tausaga ia e lua ia na pa'u ai i lalo i le 1.7% ia faapena foi ma le 0.4%, o lona uiga e fua lava i le tulaga lea o le faaogaina tatau o tupe ma le matauina lelei e le matagaluega o tupa le faaogaina o tupe ia ina ia faapena ona mafai ona taofiofia ia tulaga ia tau deficit.

Lau Afioga masalo o le tele o nisi o saunoaga ia pei a na o le faafetai ma le faamalo mai i le Afioga i le Palemia ma le Malo mo le tatou Tala o le Tupe ma le faagasologa o tatou fuafuaga. Ia se i vagana ai ia fesili ia sa fesili ai ia nisi o afioga i sui usufono. Ia ae avea leni taimi e momoli atu ai le faafetai tele i lau Afioga i le Fofoga Fetalai faapea foi sui usufono mamalu o le Palemene.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafaiga faaauau i luga o le faitaiga faalua – Aso 3**

E tele ia fautuaga taua tele sa tuuina mai ia o le talitonuga lava ona o lo outou finagalo ina ia faapena ona tatou soosootauau i le tapenaina ma le fausia o le tatou Tala o le Tupe ma le faatulagaina o le tatou tamaoaiga ina ia faapena ona tatou maua pea se tatou tamaoaiga mautu, mauaa, alualu i luma ina ia mafai ona tatou tali atu i manaoga o si o tatou atunuu i nisi o galuega o lo o fia faia. Atonu o le taimi foi lenei e aveatu ai se manatu i le tele o sui usufono o le Palemene o lo o talosaga mai i tulaga tau auala galue ma le suavai ia e moni lava ae atonu o se taimi saunoa atu le Afioga i le Minisita o Galuega i na tulaga. Ia ae pei e iai foi si manatu i le saunoaga a le Taitaifono o le Komiti o Tupe i le aso ananafi. A fua i le tulaga o talosaga mo aualagalua ma tulaga faapena fua agai i le sao o faatoaga ia pei e foliga mai e le o feagai tonu le vaega lena. E pei foi ona saunoa ia le Afioga i le Minisita o Galuega, ia atonu e tatau ona fai muamua ia ni asiasiga ma tagai po o ai itumalo o lo o galulue ma faatau atu i fafo ma le maketi masalo o se mea amiotonu foi lena. Ia ae le aveesea ai foi le manatu atu o le tatou Malo ina ia faapea ona fesoasoani atu i isi Itumalo aemaise le tulaga i le fesuiaga o le tau ina ia faapena ona fai ni auala e mafai ai ona vave oese mai tulaga faapena.

Lau afioga e momoli atu le faafetai tele i fauluuluga o matagaluega o latou nei sa tiga ma fita i le tapenaina o le Tala o le Tupe. E tele foi le taimi sa feutagai ai ia ae talitonu o le tele foi o le taimi e talanoa ai ma fesili ma tali ia ua tatou maua ai se tulaga e taliaina ai le faataatiaga ua i ai. E le faapea o le a gata ai ii o le isi 6 masina e mafai ona tatou toe tilotilo i se tulaga o se Supplementary pe a faapea lea e iai ni galuega aupito i sili ona taua e tatau ona ave i ai le faamuamua ia ona faapena foi lea ona fai.

Lau Afioga i le Ffofoga Fetalai ia o si avanoa taua foi lenei e fia fai ai se faafetai mo le tapuaiga a lou itumalo i le susu o Feoi o le Talalelei, affio ma susu Tapaau, lau tofa i tuua le Falefia ma le Falesalafai ona o la outou tapuaiga a o feagai ai la outou auauna ma tofiga o le Malo ua tuuina mai i lou nei tagata faatauavaa. O la outou tatalo ma la outou tapuaiga ua ae manuia ai faiva e le gata i le tatou itumalo i galuega ua uma ona faatino ia aemaise foi o fuafuaga taua a le tatou Malo mo le atinaeina o le tatou motu i Savai. Ia ae faapena foi le tapenaina o le atinaeina o le taulaga ina ia maua pisinisi ma galuega mo tatou tagata. O le upu masani e le sili tai nai lo le tapuai. O lau tatalo ina ia faaosofia pea moegaluaga i le tofa paia a le Atua o utupupuina ai Feoi o le Talalelei aua o le finagalo folafolaga o le Atua. Ia maua le tofa tatala i le Tapaau le faautautaga loloto i le Falefia ma le Falesalafai, ia faamanuia tele le Atua i lo tatou itumalo.

Lau Afioga i le Fofoga Fetalai, faafetai mo le avanoa, faafetai i Afioga i sui usufono sa lauga ma apoapoai mai ma fautua mai i mea e faaleleia ai le tatou tamaoaiga ma le tatou Tala o le Tupe, soifua.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

FOFOGA FETALAI: Malo faafetai saunoa, ia ua maea le saunoaga a le Minisita o Tupe e tusa ai o mea sa laga e sui usufono mamalu o le Palemene. Ia ma ua oo mai le faasologa i le Afioga i le Tamaitai Minisita mo Tina ma Tamaitai, tapa ma le faaaloalo lau Afioga.

Tofa Hon FAIMALOTOA KIKA IEMAIMA STOWERS (Minisita mo Tina ma Tamaitai, Atinae o Nuu, Afioaga ma Agafesootai): Lau Afioga i le Fofoga Fetalai, faafetai tele mo lenei avanoa, e avea foi lenei avanoa e faatalofa ma faafeiloai atu aloaia i lau Afioga, faamalo atu aua le taitaiina foi o le Fonousu a le Palemene a si o tatou atunuu. E faatalofa atu foi i le paia o le Maota le Taitai o le atunuu le Afioga i le Palemia, le Sui Palemia faapea foi le aiga Minisita ae le gata i lea o le saofaiga a Minisita Lagolago ia aemaise ia sui usufono mamalu uma o le tatou Maota nei le Fonousu a Samoa.

E faatalofa atu foi ma avatu le faamalo ma le faafetai i le Susuga i le Tamaitai Failautusi o le Fono faapea alii ma tamaitai o le Ofisa o le Fono Faitulafono, o lo o faapena ona tautuaina ia Tualumaga a le Palemene i lea aso ma lea aso i taimi o fonotaga. Le paia mauuluga i Faauluuluga o Matagaluega ma Faalapotopotoga Tumaoti a le Malo o lo o tua atu iai feau ma galuega ma faiva i le faatinoga aua se manuia o Samoa ma ona tagata mo le agai i luma. E momoli atu le agaga faafetai ma le faamalo, faafetai faamalo le galulue.

Ia e faafeiloai atu ai foi ma faatalofa aloaia atu i le faafogafoga mai o le mamalu o si o tatou atunuu ia aemaise ai le faafogafoga tapuai O Le Ao Mamalu o le Malo ma le Masiofo, lau Afioga i le Sui o le Fono a Sui Tofia ma le Masiofo, le paia o Samoa i ona tulaga faalupe i le tapuaiga a Tumua ma Pule, Ituau ma Alataua, Aiga i le Tai ma le Vaa o Fonoti, nuunuu atu ia faatini o tausala o le a le oo i ai se faamatalaga aua o paia e le avea, e mai le vavau e oo i le faavavau.

E fia molimoli atu foi le faamalo ma le faafetai tele i le tapuaiga faafogafoga mai a le saofaiga o le Afaigaluega tofofi a le Atua i fatafaitaulaga e fia i totonu o Samoa o lo o nonomanu e ala i talosaga i le po ma le ao i aso taitasi. Ia aua le tapuaia o tatou faiva i feau ma galuega aua se manuia o si o tatou atunuu, avea lenei avanoa ou te faafeiloai aloaia ma ofo alofa atu ai i le faafogafoga tapuai mai a le paia o si ou itumalo pele o Gagaifomauga Nu.1. O le paia lava lea i le afifio o Sao e Fa ma le Aiga Sa Umalau, le Atipouniu ma le Faasau, lau fetalai i le Tulafale lau Fetalai Lavea na e mua i malae ma e te tausi vaatele aua le malae i Finao faapea le va ma le atunuu aemaise le mamalu ia Safotu ma Aiga.

E faatalofa atu foi i si o matou nuu i Manase i le susu o Taito ma ona Alo faapea le fetalai ia Tauasa. Lau Afioga i le Fofoga Fetalai, e faapito augafa le faatalofa ma le faafeiloai aloaia atu i le Afaigaluega tofofi a le Atua o lo o faafalelemalu ma faafaletulua i totonu o si o matou itumalo o lo o nonomanu ma fai talosaga aua lava le manuia o le itumalo faapea Samoa.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

I le susu o lau Susuga i le Toeaina ma le faletua, lau afioga i le Ositaulaga Patele Jerry faapea le susuga i le faafeagaiga Katoliko ma le faletua, le susu o lau susuga i le Sea o le Ekalesia Metotisi ma le faletua, lau Susuga Filipino ma le faletua i le Ekalesia i Manase, faamalo le tapuai, faamalo tatalo. E lagona lava e lo outou sui usufono le lototele ma le mafanafana, aua ou te talitonu o lo o toatele tagata o lo o tapuai ma tatalo mai a o lo o faapena ona sailiili manuia i Apia nei aua se ai o la outou tapuaiga.

Lau Afioga i le Fofoga Fetalai, i lenei itula, se i ou agai atu loa i nai faafesili sa faapena ona laga mai e sui usufono mamalu ma e le tele foi se taimi ou te iloa e alu ai, aua e toaitiiti lava sui usufono sa afea lenei Matagaluega, na o le faafetai ma nai fesili fia malamalama i polokalame a le Matagaluega. Ia o lo o ou faamaumuina na o le toaono lava sui usufono mamalu o le Maota sa afea lenei Matagaluega e aofia ai le sui usufono mamalu mo Lefaga ma Faleaseela, le sui usufono mamalu mo Safata Sisifo, le sui usufono mamalu mo Faasaleleaga Nu.1 aemaise foi le Afioga i le Tuiatua Faanofonofu, le sui usufono mo Faleata Sisifo, aemaise foi o le sui usufono mamalu le tamaitai faipule le Afioga ia Aliimalemanu, o le Taitaifono foi lea o le Komiti o Tupe a le Palemene.

Ia, amata mai le sui usufono mamalu mo Lefaga ma Faleaseela, o le faafetai pei ona ou faaalua e faafetai mai ai i le polokalame faamaite a le Malo o lo o taitaifono ai le Palemia, le polokalame foi lea o le ie Samoa ua toatele nuu ma afioaga o lo o faamanuiaina ai i faiva alofilima o tina ma tamaitai i lea foi polokalame. Na pau le tulaga sa tatalo mai ai le sui usufono o le tuuina atu lea o totogi po o siaki foi mo nai komiti, o lena ua maea ona tali atu le Palemia, o lo o i ai foi faiga faavae a le Ofisa o Tupe ina ia tuusao atu tupe, aua e toe saili mai i nisi taimi, a o le puipuiga o seleni ina ia tuusao i tusitupe a alii ma faipule, o komiti a tina, o faalapopotoga, ia atonu o lea e faafofoga mai le Minisita o Tupe ma le Matagaluega o Tupe, o tulaga lava na o lo o faapena, a o lo o galulue faatasi pea mo le tulaga faigofie e ono faaooina atu ai ia faamanuiaga.

O le sui usufono mamalu mo Safata Sisifo sa faapea foi ona faafetai mai i lea foi polokalame o le ie Samoa. Faamalo faafetai le lagolago. Ae sa fesiligia e le sui usufono le polokalame i le GDP, o le district development programme na o nuu ma afioaga ma itumalo taitasi po o afea e oo atu i i si o latou itumalo. Mo le silafia, atonu e avea foi lenei avanoa e faasilasila aloaia atu ai i le mamalu o le tatou Maota o lea ua maea itumalo e 17 ma o lo o faagasolo le galuega galuega felafaoi i Upolu ma Savaii e amata mai i le faatausiusiuga o Savaii e amata mai Falealupo e tau mai i totonu, faatausiusiuga o Aleipata faasolo mai Falealili se ia oo lava ina taunuu i le ogatotonu i nuu tu taulaga ma faamaea ai loa itumalo uma o Upolu ma Savaii. E faamalie atu ai i le sui usufono mamalu faapea le toatele o sui usufono o le Maota o lo o naunau mai po o afea e oo atu ai lea polokalame ia onosai mai ma lavapapale mai o lea o le a pasia le tatou Tala o le Tupe.

21 IUNI 2018

**Tulafono Tau Faaofi o le Faatatauina o Tupe Faaopopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

E faapena ona taumafai ai foi le Matagaluega, ma o le a fesoasoani tele lea e speed up ai le faagasologa o tatou polokalame ia ona faapena lea ona vave ona oo atu o lea foi polokalame aua lava le atinae o nuu ma afioaga po o itumalo taitasi. O le auga lava o nei mea uma pei ona faamaite e le tatou Malo ma ala atu i lenei Matagaluega, o le taumafai tatou te galulue faatasi le tatou Maota nei, le pule mamalu a alii ma faipule ma tatou nuu taitasi mo le atinae o so o se tafa aua le soifua fiafia ma le soifua manuia o tagata uma o si o tatou atunuu.

O le sui usufono mo Faasaleleaga Nu.1, na saunoa le sui usufono e uiga i Sui Tamaitai o nisi o afioaga po o pitonuu o le itumalo, ae faailoa atu ma le agaga faaaloalo tele, o lea toeitiiti lava faaiuiu se sailiiliga a le Matagaluega mo le tuuina atu o se faiga faavae ina ia laugatasia uma ai nuu ma afioaga o Samoa e tusa ai o le filifiliga o tofi nei o sui o nuu po o pulenuu e pei ona i ai i aso ua tuanai, o sui tamaitai o nuu faapea foi ma sui o le Malo mo se finagalo ma se faamaoniga a le Kapeneta ona toe faatino ai lea o nisi o talosaga fou mo nei tofiga e pei ona o lo o ua taatia mai i le tatou Matagaluega nisi o talosaga a nisi o sui usufono.

E fia faasilasila atu foi, o le tulaga o lo o faagasolo ai nei e pei o faamaumauga ou te alu atu foi au ou tau atu i le Matagaluega, o nuu mavae lava ia i le taatiaga o lo o i ai, e i ai lona pulenuu e i ai foi ma le sui tamaitai o le nuu. O le tulaga la lena e faagasolo ai, aua e i ai isi fevesiaiga e taunuu atu lea vaega i le ofisa i lea taimi ma lea taimi e avatu la latou faasea, ae faamolemole e faailoa atu, e le o aiaina e le Matagaluega po o le Malo e ala atu i le Matagaluega le filifilia mai o tofi nei o sui o nuu, sui tamaitai o nuu faapea sui o le Malo. O lo o filifili mai lava e ala i sainigalima o lo o tauaao mai e nuu mo latou tofi ia. Faatoa aapa atu le Malo e ala i lenei Matagaluega pe a i ai ni tulaga faaletonu e tulai mai e tusa ai o tiute e pei ona totofi ai tatou sui ia. Ma o le mea lava e tataua ona fai, ma a o faafofoga mai foi nuu ma afioaga ma o le mea sili o lea e faafofoga mai le mamalu o le tatou Maota, a i ai ni tulaga faapea i le lumanai, o le tatalo a le Matagaluga, a i ai ni faasea, aumai pea talosaga tusitusia e iloa ai e le Matagaluega po o le a le mea o tupu, ona aami lea e matou o le tofi, po o le sui tamaitai po o le sui o le nuu po o le sui o le Malo, tauaao i ai, silasila ane lau susuga, o le faitioga lea ua aumai i totonu o le tou nuu. Ia e tali tusitusia mai ma aumai le tusi aloaia e **malamalama ai le matou Matagaluega pe moni pe le moni faitioga ia e aumai** e fai i ai se faaiuga tataua a o le tulaga lena e le aiaina e le tatou Matagaluega le filifilia ma le tofia o tatou nuu ma itumalo. E faapena foi se tali atu i le sui usufono mamalu mo Faleata Sisifo e ui e le i taunuu mai le talosaga a ua maea ona ta talanoa, masalo e le o toe mamao se taimi ona talanoa lea e tusa ai ma le talosaga o lo o fia tuuina mai.

O le sui usufono mamalu i le Tuiatua Faanofonofu na saunoa faafetai mai foi le sui usufono e tusa ai o le polokalame lava le ao le GDP po o le atinae o nuu ma afioaga e pei ona sa galulue ai le aufaigaluega a lenei Matagaluega i si ona itumalo i le vaiaso ua tuanai.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaaauu i luga o le faitauga faalua – Aso 3**

Faafetai lava le lagolago mai i le taumafai atu a le Malo e ala atu i le tatou Matagaluega aua se lelei ma se manuia o itumalo uma o si o tatou atunuu. Peitai sa fesiligia le seleni foi o lo o faapena ona taumafai i ai le Matagaluega e tuuina atu aua le faatinoina o polokalame i le tatou talatalanoa lea i le mea o le fausiaina o taiala o atinae o nuu ma itumalo. E faasilasila aloaia atu ma e malamalama foi i ai le tatou Maota, ia o le seleni mo afioaga o lo o talimalo i le polokalame mo le fausiaina o taiala. Mo le itumalo o le Tuiatua i Saleaamua lea sa talimalo i le vaiaso na tea nei, ua maea ona totogiina atu pepa mo le totogiina atu o nai ia seleni i le Matagaluega o Tupe. O taiala ma faiga faavae a le Matagaluega o Tupe e ao ai ona totogi sao atu nei seleni tusitupe a le afioaga po o le Ekalesia po o ai lava, ina ia puipuia atili ai, ae talitonu le Matagaluega ua i ai i le vaiaso nei lea seleni e pei ona fesiligia i totonu o le tusitupe e pei ona tauaoina atu i le Matagaluega o Tupe. O le faamalamalama lea i le sui usufono mamalu.

Ia ma le sui usufono mulimuli sa afea lenei Matagaluega o le Afioga i le sui usufono mo Alataua Sisifo po o le Taitaifono foi lea o le Komiti o Tupe a le Palemene. Faafetai tele i le lagolago i le polokalame mo nuu ma itumalo, peitai sa faapea mai, ia o lea ua fausia taiala ma fuafuaga faataatitia ae po o fea e o e aumai ai ni tupe e faatino ai nei polokalame. Na ona faamalamalama atu e faapea, o le galuega a le tatou Matagaluega nei, o le taumafai lea e saili fesoasoani mai a tatou paaga mo le faatinoina o manaoga o lea o le a faaailoa mai totonu o a outou taiala mo atinae o itumalo. O lo o faapena foi polokalame o lo o faagasolo i le taimi nei o lo o faatupeina mai e le Malo o Ausetalia mo le atinae ma le faaaaupegaina o tina ma tamaitai o Samoa, le Samoa Women Shaping Development Programme, faapea foi ma le polokalame o lo o faapitoa mo i latou e i ai aafiaga tumau, le Samoa Disability Programme ae o lo o mafai ona fesoasoani mai ia polokalame faapitoa i le faatupeina o isi manaoga e patino i le atinae o tina ma tamaitai ma i latou e i ai aafiaga tumau pe afai o lo o aafia i totonu o le plan po o le fuafuaga ma le taiala lea ua i ai i totonu. Ua faapena foi ona faalauiloa atu mo le fesoasoani lava lea a le Matagaluega o lo o taumafai e faipaaga, ua i ai nei le maliega a le Matagaluega ma le Malo o Ausetalia, lea o le a amata aloaia i le tausaga faaletupe lenei 2018/2019 ona tuu uma atu lea o fesoasoani tau tupe i lalo o le polokalame i le ofisa o le Civil Society Support Programme po o le CSSP e faagaioiina atu ai le tuuina atu o fesoasoani i talosaga o le a tuuina mai mo le faatupeina, e faapena foi i nisi o fesoasoani tau tupe o le a maua mai i isi a tatou paaga mo le atinae lea o le a faaoga lava le faiga lea e auala atu i le CSSP. O lea faiga o le a agavaa tutusa ai ia nuu ma itumalo, e tusa ai o avanoa tutusa i totonu o fesoasoani nei. Ae ia faapena ona fesoasoani foi ia le Matagaluega i nuu, i itumalo taitasi, o lo o i ai ia pepa e faatumu, ia ma tulaga eseese e moomia i le talosaga lea, e galulue faatasi ai ia le tatou Matagaluega ma itumalo ua maea ia latou fuafuaga autasi, e tuuina atu mo le mafai ona secure mai o ni funds e faatupe ai nisi o manaoga o lo o ave i ai le faamuamua a itumalo taitasi, mai lea taimi i lea taimi.

21 IUNI 2018

**Tulafono Tau Faaofi o le Faatatauina o Tupe Faaopopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

Ia e pei ona pau ia o nai sui usufono na saunoa e tusa ai na afea lenei Matagaluega. Faafetai atu ai i finagalo faaalua, o le leai o nisi, ia atonu o lo o sologa lelei atu i o outou itumalo ae faamoemoe lava nei polokalame o lo o taumafai atu ai le tatou Malo e ala atu i lenei Matagaluega i le lagolago a lo tatou Maota i lo tatou galulue faatasi lea ma alii ma faipule o nuu o tatou itumalo, le itupa o tina ma tamaitai, ia o aumaga vaega eseese i so o se tafa o le itumalo, e faatino ma e fiafia e faafetai atu ai i le itumalo o Lefaga ma Faleaseela, ia o lea ua logoina mai ma ua ou tauaaoina le taiala mo le atinae o lea itumalo, malo faafetai.

O lea foi ua toe logoina mai au e le 17 lea, ua toeitiiti lava maea, fesootai mai, tatou faafesagai ma talanoa, po o fea e vave ona maua mai ai ia mea e faatino ai ia tatou polokalame. Ae e ala ona ou faafetai atu, o lea ua ou vaavaai atu i fuafuaga a Faleaseela ma Lefaga, ua le gata o lea e fesootai mai i le Matagaluega e tatala i le vaiaso lea e launch ai ia le latou plan, ae ua ou vaai atu, o lea ua ave ia latou tusi, i lea faalapotopotoga, i lea pisinisi, i lea mea o lo o latou silafia, e ono maua mai ai isi fesoasoani, e atili vave ai le atinae o nuu ma afioaga ia faamalo faafetai.

Ia o le galuega lenei a lenei Matagaluega, ae ou te le i nofo i lalo, ou te faafetai atu ai i le Afioaga i le Minisita Lagolago e ui ina nofo mai i Savaii ma tele ia feuaiga iinei o faapena ona lagolago malosai mai i le taumafaiga o lenei Matagaluega, e ui ina pei e laititi i le faafofoga a le atunuu, ae o le community atoa, o lo o focus i ai ia sa matou auaunaga la matou Matagaluega.

Faafetai foi i le Matagaluega, le Pulega ma le afaigaluega e ui ina toagaogao, ia ae o lo o faapena lava ona faagasolo le galuega a si o tatou Malo ia aua lava le soifua manuia o o tatou tagata. Ia ona faagata ai lea o se matou leo, avatu ai se matou tala e faapea, lau Afioaga i le Minisita o Tupe, ia faapea le Ofisa Sili, ia ma le Matagaluega o Tupe, malo le fai o le faiva.

O le tatou Tala o le Tupe, tuuina atu le lagolago a lenei Matagaluega, malo le galulue, faafetai e le faigofie ia ma le faasoalelei. Ia alofa mai le Atua e fesoasoani mai ia tatou ia ma le tatou faiga fefaasoai, ina ia manuia Samoa ma ona tagata, faafetai.

FOFOGA FETALAI: Malo saunoa, ua manino auofala ua leai se sui usufono e faalavelave, ia pe faauilavea i le saunoaga manino a lau Afioaga i le Minisita o Tina ma Tamaitai. Ua faapea foi ona oo lau faafetai i le lua vaa seelua i lau Minisita Lagolago, ia le sui usufono mamalu o Faasaleleaga Nu.3, ia ona o le tulaga o le tuu mai o le tauau e tu malosai e lagolago i le lua Matagaluega, ia o aua lea o aute.

Ia o a mea e fai e le Kapeneta, o tatou uma na. O galuega e fai e le Palemene e tuu mai tauau i lea itu o le Maota, e galulue e tulei i luma atinae a le atunuu. Ia aua seiloga e oo mai iinei ona faatoa faaali lea, ae galulue i tua e galulue foi i le Palemene.

21 IUNI 2018

**Tulafono Tau Faaofi o le Faatatauina o Tupe Faaopopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

Ua oo mai le faasologa i le Minisita mo Tupe Maua. Tapa ma le faaaloalo lau Afioga i le Minisita mo Tupe Maua.

Afioga Hon TIALAVEA FEA LENIU TIONISIO HUNT (Minisita mo Tupe Maua): Faafetai i lau Afioga i le Fofoga Fetalai mo le avanoa, e fai atu ai ni manatu aua fesili sa tuuina mai e le paia o le Palemene nei.

E muamua ona faatalofa atu i lau Afioga, susu o le Afioga i le Palemia ma le Kapeneta ma Minisita Lagolago, sui usufono uma o le Maota nei. Faatalofa atu foi i Faauluuluga o Matagaluega ma Faalapotopotoga o le Malo ua tatou faatasi mai, ae tainane le faafogafoga mai o Samoa atoa.

Lau Afioga i le Fofoga Fetalai e 11 sui usufono sa faaali ia o latou finagalo i Matagaluega e 2 o lo o i lalo o le vaavaaiga a le Minisita mo Tupe Maua. Amata atu i le Matagaluega o Tupe Maua lau Afioga i le Fofoga Fetalai. O nei manatu sa faaali mai i mea laiti, e pei o le x-ray o lo o i uta i Fagalii, o le matafaioi lena o le Ofisa o vaalele savili. Ma o le X-Ray lea o le Quarantine o le Ofisa o Faatoaga e ona le mea lea.

Ae o lo o faatino pea ia tiute o le Ofisa o Tiute i le suega e pei o ato o lo o malaga mai ma e o lo o malaga mai i Tutuila. O Tutuila lea e faaoga i ai le malaevaalele lea.

O le manatu foi e faapea e 4 itula e aumai ai se oka mai Niu Sila i le air freight ae 12 itula e kilia ai i tua e le Matagaluega o le Tiute. Ia e talitonu o lena e silafia ia faiga faavae, o mea ia o oloa e aumai i vaa-alalo, e 5 aso e taunuu mai ai le vaa i Samoa, ua i totonu o le Ofisa o Tiute ia le manifest o uka a le vaa lea. A oo mai ae fai atu imports ae kilia e le import entry ae le atoatoa mea ia, e faigata ona kilia mai.

O oloa nei e aumai i luga o le ea tulou, e tatau ona oo atu ia imports consignment i totonu o le Matagaluega i le 2 aso ae le i taunuu mai ia le vaalele lea. Ae o lo o faaoga foi i le tele o taimi e taunuu mai ai le discretion a le Tamaitai Pule, o lo o avatu ai talosaga mo le pre-release pe mafai la ona ave pea i tua galuega ia. Ae 20 aso lea e tuu mai e mafai ona submit atu entries ia i totonu o le Matagaluega, ia ae talitonu o le va, a faapea e tatau ona manaomia faavave release atu i tua oloa nei, ia e tatau ona atoatoa uma pepa o lo o manaomia e le Matagaluega.

I tai foi i le Ofisa o Tiute i le taimi nei, o lo o taumafai le Ofisa o Tiute ma o lo o taumafai pea, e 3 itula e tatau ona release mai ai i tua le import entry, 3 itula, e mafai ai ona ave, ona e tele foi le galuega e avatu toe kilia mai ma vaavaai po o atoatoa le entry, ia e 3 itula ia le matou galuega o lo o taumafai ia vave ona release mai entry, ia vave foi ona ave i tua oloa.

E tele foi galuega fou o lo o faatino e le Ofisa o le Tiute, e pei o le toe faa ea maluluina o le potu o lo o atu le mamalu o le atunuu ma le aufaipisinisi, e tele faitioga na tulai mai i le vevela o le tulaga lea, ia la ua i ai le potu malulu la ua i ai ma le TV, e faatalitali ai, a atoatoa ona maua uma atu ia entries nei i totonu o le Ofisa o le Tiute, vave foi ona aumai i tua.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

Ae 3 lava masina e tuu atu a le totogia le tiute, ia ua cease mai e le Ofisa o Tiute oloa ma faatautui.

O nisi o manatu o lo o faaletonu le aoina o le tamaoaiga o tupe maua. Ia e talitonu e.... Lau Afioga i le Fofoga Fetalai, ou te alofa i le paia o le afaigaluega, o lo o feagai ma le aoina o tupe nei. E tasi lava le auala e sue ai po o lelei, po o faaletonu le aoina o tupe nei, o tupe maua, o lo o mafai ona ao. A tagatagai i faamaumauga i le 5 tausaga talu ai, o lena e iloa ai le agai i luma pea o tupe o lo o mafai ona aoina mai e le Ofisa o Lafoga e te iloa i lea tausaga ma lea tausaga.

O tausaga e 3 na muamua atu i le 5 tausaga lea, e ui lava ina le maua le tapulaa na faamauina e le Ofisa o Tupe e tatau ona maua, ae e le o maua lava le faasiliga o le isi tausaga i le isi tausaga. O le Tala o le Tupe i le aoina o tupe i le 2015/2016, e \$5miliona na ova ai le ao a le Matagaluega lea i tupe faatatau sa tatau ona aoina. I le 2016/2017, o le tupe na aumai e fuafua mai e le Ofisa o Tupe e ao mai e le Ofisa o Lafoga, e \$491miliona i le tausaga. O le matatia na maua e le Ofisa o Lafoga i le taimi muamua, ua maua le \$501miliona, faatoa oo lea o se tupe maua a le Ofisa o Lafoga ua sili atu ma le afa piliona tala. E \$9miliona na ova ai le tupe na maua.

O le tupe lea e sue i le taimi lenei, na aumai e le Ofisa o Tupe, sii mai lava i le \$491miliona fuafua mai e ao mai i le 2017/2018, mo le 2018 e uma i le tausaga lea e uma nei ia Iuni, o le tupe ua mafai ona aoina mai e le Ofisa o Lafoga i le 11 masina ua \$459.6miliona le tupe ua mafai ona aoina mai, tusa ua 88% o le tupe e tatau ona maua i le tausaga faaletupe nei i le aso 30 o Iuni. E tusa e toe \$62.2miliona o lea e taumafai e ao i le masina lenei o Iuni. E ui la o lea e faapea mai e le i iloa le taimi po o le a foi le aofai e mafai ona maua i le faaiuga o Iuni, ae o le agaga lava ma le mafuaaga ai ona fai atu ia faamatalaga nei, ona o faaupuga sa aumai e tuutiitia ai lea faamaoni o le Komesina aemaise le afaigaluega o lo o faigaluega i le ao ma le po, timuga ma le la, e tutu i tumaga ma le la i tai, palapala le mea o lo o faigaluega ai, o le a? O le taumafai lava e sue ia le....

Tofa Olo Fiti Afoa Vaai: Lau Afioga i le Fofoga Fetalai....

FOFOGA FETALAI: Ia, o se mea e fia faasao? Po o le faamalamalama?

Tofa Olo Fiti Afoa Vaai: O lea lava lau Afioga i le Fofoga Fetalai.

FOFOGA FETALAI: Tulai mai le sui usufono mo Salega i Sasae.

Tofa Olo Fiti Afoa Vaai: E le fesiligia le tulaga i le auaunaga ma le tautua a le Matagaluega, i le tulaga o le aoina o tupe ia o lea foi e faamoemoe i ai e tatou Malo i a tatou atinae.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

Ae na mafua le fesili, o lea e pei e foliga mai, e faapea le mau a le Afioga i le Minisita, o faamaumauga o lo o aumaia i totonu o le Tala o le Tupe, lea foi na maua mai i se tasi o sui usufono mo Anoamaa Sasae.

A silasila lau Afioga i le mea lea ou te uuina atua, i le itulau faaroma e 7, o i ina na e breakdown mai ai ia mea uma lava na e aoina ai ia tatou tupe. A e silasila i ai, e tutusa lelei lava ia fuainumera sa tataua ona aoina i le tausaga faaletupe na tea atu nei, ia ma tupe ia o le a aoina nei e alu atu e tau ia Iuni.

O tupe o oloa e faaulufale mai e \$50.517milion, e tutusa foi ma le mea lea. O la matou la mau, e pei e foliga o le a le toe oo, e leai lava ma se isi lava lafoga po o ni oloa o le a toe aumaia i totonu o le atunuu, e amata atu nei ia Iuni e oo i le tausaga fou, pe afai o lea e aga tutusa ia fuainumera o lea e faatatau mai i le Matagaluega. E pei ona pau lava lena o le mea lea e tau avatu ai se faamatalaga.

FOFOGA FETALAI: Lea ua maua atu, se i tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielega: Lau Afioga i le Fofoga Fetalai, e faapena mo mea o le sauniga o nei mea o le Tala o le Tupe. E faavae lava i fuainumera o lea e limataitaiina ai, ae afai foi o mea moni na tutupu. E manatua foi la o mea ia o fuafuaga, o mea e taumatemate, ae faamoemoe le sao o le mate, i le vaai agai i tua, e pei lava o upu foi ia masani, a e vaai agai i luma, e te le mafai ona e malamalama i le agai atu i luma, seiloga e te vaai agai i tua. O lea la e faavae i luga o fuainumera e mautinoa, e faapena le tapenaina o Tala o le Tupe, e aumai mea e mautinoa. E mafai lava ona aumai nei le Tala o le Tupe faapea mai, e \$900milion o le a maua i le tausaga fou. E leai se mea e taofia ai ia ituaiga matemate. E manatua o lea e tatou te talanoa i mea o le a tupu i le lumanai, o tatou la e na ona taumate, ae tatou te tatalo i le Atua e faataunuuina. Ua e tatalo? Ua e tatalo? E te le faalogo i faifeau, o le tatalo lava lena a faifeau, e faataunuu, e fuafua e tatou ae faataunuu e le Atua. O le mea lea e leaga ai mo tagata e leai ni tofi. O le tulaga la lea, o lea e avatu mea o faamaumauga e faavae i mea na tutupu, e mulimuli i le mea foi lele, o mea na tutupu e toe tupu foi. Ae tatou te faalagolago la i le alofa tunoa o le Alii, e leai ni afa e tutupu mai, e leai ni tagata amioleaga e o e faatumu sese a latou pepa i tai i le tatou Ofisa o Tiute, aua e i ai lava tagata amioleaga, aemaise lava tagata faipisinisi foi lele, ua iloa uma mea o auala piopio e fai. O le ala lena o lea e aumai ai masini ina ia aua ne i toe sao ni mea faapea. O oe lava lea sa e pito i faitio, ia o le a e faitio lava oe o lena e te faia o lea e avatu au pepa i tai, o le umi ia o le taimi e sau ai le vaa, e na o le fax mai lava o le pepa i i taunuu i i, e mafai lava ona ave au pepa i tai, ia o le tulaga foi lena e tuai ai ona aumai i tua, e faapena foi ma le alii lea o le sui usufono mo Itumalo Tu Taulaga Sisifo.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaaau i luga o le faitauga faalua – Aso 3**

O outou nei e fai a outou pisinisi tou te o e fesoasoani i tagata, a o isi ia mea e fai e tagata, e faaumi lava le taimi e nofonofu ai, ia ma faafaulai ai lava le anoano o pili i nai tagata ma outou faaee atu ai ma isi mau tau i luga o le tagata o lo o faalagolago ia te outou. A o lea tou te iloa lelei lava tulafono. Na ona aluese lava o le vaa sau le fax mai o, tau mai, o mea ia o lea e avatu. O le mea foi lena tou te faiaga ai tou te o i o, ae taunuu mai le vaa faatoa tou o i tai, o le ala lena o lea e tuai ai mea a tatou i tai, ma tuai ai ona saosao ia fuainumera, talu ai le tele o tagata nei e fesoasoani i le aufaipisinisi, ae le o saosao ona faia a latou galuega.

Lau Afioga i le Fofoga Fetalai, o le fesoasoani atu lena i le mataupu o lo o laga nei. O lea foi o le a toe tu mai le sui usufono mo le Itumalo Tu Taulaga Sisifo ia ua uma lava ona tali atu i ana mataupu.

Afioga Faumuina Asi Pauli Wayne Fong: Lau Afioga i le Fofoga Fetalai....

FOFOGA FETALAI: Malie le sui usufono, malie le sui usufono se i onosai mai lava, onosai mai lava le sui usufono mamalu. E faapena o le faamalamalamaina o se mataupu ina ia faapena ona manino ma malamalama lena itu o le Maota, o le ala lena o le oo o le saunoaga a le Afioga i le Palemia ia ma taua ai ia nisi o suafa, ina ia manino ai ma malamalama ia lena mataupu leaga e le faigofie le faiva alofilima o le Minisita, e le gata foi i le Minisita a o le Komesina ma le aufaigaluega, o isi foi tupu ma ee o le atunuu o lo o galulue i le ao ma le po, po ma le ao. Ia ae faapena ona latou aumaia le mea e aupito sili ona taua e oo ai foi lo latou taumafai aua galuega a le Malo ma tulaga o lo o i ai. A taunuu mai la ia i tatou, ia alolofa sui usufono mamalu, tau mama foi le saosao aua e le faapea o ni Initia lea latou te faia, leai o isi foi Samoa, e a tatou nei, ia ae a latou foi taeao.

O le mea la lea, aua ne i afea i so outou finagalo le saunoaga a le Palemia, ona ua manatu lava e faamalamalama le tulaga o vaiiliu o lea e mafua ai ona outou fesiligia. E faamalulu atu i le sui usufono mamalu, leaga a tatou toe foi loa i tua, ona toe tuu foi le avanoa i le Malo....

Afioga Faumuina Asi Pauli Wayne Fong: Lau Afioga i le Fofoga Fetalai leai na o si tamai mea la lea.

FOFOGA FETALAI: Ia e malie mai, se o oe o le Faumuina e le o se mea laitiiti.

Afioga Faumuina Asi Pauli Wayne Fong: E leai se mea o le a aafia ai fua au i le fesili a le sui usufono o Salega Sasae.

FOFOGA FETALAI: Ia faafetai. Ia saunoa ia.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaaauau i luga o le faitauga faalua – Aso 3**

Afioga Faumuina Asi Pauli Wayne Fong: O lea sa ou lauga i o i le Afioga i le Minisita e uiga i le process o le faiga o tiute, aua afai o le sau o le vaa, e le o toe faaaogaina ni fax i le taimi lenei, o lo o faaaoga le computer, ae a oo la ina faaletonu le computer a le Samoa Air Ways i le malae vaalele, ia ua oti atoa le uta na sau ma le vaa. O lea la e faamalamalama atu ai i lau Afioga, e leai, e mamao lava le sui usufono o Salega Sasae ma au i le....o le tulai atu lea lau Afioga.

FOFOGA FETALAI: O lea ua maua atu.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, ia o le mea lena o lea na ou tulai atu ai, ia o lea la ua tuuai i le Samoa Air Ways. Ae o le a la le mea e tuuai ai fua i le Matagaluega? Afai o le Samoa Air Ways, ia o le Samoa Air Ways lea faatoa lele nei? Afai e faaletonu le Air New Zealand, ae o le a la le mea e faitio ai fua i le....ua fia itula o tutu i tai, ia se i vaai i le umi o le lauga, e te lele mai Niu Sila toe sau i inei toe alu i o, a o lea e tutu le tagata e ave i tua, a o lea ua iloa nei, o le faaletonu o computer a le vaalele. Ia ae o le a saga pu pu ai lava ia lauga e pei e atagia ai le faaletonu o le Matagaluega? Se e lelei lava le faitio foi lele, ae tonu le faitioga.

FOFOGA FETALAI: Malo. Leai ou te faamalulu atu ou te le tuufaua le mataupu lenei, leaga ou te le manatu i se faafinauga e tulai mai. Leaga o tatou Tulafono Tumau, e leai se faafinauga e faia i totonu o le Palemene, leaga o la e tapuai mai o tatou itumalo ma le atunuu. O le mea la lea, tautuana ma le sui usufono mamalu, e i ai foi le taimi e le ola ai le fana uila o le vaalele ia, e faapena. E i ai foi le taimi e faapea ai o le EPC ae leai ua soa e se taavale se poumoli, ae faamalulu atu.

Tulai mai le Minisita e faaaauau le saunoaga.

Afioga Faumuina Asi Pauli Wayne Fong: Lau Afioga, leai o le mea e fia faasao...

FOFOGA FETALAI: Se malie ia le sui usufono, e mamalu le Nofoa....

Afioga Faumuina Asi Pauli Wayne Fong: E pule le Ofisa o Tiute i le Ofisa o le Samoa Air Ways, aua o latou e tuu i ai ia le cargo lea e sau, a oo loa ina faaletonu, e i ai le gaoioga e fai

FOFOGA FETALAI: Ia alofa ia aua silasila, e le mafai ona....

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o le mea lea ou te faamanatu atu, o le upu faaiu lava o le Malo, o le upu faaiu lava o le Malo. Afai la o le Samoa Air Ways lea, o le a la le mea e tau ai fua? O le mea la lene a sau loa i le isi mataupu, e le mafai lava ona nofonono le Malo, e i ai le upu faaiu.

FOFOGA FETALAI: Malo faafetai. Ia tautuana ma sui usufono mamalu, o le....o le soifuaga tatou te i ai, o le mamalu o le Palemene lene e i o outou aao, aua ne i tataia le tatou Palemene pei o Palemene i fafo. Ua outou silasila i ai, a tatou malaga i fafo, e toetiiti lava paia le fofoga o le isi sui usufono i le lima o le isi sui usufono. Aisea? Leaga e leai se latou aganuu. A o tatou o lene e i ai le tatou aganuu o lea e faafoe ai le tatou atunuu o lea foi e faafoe ai le tatou Palemene. O le mea la lea tautuana ma le paia o le tatou Palemene, o la e faafofoga tapuai mai Samoa.

Ia tulai mai lau Afioga i le Minisita.

Afioga Hon TIALAVEA FEA LENIU TIONISIO HUNT: Faafetai i lau Afioga i le Minisita, faafetai foi i le uso, taatia maia i le matai lea o Taatiamai se i vaavaai i ai le Matagaluega.

Lau Afioga i le faapea mai o lo o tutusa le....ia o uiga lava ia o le Tala o le Tupe, o uiga foi ia o Estimate a le Ofisa o Tupe, vaai foi i le fuafuaga a le Ofisa o Tupe lea na aumai i le tausaga lea na matou toe sue atua le \$491miliona, o le actual na maua e \$501miliona, sese, o le faiga lava lea, e alu i luga, alu i lalo. Talosia ia maua le matoau \$521miliona lea e sue nei po o le \$528miliona, leaga a tuu i le faaopoopoga lea e maoae ia o le siitaga mai o le Ofisa o Tupe le tupe e matou te aoa mai i le tausaga lea o le a faaiu, \$28miliona le faaopoopoga, talosia lava ia maua mai, e moni lava o lea e te fai mai e \$520miliona....

Tofa Olo Fiti Afoa Vaai: Lau Afioga i le Fofoga Fetalai, e laitiiti lava si mea e fia faasao.

FOFOGA FETALAI: Ia e faamalie atu i le Afioga i le Minisita, o aiatatau lava a sui usufono, ina ne i tuuaia foi le Nofoa.

Faapuupuu mai lau Afioga le saunoaga.

Tofa Olo Fiti Afoa Vaai: O le manaia ia o le saunoaga lea a le Afioga i le Minisita, pe a na faapea e aumai i luma i i le saunoaga le la. E manatua foi lau Afioga i le Minisita, o ou Estimate o le tausaga lenei e base i luga o au actuals ia ua tea. Ae a tilotilo atu nei i au mea ia e aumai, e tutusa lelei lava, e matua valavala i Sini. O le ala lea ua ou tulai atu ai, e faasao atu le mea lea e aumai i totonu i i o le mea foi lea....

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaaauu i luga o le faitauga faalua – Aso 3**

FOFOGA FETALAI: Ia o lea ua ou maua atu. Malie le sui usufono, e manatua foi, na ona faamanatu atu, o le a le faamalamalama a le Malo, o i ina le faamalamalama e limataitaiina ai ia le faapupulaga o mataupu o le Palemene. Leai e tofu lava i tatou ma le faauigaina, o le mea foi ua 30 tausaga o sui usufono, e tiga lava o se mea o lea ta te iloa, ae e limataitaiina i le faamalamalama a le Malo, ioe, aua afai e tulai mai se faafinauga, o lona uiga e alu le aso lenei o tau faamalie lou finagalo. Ae a aumai loa le faamalamalama a le Malo, ave lena mo tatou i lenei aso. E pei o le matou fesoasoani atu lea.

Susuga Hon Tuilaepa Auelua Fatialofa Lupesoliai Lolofietele Neiotei Aiono Galumalemana Dr. Sailele Malielegaoui: Lau Afioaga i le Fofoga Fetalai, afai e le i maua mai e le sui usufono, ia o lea o le a ou toe faaupua atu i le isi faaupuga. O faiga ia o faautautaga tatau, a o le faautautaga tatau, e fai ai galuega. O le faautautaga e aupito i potu e faavae fuafuaga o le agai atu i le lumanai i mea ia na sau ai i le tausaga ua tuanai. Ae afai e alu alu, ona i ai lea o se faaopoopoga ua tele se faaopoopoga. A lea e i ai le tatou Tala Faaopoopo o le Tupe e toe fesui ai kia o le tatou taavale. E faapena le faiga o mea. Ua leva ona taumafai le tatou Malo e tasi lava le tatou Tala o le Tupe, e tasi lava i le tausaga atoa. A taoto loa ia fuafuaga mo le tausaga atoa mai le masina o Aperila, Me, Iuni, aua ne i toe suia le Tala o le Tupe. O le a le mea e tupu? A tatou faia le mea lena o lona uiga, e tatou te le o i le lalolagi, e ese le paneta lea tatou te i ai. Aua e le mafai ona tatou iloa le mea e tupu. Ua ou manatua, o le Tala o le Tupe lenei e alu atu lava nei ia Iulai e tau ia Iuni o le tausaga fou. A tatou oo atu la ia Tesema, Ianuari, Fepuari, Mati, e ono oso i ina ni afa. O le tulaga la lena e le mafai ona tatou iloa. A oo la ina oso le afa i ina, o lea e mafai ona tatou feiloai ai fonu ai i taimi ia, a i ai la ni tupe faaopoopo, o i la le avanoa e mafai ai ona toe fai le isi Tala Faaopoopo o le Tupe. O isi tausaga e tolu Tala Faaopoopo o le Tupe. O lea ou te talanoa atu i le taimi lea a o ou Minisita o Tupe, tolu Tala Faaopoopo o le Tupe, ina ia faaopoopo ai pea seleni e mafai ona tua i ai le Malo.

O le amataga maiga o le tatou Tutoatasi, sa na o le 1% le tupe sa mafai ona faalagolago i ai le Malo e mafai ona pulea le Malo i lalo o le faavae, e le mafai ona sili atu i le 1% o le Tala Autu o le Tupe, o le mea lena e mafai ona pule ai le Malo e faaoga i ni faalavelave tutupu faafuasei, ae le i faatagaina e le Palemene. O le ala lena sa faaigoa ai le mea lea, tupe le faatagaina. Ona sau sau lea, tupu ae le manatu, e le taitai lava le pasene lea e tasi, aemaise pe a oo i le taimi lenei ua fesui ai le soifuaga ua tele mea e tutupu, tai pei le Tsunami lea na oso, na oso ia Setema i le aso 9 i le 2009. Ia e faigata tele ona valaau faatopetope se fonu i tulaga faapenei. E i ai tausaga e tulai mai ai faaletonu, na ona tulai mai lava, alu ma le fonotaga, ona fai lea o le iuga e le lava le tupe ae tipi le 10% right across the board, ia na tipi a le 10% aua e mafai lava ona fai le Tala Faaopoopo o le Tupe e pasia ai se Tala o le Tupe.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

E le alu agai i luga ae alu agai i lalo, ona toe faatulaga uma ai lea o alatupe, e toe aumai isi mea na ave i ai le faamuamua, aumai i i e fai ai mea ia e moomia i se tulaga o emergency i se tulaga faatopetope.

Lau Afioga i le Fofoga Fetalai, o le tulaga lea ua ou toe tulai atu ai i le tu soo mai o le sui usufono, o le faiga lea e fai ai e le Matagaluega o Tupe ia le tatou Tala o le Tupe e faavae i luga, o le faautautaga tatau.

FOFOGA FETALAI: Malo faafetai. Ona e talu ai ona e fai si umi o le tapenaga ma e tele foi ia saunoaga a sui usufono mamalu e maitauina o lo o faamaumauina e lau Afioga i le Minisita o Tupe Maua, ona i ai lea o le manatu, ona o lea ua tatou taunuu i le tatou malologa masani aua foi le taumafataga o le aoauli ma se faasiliga malosi. Ia ona faapea ai lea, ia e faamalulu atu foi i sui usufono mamalu o lo o tutulai mai, o uiga lava ia o le tatou galuega e faapena e felafoai faapena. Ia ae ia outou alolofa, e mamalu foi le Nofoa, ia ona o lo outou faamamalu mai ma lo outou agalelei e fesoasoani mai ona maua ai foi lea o se manatu e tuuina atu ai avanoa.

O le mea la lea afai ua paopapa foi pe ua taugalemalie se taumafai atu a le Nofoa, ia ae faapena o uiga ia o le soifuaga e malu lava i lo outou mamalu le Palemene. Sui usufono mamalu e, e faapena, e faapena foi i saunoaga a Minisita, leai aua a tatou tulituliafoe nei lava pe sese le a ma le e, pe sese faafefea, ia e faapena, ona tatou le taunuu lea i se taunuuga lelei ia ae tatou taunuu i le.....aua e saililili masei loa le tofa a le tagata, o lona uiga ua faauo o ia i le fetotoai ma le tiapolo, ioe, o le tagata lava e fuafua ma tapena, a o le faiva alofilima o le Atua o le faataunuina o tatou faiva ma tiute. O le mea la lea, aumai e le Atua tupe e tele e faatino ai le faamoemoe.

O le mea la lea o le a faataatiaese Galuega a le Fono Aoao Faitulafono mo lana malologa e tatou te toe amata pe a ta le itula e 3:00, faafetai.

Na faataatiaese Taualumaga a le Fono Aoao i le itula e 1:00 i le aoauli.

Na toe faaauau Taualumaga a le Fono Aoao Faitulafono i le itula e 3:00 i le afiafi.

Na toe faaauau Felafolafoaiga i le faitauga faalua o le Tulafono Tau Faaofi o le Faatatauina o Tupe Faaopoopo (Nu.2) 2017/2018 ma le Tulafono Tau Faaofi o le Faatatauina o Tupe 2018/2019.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

FOFOGA FETALAI: Ou te faasilasila atu ua toe amatalia nei Galuega ma Taualumaga a le Fono Aoao Faitulafono.

E faia le tatou malologa o saunoa lea Afioga i le Minisita mo Tupe Maua. Ia ma ou te tapa ma le faaaloalo lau Afioga i le Minisita e te tulai mai e faaauau lau saunoaga.

Afioga Hon TIALAVEA FEA LENIU TIONISIO HUNT: Faafetai i lau Afioga i le Taitaifono, o lea foi ua talii mai le faasiliga malosi a le tatou Palemene nei i le afio o lau Afioga, aemaise foi o le Taitai o le Malo ma le Kapeneta ma Minisita Lagolago ma le paia o le Palemene aemaise ia Faaululuga o Matagaluega o tatou faatasi aua le Fonotaga i lenei itula o le afiafi.

Lau Afioga i le Fofoga Fetalai, ou te talitonu o lena ua faamalamalama e le tama o le atunuu nisi o faamatalaga ia ae o nisi mea e toe fia faamalamalama laitiiti i le Matagaluega lea o Tupe Maua. Afai e sao le itulau o le Budget lea ou te vaai iai i le itulau e VII faaroma, ia e talitonu o i ina lea sau ai faapea ua tutusa a le tupe o le a koletii i le tausaga lenei ma le tupe na fuafua i le tausaga faaletupe lenei o le a maea. E \$520miliona lea faamoemoe e koletii atu nei i le amataga o Iulai seia oo ia Iuni o le tausaga fou ae \$518 lea faamoemoe e maua nei i le faaiuga o le masina nei pe a maua. O ia uma fuainumera o estimates uma, lea e tusi mai ai lava i luga i i o estimates e le o ni fuainumera mautinoa ma faamauina ua maua. E pei la o fuainumera ia na tau atu nei i le faamalamalama o le tupe lea ua mafai ona maua mai i le taimi a lenei mai ia Iulai o le tausaga na te'a nei e oo mai ia Me o le tausaga nei ua \$459.6miliona o tupe mautinoa na ua maua, e le o ni estimate. Toe \$60miliona la lea e totoo e koletii mai le aso 1 Iuni seia oo i le aso mulimuli o Iuni. Ia a o le tupe lea ua faapaseneina ua 88% o le paketi sa faamoemoe matou te aoina lea ua mafai ona ao talu mai ia Me. Pe oo atu i le faaiuga o Iuni e le i maua le \$518miliona lea matou te sueina o le mea ua oo i ai le malosi o le matagaluega, e faatoa iloa ai i ina le tupe sao e mafai ona ao e le matagaluega. E oo foi la i le tupe o le tausaga fou afai e ao atu e le matagaluega e ova ma le \$530miliona ia o le tupe a lena ua mafai ona ao. E fuafua foi tupe maua a le matagaluega i galuega tetele e fai i totonu o le atunuu, o le aufaipisinisi i oloa e mafai ona lau mai. A fai galuega tetele ua tele foi oloa a pisinisi e mafai ona faaulufale mai i totonu ia ma maua ai foi le tiute a le matagaluega o Tupe Maua. E oo foi la i lafoga, lau Afioga i le Fofoga Fetalai manatua foi o le Ofisa o Lafoga e i ai le mea foi lea e ta'u o le tax credit lea e ave mo Hotels ma le aufaipisinisi lea e invest i totonu o Hotels. E oo mai i le tausaga lenei e \$71.5miliona lea ua alu i le tax credit lea mai le tupe tele lea ua \$36.7miliona ua uma ona faaoga. Ua uma ona totogi ai ia lafoga a pisinisi nei ua invest i totonu o Hotels sa tataua ona totogi mai i totonu o le Ofisa o Lafoga a o lea ua totogi ai latou lafoga ma fai ai investments nei i Hotels ona o le naunautaiga o le Malo e lagolago ia Faletalimalo.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaaauu i luga o le faitauga faalua – Aso 3**

O le tupe la e le o faaaogaina e \$34.7miliona ma o lea o le a faauma le fesoasoani lea a le Malo i Faletalimalo i le faaiuga o le masina leni o Iuni e le toe mafai ona toe taliaina ai ni talosaga fou. A o e lava e oo atu i le faaiuga o Iuni ua i ai latou investments i totonu o Hotels nei e faaoga ia pau na o latou e faaaauu mo le isi 5 tausaga. A uma le tausaga lea lumanai lona uiga o le 2023 e le i uma ona faaoga latou investment nei ia ona soloia loa lea e le mafai ona toe faaaauu ai pei o le mea sa sau ai i le 2001 po o le 2003 i le amataga o le tulafono sa tuulua e leai se tausaga e faagata ai le faaaogaina. Ae na sui i le tausaga na te'a atu nei ia Iuni foi i le 5 tausaga e faaoga ai tupe nei e invest. Ia o lea e totoe aso e 10 o le masina leni e leiloa pe oo atu iai ua \$50miliona le \$34miliona lea e invest i totonu. O tupe ia o tupe a le Malo, o tax ia e tataua ona totogi mai i le Malo a o lea ua ave e fesoasoani ai i le atinaeina o le tamaoiga i le itu tau Tagata Tafafao Maimoa Mai Fafu. O le agaga foi lena ou te talitonu na alai ai ona fai e le Malo le vaalele e auu faatasi i le taumafaiga aua o lea ua talitonu lava o Tagata Tafafao Maimoa Mai Fafu o le poutu o le faamoemoe o le tatou atunuu.

Lau Afioga i le Fofoga Fetalai e momoli le faafetai i Ekalesia ia ua lesitala mai ia Faafeagaiga. O le matou taamilosaga sa agai i tua e faatalanoa le tulafono e 548 Faifeau tausi nuu sa matou asia ma faatalanoaina. E oo mai i le aso i le ananafi, ua 346 ia Faifeau o Ekalesia eseese uma lava e 35 e le 34 la pei o le saunoaga a le tama o le atunuu e 34 o lea e atoa lelei Ekalesia e 35 ona o lea i ai isi Faifeau EFKS ua uma ona lesitala mai. E pei foi lava ona saunoa se tasi o sui usufono ma faatusa au pei o tala a tamaiti, o le malovalea po o le malo faavalevalea. Ia po o le a lava le ituaiga malo, se faafetai, faafetai o la ua tofu sao le atunuu i le tamaoiga, e mai lava ia Ianuari e oo mai ia Iuni ua \$52,242.62 le tupe ua maua mai i le saofaga mo le tamaoiga a Faafeagaiga. Pe malo a la pe faavalevalea, ua \$52,242.62 lea ua maua mai ua tofu sao uma tagata o le atunuu sa le mafai ona maua, pe sene pe a, a o le tupe faaopoopo maua mai sa le masani ona maua a o lea ua maua. E momoli ai le faafetai i Ekalesia uma, e ui lava e leai sau tala i le isi vaega a i latou ua lesitala mai ma usitaia le Tulafono e momoli atu iai le faafetai ma le agaga fiafia o le Matagaluga. O a Ekalesia uma ua o latou taliaina, e pei ona fai atu, o le fuainumera lena ua outou silafia mai le faamatalaga e le 34 Ekalesia ae 35 ua tofu uma lava ma Faafeagaiga ua lesitala. E ui lava tou te faalogo mai e 202 Faifeau e le i lesitalaina mai i le lisi lea na matou agai atu i ai ma matou faatalanoaina ae ua 346 lea ua uma ona lesitala mai. E momoli atu ai la le matou agaga fiafia ona o le taupati a Faafeagaiga i le latou sao aua le tamaoiga o le tatou atunuu.

Ia ona ou oo mai lea lau Afioga i le Fofoga Fetalai i le isi ou pulou masalo o lou pulou lea o lo o vevesi ai ma tele ai faamatalaga, ona o le galuega lea o le falepuipui i Tanumalala. Lau Afioga o le galuega leni ua leva ona tapena mai masalo po o le 2011 na tapena mai ai le galuega leni i le taimi o ou Minisita Lagolago ai i le Afioga ia Sala, sa ma toalua ai ma tapena le galuega leni.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

E le o se galuega faatoa tapena ananafi, o side plans uma lea faapea e leai se mea, a lea, o plans uma ia na fai e maua ma Sala lea e atoa lelei uma ai le falepuipui. Ina ua ou tauaveina le galuega ma oo atu i uta e manaomia se falepuipui e mafai ona loka ma puipuia ia le mafai lava ma faafaigata i se isi ona sola mai i tua, na toe sui ai le plan lea. Ae fai atu le galuega e matua gaoa lava ia ona toe sui ai foi lea o le isi plan lea, ua tolu side plan o le galuega lenei ua uma ona fai. E pei ona ou fai atu e le o se galuega na nonofo, nonofo lava matou o fau. Ae na tapenapena, o lea e maua uma ai i contours o vaega uma o le fanua la i Tanumalalala, i lea level ma lea level alu agai i lalo lea e maua uma a i faamaumauga na fai e le KRAMER. A o le faapea mai e leai ni plan ia o le tali o le fesili.

Tofa Olo Fiti Afoa Vaai: Lau Afioga i le Fofoga Fetalai na o si au tamai fesili lava e fia fai atu.

FOFOGA FETALAI: Onosai mai le sui usufono, se i maea mai le saunoaga a le Minisita.

Tofa Olo Fiti Afoa Vaai: Lau Afioga e le tele sau fesili na o si tamai fesili lava.

FOFOGA FETALAI: E a pe a se i maea mai le saunoaga ona tuu atu lea o le avanoa?

Tofa Olo Fiti Afoa Vaai: E leaga o lea ua oo tonu lava i le vaega lea lau afioga.

FOFOGA FETALAI: Ia ona o lau aiatatau lea ou te popole i ai.

Tofa Olo Fiti Afoa Vaai: O lea ua saunoa le Afioga i le Minisita i le tulaga ua fai ai suiga nei ona o le papa o le eleele lea, a o lea matou te mautinoa o lea sa prepare e le KRAMER lea na tusia le ata le geo-tech assessment o le suesuega na fai i le eleele. O le a la le mea sa le mafai ai ona fau ma toe tusi le suiga lenei agai i le mea la iai le eleele? E pei o le mea lenei lea matou te tau nenefu atu ai ona o le tulaga o lenei ua i ai ia faamaumauga o le eleele a o lea ua e toe saunoa mai ua sui a o lenei ua uma ona aveatu le lipoti o le eleele, pei o le mea lenei na fia fesili atu ai i le Minisita.

FOFOGA FETALAI: Ia malo faafetai o lea ua maua mai le faafesili.

Afioga Hon TIALAVEA FEA LENIU TIONISIO HUNT: E pei a o le va o Sasae ma Sisifo le manatu lea ua faaali mai nei. O le manatu na faaali mai ananafi e leai se side plan, leai se mea, sue mai faamaumauga.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

Tofa Olo Fiti Afoa Vaai: Lau Afioga i le Fofoga Fetalai o le side plan le mea la e uu mai, a o le master plan lea na ou fai atu ai, aua a na i ai se master plan, e leai ni variation na faia ma toe fai ona e deliberate lava lau mea na fai, e leaga na e faia muamua foi le mea lea.

FOFOGA FETALAI: O lea ua maua atu le finagalo le sui usufono, masalo o lea sa faamalamalama e le Taitai o le Malo le tulaga lea i le master plan. Ia e i ai le manatu o lea foi o le a tatou toe finau ae ui i lea o le measili lea ua toe faailo mai e le sui usufono mamalu o Salega Sasae. Ae o le faamaninoga ma le faamalamalama aua afai tatou te o e faamalie le finagalo o le sui usufono, ia o lona uiga e alu lenei aso o tatou feagai ma se faafinauga ina ia faamalie le tulaga o sui usufono mamalu. Ae malie ia le sui usufono, se i toe tulai mai lava lau Afioga i le Minsita.

Afioga Hon TIALAVEA FEA LENIU TIONISIO HUNT: Faafetai i lau afioga i le Fofoga Fetalai, po o le a lava le tauga o le mea lea o le master plan lava le mea lea i faakamuta.

FOFOGA FETALAI: Tulai mai le Taitai o le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai talu lava ona ou ola mai i le lalolagi lenei, e leai lava se plan e taatia mai loa ona mulimuli ai lea e tele a le mau mea. Manatua foi o le plan o le vaaiga lea a le tagata i se fuafuaga o le a fai ae faasolo loa ua faatino, tupu mai lea mea, tupu mai lea mea, tupu mai lea, ona fesuisui ai a lea o plan. E oo foi i le tatou development plan ia sa fai, o le ma o le plan, a define le plan, o le guideline e faasolo ai ia galuega. Ae le faapea o se mea o le a tamau aua manatua o plan e fai e le tagata, ia na o se ata ae a oo loa ina faatino galuega, lau Afioga i le Fofoga Fetalai o le tele ia o mea aua foi o oe na o lou nofonofa a i luga o lau kesi ma tusitusi ai lau plan. Ae a oo loa ina faatino ona fesuisui ai a lea, ou te le i vaai lava i se plan ua 100% le sao, e oo lava i plan o osofaiga o autau. Na o le alu atu a o lea plan ae e vaai atu ua ese foi le tulaga lea ua oo iai aua foi e te nofonofa a ma fuafua i lou mafaufau. Ae a oso atu loa le mea ae oso mai le afa ua oti ato a le plan. E i ai le tala i le taimi na oo atu ai ia Alesana le Sili o le a tau ma Tariu, ona tutu loa lea i luga o le tumutumu mauga ma tilotilo atu i lalo. Ona fai atu loa lea o Alesana le Sili i ana Generals e toalua, o le a alii le tatou plan of attack? Ia ua tilotilo le aualii lea te i ua fai mai, e i ai le faalavelave ua matou tilotilo atu nei i lalo i le faitau o faleie lea e nonofo ai tagata i totonu e 250,000 le aofai o fitafita o le autau a Emperor Tariu. Ia ona faapea lea o Alesana le Sili i ana Taitai, e fia le aofai o le tatou autau? Ae fai mai ia a na taitai e 37,500. O le a la le lua plan o i ai i le osofaiga e le 37,500 e osofai ai le kuata miliona. Ae fai mai, o le plan lea e fautua atu ai i lau Afioga, tatou o e osofai nanei i le pogisa, na o le pau a lena o le auala tatou te manumalo ai.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafaoga faaaauu i luga o le faitauga faalua – Aso 3**

Ia ona faiatu loa lea o Alesana, ua lelei ua iloa la le sao, o loa e fai se meaai mo le tatou 37,500 fai lelei lava se latou meaai ae faamomoe, o le ta o le 6:00 i le taeao faatoa alu ai le tatou osofaiga e le alu i se pogisa. Ae aua ne i toe faalavelave mai se isi ia te au lea o le a ou alu i totonu ou te moe. Aisea? E leaga o le ituaiga plan tonu lava lena, e faaaoga e Taitaiau i taimi faapenei ae o le a ou alu ou te mafaufau i le ituaiga plan fou o le a osofaia ai ia le vaegaau lea taeao, ia o le mea lena. E oo atu i le taeao o la e feala uma lava le autau le 250,000 ma le latou manatu o le a osofaia e Alesana le Sili ia Tariu i le pogisa o le po aua la foi sa i ai ia latou scouts ma iloa ai o le mea a lea masani. O le plan a lea masani e le fetau loa numera 37,500 ma le 250,000, pau lava le mea e fai o le faaaoga loa o le malu o le pogisa. Ia ona fai atu loa lea o Alesana le Sili tatou te le e osofai, tatou te o atu ua nofo sauni mai ia autau a Tariu, o lona uiga e oti uma ai le tatou 37,500. O le mea la lea fafaga lelei, ma aai lelei, ma momoe lelei, taeao aena e oatu tatou o lea e malolosi ae omai latou e le i momoe i le po atoa ua vaivai. O le mea lena na tupu e le i atoa le itula o le taua lea, ae tulia ia au a Tariu ae sola Tariu, e matautia le taua lena. O le taua lena la e numera tasi i mea ia o plan ma mea o master plan, mo mea o osofaiga o vaega e le fetau le master plan na fai muamua e tatau ona toe sui le plan. Ua le osofai i le pogisa, ae osofai i le mutinitini o le la e omai ai le vaega le la sa feala i le po atoa ua matua vaivai, tafetotoi le toto ma o le taua lena lea na malolo ia Emperor a Peresia ma amata ai loa le nofoaiga a Alesana e alu atu a tau i atumauga o Initia. Lau Afioga i le Fofoga Fetalai, na o sina faamatalaga e faamatala ai le uiga o mea o plan, e leai a se plan e tumau e fesuisui.

FOFOGA FETALAI: Malo faafetai, tapa lau Afioga i le Minisita o Tupe Maua.

Afioga Hon TIALAVEA FEA LENIU TIONISIO HUNT: Faafetai i lau Afioga i le Fofoga Fetalai, po o a lava master plan ma plan ma le a le ituaiga, o le mea taua o le tupe na fau ai le galuega pe i ai se variation o le tupe na fau ai le galuega lea e \$7.4miliona. Pe i ai se tupe, se variation o le \$7.4 lea na pasia e le Komiti o Taufoga e fai ai le galuega lea. E leai se mea, lea na saunoa le Taitaifono o le Komiti o Tupe e 98% o le galuega ua uma. A o le a le mea lena e i ai? E \$210,000 le tupe faasao o le galuega lea, e le i ausia la le tupe na fai ai le tauofoga. O le galuega lea e vevesi ai i le fale o le Warden, o le Warden e le i faia e au se tonu o le tonu lena a le komiti la e vaai le galuega e fai ona o le potu lea e connect uma mai i ai uaea uma a o le falepuipui. O le potu lea e ti uma atu ai moli ma mea uma lava e faaola atu i le potu lea ma o le Tower foi sa faamoemoe e fai lea e silafia e le Afioga ia Sala e lua Tower na ma mananao e fai, e lua tower e fai.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

Ae aumai le faaiuga a le clerk of work, project manager, inisinia ma le komiti o lo o vaaia le galuega o le tulaga lea i ai le Warden Office, ona e maualuga ma matietie le mea o lo o i ai e talafeagai mo le faia o le Tower e tasi e faaoga e iloa uma ai vaega o le falepuipui. Na o le pau lena o le galuega fou, e le o se variation o le galuega lea o le a faauma nei. O a la isi mau mea ia e fai? E tasi a le mea e te tulimataia, le iuga a le Kapeneta e leai se variation o le \$7.4miliona lea, ia uma le galuega ma e faafetai i le kamupani o lo o faia. O a uma isi mea sa fai, sa fai lava ona o au a na leai le ma fesootaiga lea ua tau atu e amo e le matou matagaluega se variation tele. O ia mea e le masani o matou tagata i tulaga ia, e fai mea sasao a ma fai mea tonu. O le tupe foi lea na aumai i le Tala o le Tupe mo le galuega lenei, o le Tala o le Tupe i le tausaga na tea atu nei e \$3.8miliona na aumai e tau fai ai le konekarate. Ua uma ona maua le konekarate e \$7.4million na fai ai ona aumai lea o le main Tala o le Tupe le \$3.8miliona e fai ai, sau le supplementary o le faaiuga o le tausaga aumai le \$3.7miliona ona maua ai lea o le \$7.5miliona fuafua i le tau o le konekarate lea na iai e \$7.4miliona. O le \$1.5miliona lea na aumai faatasi ma le tupe lea i le tala faaopoopo muamua o le tupe ia Tesema e fuafua mo le Administration block ma nisi galuega o le faamaeaina o le galuega. A faaopoopo uma tupe ia na o le \$9.4miliona, o le estimate na fuafua mo le phase 1 o le galuega e \$10miliona a o le tau aofai e fausia ai le falepuipui e \$20miliona. A tuu la i ai ma le tupe lea ua aumai i le paketi lenei e \$3.5miliona lea ua aumai, ia na o le \$12miliona lea ua aumai ae le uma ai le falepuipui. A o le tupe lena e \$600,000 o le \$3.5miliona la ua aumai mo le falepuipui, e fausia ai le falepuipui mo Savaii. A lelei le falepuipui mo Upolu e tatau ona lelei le falepuipui mo Savaii, e 470acre le galuega mo Savaii, faafetai i le Minisita o le Samoa Land Corporations mo le lisiina mai o le 470 acre lea mo Savaii. O lea ua asiiasi o i ina lea e faamoemoe iai le fofoga taumafa o falepuipui nei e tolu, a o galuega nei e lei faia lea faapea e alu i le stage 2, o auala, admin block lea iai le \$1.5 lea a o lea ua faaoga le tupe lena e totogi ai isi service lea ua iai a le vaega lea o le KRAMER ma le OSM. O le tanevai e 500,000 ltr e alu atu ai le vai o le falepuipui, e alu uma ai le vai lea i le falepuipui ia lava le fofoga taumafa. O fale e o atu le aufaigaluega ma malolo ai i le leva o le po, e tolu sifi o le falepuipui lea e taumafai a o i Tanumalala ona fai lea. O le isi sifi o le vaeluapo e tatau ona malolo ma iai se fale e malolo iai ona malama ai lea o le taeao taliu mai i o latou aiga ona e mamao ma e faigata ona feoi i o latou sa, e tatau la ona i ai se mea e provide e malolo ai i le po. O fale o le umukuka e fai ai le fofoga taumafa mo tamaitai e leai se mea ua faia, o le umukuka e fai ai le fofoga taumafa mo alii e leai se mea ua faia. O le Falesa e le i faatupeina, o le standby generator 200 KVA le malosi, e standby, e leai se mea ua faatupeina. O lea la e faamoemoe i le Supplementary po o le a lava le faiga e faaalu ai le matou galuega lenei.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafaoga faaauau i luga o le faitauga faalua – Aso 3**

O le pa la ua uma ona tender out le pa, le exterior fence e puipui mai ai le falepuipui, o le pa lea e 5meter le umi ae 4meter le sima ma le uaea e mita ma alu ai ma le razor wire e taamilo ai i luga, o lo o evaluate nei ia tauofoga i le taimi lenei, o le tupe na fuafua lea e maua mai i le fesoasoani a Sapani ma le Ofisa o le Tupe i tupe ia na maua i le taavale lea na faatau ese atu o le SIDS, e \$1.4miliona. Ia o le afa lena o le tau o le pa, o le tauofoga la e evaluate i le taimi lenei e le komiti lea e vaaia le galuega, e ova atu i le \$3miliona le tender na fai. O lea la e evaluate ae o le tupe lena, o lona uiga e manaomia foi le isi tupe e faauma ai le pa.

Lau Afioga i le Fofoga Fetalai atonu o lena ua faamalamalama atu le tulaga i le galuega lenei ma e talitonu foi lau Afioga i le Fofoga Fetalai o galuega uma tatou te faia e fai uma a mo le Malo. O a foi ni galuega a le komiti o lo o vaaia le galuega ia e faamalo atu ia i latou o lo o vaaia le galuega, faamalo i Inisinia, project manager ma le clerk or work o lea e tuufaatasi galuega na e lua e sefe ai le tupe. A sue mai se isi clerk of work faapitoa mo galuega tetele faapea ia o le isi foi \$600,000 e alu ai pe sili atu. Ae faafetai i le OSM ua talia le talosaga e fai uma e latou mea na e lua aua e leai se eseese o le mea a e tasi. O le naunautaiaga ia faalaititia mai le tupe e fai ai le galuega.

Tofa Olo Fiti Afoa Vaai: Lau Afioga i le Fofoga Fetalai na o si mea lea e fiamalamalama iai.

FOFOGA FETALAI: Malie le Minisita, se i tulai mai le sui o Salega.

Tofa Olo Fiti Afoa Vaai: Faafetai, a e matauina mai lau lauga ananafi i le amataga na momoli a lau faafetai i konekarate ma le faiga o isi mea ia sa taumafai e sui. O le mea lea ua e saunoa i ai i le tulaga o le clerk of works ma le project manager sa ou manatu a lau Afioga i le Fofoga Fetalai, o le a faaoga tatou Inisinia lea i le MWTI e clerk or works aua la e totogi lelei lava e le tatou Malo, ma o Inisinia foi o Inisinia tagata ia. Sa ou manatu i se tulaga faapena ae a faapea o lau lena faiga ua fai ai ma e le totogiina, ia manaia. A o lea ou te tilotilo i le statement lea na aumai i lau matagaluega o le toe suiga atoa a lea iai e \$240,000 lea ua toe ave i le OSM mo le suiga a lea. E matautia ia o mea ia e laulau mai i i o lena e te le o saunoa mai ai, a o lea sa e saunoa mai e leai se tupe o toe faaalu ai. A o suiga uma lava ia o lea ou te nofo atu ma le pepa na aumai i le tou ofisa, ia ae o le a le afaina lea ae tautuana ma lau Afioga. E tuu atu pea lava i lau Afioga le faatautaiina o le tatou galuega, ia manuia foi ou faiva.

FOFOGA FETALAI: Malo. E faamalie atu lava i le Minisita, se i fai atu a si fautuaga laitiiti lea a le Nofoa, ia talu ai ona o lo o faapena ona filifili e lenei itu o le Maota le tulaga foi nei o Komiti filifilia o le Palemene.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

E latou te soalaupuleina ia tulafono ia aemaise foi o le Komiti o Tupe pei ona i ai le mataupu lea ua tatou talanoaina o le Tala Faatatau Autu ma le Tala Faaopoopo o le Tupe. E na ona faamanatu atu o a faamaumauga e tuuina mai e i latou o lo o faapena ona valaaulia e oo mai e sailiili ma tuuina mai molimau i le komiti, ia o a uma a pepa latou te tuuina mai ma faamaumauga o mea patino ia i le komiti ina ia malupuipua confidential. Ae le mafai ona faalauaitele i totonu o le tatou Palemene ona e fitoitonu lava i le Komiti ma a latou sailiiliga e fai ai a latou faaiuga ona fai mai ai lea o le latou lipoti. Ae tatou te autalaina loa faapea ia faamaumauga ia ona manatu loa lea i le va o le komiti ma faauluuluga o matagaluega ma faalapopotoga a le Malo o lo o faapena ona amia e le komiti e oo mai e aumai molimau mautinoa ma pepa faamaonia e tusa ai o lo outou finagalo. Ae afai loa e mamailiu, mamaioa i tulaga o tatou felafolafoaiga ia ona iai loa lea o le popolega o le tulafono. Ae na ona faamanatu atu, e lelei a foi ona saunoa e aumai i le aotelega ae a auiliili loa i le tulaga ia o lea ua saunoa le Minisita e fitoitonu iai le matagaluega. Ae ui i lea leaga o le tiute lea o le Nofoa e faamanatu atu leaga o la e faafofoga mai ia faauluuluga o matagaluega ia ma faalapopotoga a le Malo ma i latou o e tapa e le taitaifono ma lea komiti ma lea komiti ina ia tuu mai ia molimau ma faamaoniga e finagalo i ai le Taitaifono ma le Komiti. Ae a aumai la ae mama faapea ia ona i ai foi lea o le popolega aua o itu na o lea e liolio iai le tatou Palemene. Ia ae ui i lea ua na o se fautuaga, tulai mai lau Afioga i le Minisita o Tupe Maua.

Afioga Hon TIALAVEA FEA LENIU TIONISIO HUNT: Faafetai lava i lau Afioga i le Fofoga Fetalai, ia ou te le iloa la po o le a le pepa lea ou te uuina. O le \$240,000 lea o le phase 1 totogi lea o OSM, te i ua faatele le totogi o le kamupani ae laitiiti le tupe lea. E faafetai foi i le sui usufono e momoli lau faafetai i le fesili ua aumai e mafai ai ona faamalamalama. O ia foi a lea na fai ia KRAMER ma OSM, ua lua fail i le galuega lenei. Ia ona fesili atu lea i ai, i le a le itu? Na lua o atu e fai le falepuipui ae lua o atu fausia le hotel. Faafetai mo upu faalaeiau, faaoso fia faigaluega ai na fai i Inisinia o le galuega lea. O lau faafetai foi lena e ave i Inisinia nei i le galuega na fai, matua ese mamao a le falepuipui lea o le a tapena atu i ai ma le nofoaga o lo o i Tafaiagata ua pala. O lea tatou te vevesi i le \$12miliona po o le \$20miliona foi i le falepuipui o le tatou atunuu. O le falepuipui o Niu Sila la e fau e NZ\$400miliona le tau. Ia e fetau lava tatou mea ia e fai ma tatou i le tatou atunuu e laitiiti. Ae pei o le eseesega lena. Ae avea ia lenei taimi lau Afioga i le Fofoga Fetalai ou te faafetai ai i Matagaluega e lua o lo o ou tauavea, faafetai i le Matagaluega o Tupe Maua i lo outou gapatia i le ao ma le po, e 24 itula o la outou galuega pe a pisi le malae vaalele. Timuga, ta te asiasi atu o outou galulue i le timu i tua o le lotoa a le Ofisa o Tiute i le tau suega maia o oloa o lo o i totonu o containers aua se tupe maua mo le atunuu.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

O lea e vaaia fua lelei o galuega o lo o outou gapatia ai, o lea e siisii i luga le tupe maua a le atunuu i lea tausaga ma lea tausaga. O ai? E le o le Minisita, e le o se viiga o au, o le viiga e ave i le aufaigaluega, o latou ia o lea e gapatia i le faatinoga o le galuega i le tamaitai pule ma le aufaigaluega i tai i le Ofisa o Lafoga. Faamalo galue, faamalo tautua.

I le Ofisa o le Toefuataiga i le falepuipui, faamalo galue, e le faigofie le galuega o le abuse i le 12 itula e te faigaluega ai, o a tala e fai mai e pagota ia te oe i totonu o le pa, e le faigofie. E maeu lo outou loto totoa i le faatinoina o tou galuega. O le a lava le mea e fai, ou te talitonu o le tatou atunuu o le atunuu e tumu i le fautua, e le o ni complain, e tumu i le fautua. Leaga foi na tatou ola mai lava o fautua tatou e tatou matua i mea lelei. Onosai. Ia, faafetai ia te outou le tautua, lau Susuga i le Komesina, le Komesina Lagolago ma le paia o le aufaigaluega i falepuipui e tolu i Tafaigata, Oloamanu ma Vaiaata, faamalo le galulue. I le komiti o lo o vaaia le galuega i Tanumalala, sagai ane e amata le stage two o le galuega, ia ave i ai lo outou faatuatuaga ua avatu ia te outou tou te faia ai le stage two o le galuega, ma faamolemole, e fia tatalaina le galuega leni o le falepuipui ia Tesema. E tatau ona move le falepuipui i o ia Tesema o le tausaga leni e tatau ona tatala ai Tanumalala ma le falepuipui i Savaii. A lelei Upolu, e tatau foi ona lelei Savaii.

Lau Afioga i le Fofoga Fetalai, o se manatu lea e fai ai au ma sui o matou Matagaluega e lua i totonu o le Palemene nei e faafetai i sui usufono uma mo fautuaga sa tuuina mai, faafetai foi i lau Afioga mo le taitaiga o le Fono. Faafetai foi i le Afioga i le Palemia ma uso a Minisita i le lagolago aemaise Minisita Lagolago, aemaise lava i lau Minisita Lagolago, faamalo le fautua faapea foi le onosai i le tele o tiute ou te tuu atua e te faatinoina, ou te talitonu lava e te faatinoina ma le totoa ma le loto fiafia.

Le mamalu o le Palemene, ua tatou faatasi nei ma Faauluuluga o Matagaluega. Ia o si ou itumalo foi o le Vaa o Fonoti e mamao i tua, faafetai mo la outou tapuaiga i lo outou sui usufono. Ia manuia le Fono.

FOFOGA FETALAI: Malo faafetai i lau Afioga i le Minisita mo Tupe Maua, ma ua oo mai le faasologa i lau Afioga i le Minisita mo Faatoaga ma Faigafaiva. Lau Afioga i le Minisita.

Tofa Hon LOPAOO NATANIELU MUA (Minisita mo Faatoaga ma Faigafaiva): Ou te manatu ua ee i fogafaleseu tautai o le seuga i leni ituaso, ou te manatu foi ua tele upu i leni aso i paia ma mamalu o le tatou atunuu. Peitai, e le mafai lava ona faagalo le tapuaiga mamalu a le tatou atunuu.

E muamua ona faafeiloai atu i lau Afioga i le Fofoga Fetalai, e faapena foi le faafeiloaiga i lau Afioga i le Palemia ma le tamaitai Sui Palemia, le mamalu i le Kapeneta, Afioga i Minisita Lagolago.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

E faatalofa atu foi i lena itu o le tatou Maota i le Afioga i Taitaifono o Komiti Faa-Palemene ma Sui Taitaifono o Komiti ma le maave eseese o sui usufono o Komiti Faa-Palemene e pei ona alaalatai mai i le la itu o le tatou Malo. Malo le soifua malo le lagimama.

E le mafai foi ona faagaloina le tapuaiga a le Afioga i le Sui o le Fono a Sui Tofia le Afioga ia Le Mamea Ropati ma le Masiofo. E faapea foi ona faatalofa atu i le Afioga i le Faamasino Sili ma le mamalu o le Faamasinoga, ae faapea foi ona faatalofa atu i le Afaigaluega galulue i totonu o Samoa nei i so o se mea o lo o faafalelemalu ma faafaletuluia aua le tauasuina o le vai o le ola.

E faatalofa atu i Taitai o Ekalesia Kerisiano eseese i totonu o Samoa nei, malo foi i la outou tatalo ma la outou tapuai mai. E faapea foi ona avatu se faafeiloai i lau Susuga i le tamaitai le lalelei o Tuanaimato le Failautusi o le tatou Palemene, lau Afioga Sefuiva ma le mamalu o le afaigaluega. I le la foi itu o le Maota, e faatalofa atu i Faauluuluga ma Pule Sili o Matagaluega a le Malo faapea foi Faalapotopotoga Tumaoti. E faatalofa atu foi i tusitala ma le au faitatala o lo o tatou feiloai i lenei itula o le aso, tatou fai ma talie.

O le a ou tali muamua atu lava i le mataupu lea na fesili mai ai le Afioga ia Pau, na pau lava lea o le tagata ou te fia taua le igoa ma ou te fia tau atu i a outou Afioga, e sa le tagata e faalavelave i lau lauga leaga o lea sa tuu atu lava outou e fai outou, a o lea la ua oo mai i lou taimi, e sa le tagata e faalavelave i lau lauga, a o lea o le a ou tali atu lava i mea sa outou saunoa i ai. Ia, e pei na malie i le faamatalaga foi a le Afioga ia Pau ou te alu e vaai le mea lea e fai e Saina na ona usu a i luma ma le faguvai e tasi, faatu mai lava i le taeao e po lava o la e faatu. Ia o au la lenei ua ou fai atu i lau CEO, e i ai se mea faapea ua e vaai i ai? Fai mai e leai. Ia ona ma o loa lea fai le ma suesuega, Ua e vaai i ai lau Afioga Pau i le Samoa Airways pe a alu i le taimi lea o le a aluese atu ai ma le malae vaalele? E alu atu lava i fafo atu ma le mea lea e tu ai uma ona o le pasese tau loa i le mea lea e i ai le runway, a e vaai i ai alu loa i le atoa le vaalele alu atu loa take off. O le taimi la lena, a faapea o lea e te tutu i lalo, e te vaai atu ua leai ni pau o le vaalele, ae faatoa toe iloa lava pau o le vaalele pe a latalata i le taimi lea ua faaifoifo ai le vaalele po o Aukilani, land loa ma le vaalele ae patatu ifo foi ma pau o le vaalele i lalo. Ia ona ou mafaufau lava lea ma ma talatalanoa ou faapea, o le mea lava lena e fai e Saina, o le fagupau lea e alu atu ma ia, e alu atu loa inu, na ona faatu ifo lava i lalo land loa foi ma pau o le Saina, ona faapea lava lea o outou ia o la e faatu, ae leai, o la e foi e tietie ia i luga o pau. O le mea lea e faamalamalama atu ai i lau Afioga, e leai ni mea faapena e tutupu i Samoa e faigata tele ona fai. Ia o lena la ua avatu le tali i lau Afioga ae aua e te toe fesili mai.

Le paia o le tatou Maota, e fia momoli atu lava le faafetai i le afaifaatoaga ma le aufai lafumanu e le gata ia i latou o lo o nafa ma le totoina ma le faaolaina o lafumanu, ae ou te faafetai atu ia i latou o lo o laua i fafo i atunuu mamao le tele o fua o faatoaga lea e toto i totonu o le tatou atunuu.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolaloaiga faaauau i luga o le faitauga faalua – Aso 3**

Afioga Pau Sefo Taumata Pau (Faasaleleaga Nu.2): Lau Afioga i le Fofoga Fetalai, faamolemole lau Afioga o se mea e fia faasao.

FOFOGA FETALAI: Ae a pe a se i e malie se i faauma mai le saunoaga a le Minisita. Pe ne i te i ua see ese?

Afioga Pau Sefo Taumata Pau: Ioe lau Afioga ne i te i ua see ese. E ala ona ou fai atua lea faaitaiga ina ia galue lelei ai le Afioga i le Minisita. A o lea ua avatu le fautuaga a o lea ua alu lava sue ae le... ia o le a alu mamao lava i le malae vaalele ae o lea lava e i inei i le taulaga... O le mea la lea, tautuana ina ia sailiili lelei. O la e ua alu i le malae vaalele na o vaalele a o faatoaga lea ou te fai atu ai. Ma lou faaloalo.

FOFOGA FETALAI: Malo faafetai. Ua ou maua atu.

Tofa Hon LOPAOO NATANIELU MUA: Faafetai i lau Afioga. O le agaga e ala ai ona fia avatu le faafetai ia i latou o lo o lauina tatou oloa i fafo i le latou galuega o lo o vaavaalua ai ma le aufaifaatoaga, leaga e taua tele aua ana le seanoa le aufaifaatoaga e le maua ni a latou oloa i fafo. Ae ana le seanoa foi i latou e avea mea i fafo e leai foi ni maketi mo fua o faatoaga. O le mea moni i le taimi nei, a fua i lipoti pei ona aumai, o lo o alu pea i luga le tatou maketi i fafo, aemaise o le talo, o le popo, faapea ai foi ma nisi o vaega, o essential oils, e laiti mea ia, nai tamai mea lava e fai e le tele e le tetele foi ni quantities. O le tele ia o le latou aoga, e tele foi le taimi o lo o alu ai e fai sutesuega pei ona nafa ma le tatou matagaluega o sutesuega faasaienitisi. E momoli atu ai le agaga faafetai ia i latou o se tasi o tatou exporters aupito tele i totonu o Samoa, o le Ah Liki Investments, o le Women in Business, o le Pacific Oil, faapea foi ma le *Coconut Clusters Percival*, faapea foi *Agro mafting*, e tele ia o le latou sao, a tilotilo nei i fuainumera ia e tuuina mai ia te au i le vaiaso na tuanai nei mo le sauniuniga o le Tala o le tatou Tupe, e ese le tele o le latou sao, ae tele atu la le sao o le aufaifaatoaga aua o au nei sa ou ola mai le faatoaga, ua ou alu foi ou vevelele autu ma fai mea faapena ae le i faia ni masini ma ni loli ma mea faapena i le taumafaiga sa fai, ae ou te molimau atu, e sili atu le tigaina o le aufaifaatoaga nai lo le tagata lea e alu e eli autu ma faigaluega i autafa o le auala.

O le mea la lea e ala ai ona maua luga le agaga faafetai i le aufaifaatoaga, ma e le umi foi lou fia faafetai i ai, o le tele o taimi matou te asiasi ai i tua e molimauina foi lo latou tautiga. O le tulaga o lo o i ai le talo i le taimi lenei o lo o lelei, ae i ai se vaega o le tausaga lenei e faaletonu ai ona o le pau i lalo o le tatou supply.

E pei foi ona fesiligia e se tasi o sui usufono mo Safata, o lea ua ia te au fuainumera, e \$16,000 i le masina lea e spend e se tasi o exporters i totonu o afioaga e tolu o lou itumalo i le masina e tasi.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

O lona uiga, e fai lava sina tele a o lo o alu i lalo le fuainumera ona o le tulaga lea e le o lava tele le toto a nai tagata o lo o galulue i tatou faatoaga. O le talo lea i le taimi lenei e 102 containers lea e ave i fafo e Ah Liki. E 20 containers i le tausaga lea e ave e le frozen i le taimi lenei leaga e le i leva ona amata, ma nai isi containers o lo o faia e nisi o tatou faifaatoaga ma se tasi o alii Saina o lo o aumau i Savaii. O lona uiga, e 130+ containers talo lea e ave i fafo. E i ai le faamoemoe i le tausaga fou ua uma foi ona ou luiina le au... i le tausaga lea e faagasolo nei, e tataua ona oo atu i ai ua 150+ containers talo e ave i fafo. Ua amata foi ona palaai mai Fiti aua sa matou asiasi i Fit ii le masina ua tuanai. E le gata i le tulaga lea, a o le aafiaga o Fiti lea na aafia ne ii le afa. E pei o le tasi lena auala ua ala ai ona faateleina le manaomia o le tatou talo ona o le tele o le aafiaga o Fiti lea sa i ai nei. A o le mea moni, o le talo la e ia Fiti, e fiafia tele i ai o tatou tagata. E fai foi la lenei taimi e avea ma avanoa ou te fai atu ai i le tatou atunuu, ia finagalo malilie, ia logo o latou aiga i Niu Sila, Ausetalia, Amerika ma Hawaii, po o fea lava la e nonofo ai, aua ne i o latou tofoina le talo i o latou fofoga, tofo i le fatu. A e tofoina le fatu, e mafai ai ona mafaufau le tagata o lou aiga po o lou nuu la e i Niu Sila, o le talo lea o le a ona faataua mai Samoa, e ono sau mai Fusi, pe ono sau mai Safata, e ona sau mai Aleipata pe ono sau mai i Asau.

O lona uiga o lona sao foi lena e fesoasoani i ai, ona o le malosi lava o le lelei o le taste a le talo Niue lea sa ia tatou lea i Fiti, e pei o le auala lena e ala ai ona malo lava aepetai, o le taimi lenei, o le feau lena o lea e logo atu nei i o tatou aiga e oo foi lava i aulotu i ekalesia Metotisi ona o la e lagolago mai lava ia le matou ekalesia i mea a le Malo, e logo atu lava i ai e faamanatu atu i nai o tatou tagata, e taumafai e faatau le talo Samoa.

O le talo Samoa foi ua mafai ona fai ai le whiskey, o le masina o Aukuso e launch ai le whiskey lenei o lo o taumafai i ai le Ofisa o le SROS o la ua uma ona fai, o la e faamafu mo le taimi nei ia e i ai foi ia le tulaga o le Tulafono e tataua ona silasila pea i ai, o lea e faafofoga mai le Minisita o le Liquor Board, ia e silasila ane i le tulaga lena, e fai lava ia suesuega ia faapena ma le packaging ia o vaega uma lava na o suesuega, ia ae le mafai ona faauma seivagana ua oo i ai ia le Matagaluega a le SROS.

E le gata i le whiskey ae o le chips, o lo o taumafai pea ia le Matagaluega ia ma le tatou vaega o suesuega, e galulue i tulaga ia e faapea ina ia aua ne i ia **tatou potato chips ae aumai chips ia e mafai ona fai mai i le talo. Ia ae i ai** lava nai luitau o lo o i ai, ia ae ou te lototele lava leaga e lototele foi ia le Matagaluega faatasi e maua lava se mea lelei, e taumafai mai le aano o le talo e substitute ai ia le potato chips.

Ia ona tatou oo mai lea i mea tau niu, oi ia tatou te le i o ese mai le talo, ou te talia le fautuaga o le a sii i luga ia asiasiga ia e fai faatasi ai ma le Matagaluega o Tina ma Tamaitai mai le 1,000 tiapula i le masina i le 2,000 tiapula i le masina mo le 12 masina. O lo o manaia ia le tatou polokalame ae na amata mai ma ou maitauina, e i ai lava ia afioaga e le o faia, ae tele foi ia afioaga o lo o latou lagolagoina.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

Ae silasila foi, a fuafua foi i le tau o le talo la e i ai i le taimi nei, lea na sausu lava i luga i le \$45.00 i le taga talo e 22kg lea ua oo i luga o le \$50.00 ma le \$60.00. E lelei foi i le vaitaimi lenei ua tele le manaomia o le maketi, ia ua lelei mo a tatou faifaatoaga. O le price la ua oo i luga o le \$60, o lona uiga a 2,000 tiapula, ia e \$3,000. Ia e le o sese lau faamatalaga pe a fuafua e base on current prices, o le tupe lena e tilotilo i ai i le 2,000 tiapula. O lona uiga a faapea o masina uma lava, ia ailoga e toe fia alu i Niu Sila.

O le mea lena e ala ai ona lagolagoina le finagalo o le a sii i luga ia le asiasiga ia ma le asiasiga o le fai faatoaga, mai le 1,000 tiapula i le masina i le 2,000 tiapula ona ua fai sina feoloolo mai o tatou maketi i Ausetalia, o lenei toetiiti lava uma ia suesuega a le Matagaluega o le Faatoaga ma le SROS o lo o fai nei, i le aafiaga o le talo a Ausetalia i le lega pe a faapea e avatu le tatou talo, aua o le taimi nei e na o le frozen la e ave i Ausetalia, e pei o le tatou tagata la e i Niu Sila ma Ausetalia, e pei e manaia ia latou ia le fresh talo. Ae ui i lea, o lea e faa priority e le Matagaluega, ia a o le mea e lelei ai, o lea e tauva ia le tatou talo le tatou frozen talo ma le fresh talo ma le frozen talo a Fiti i le taimi lenei i Ausetalia.

O le tulaga i le niu, ua fai sina faaletonu o toganiu i le taimi nei, e le gata ua tele ia le niu leaga, ae ua tele foi le aafiaga o niu i le manu ainiu. O lea la ou te fiafia lava e faaali atu ma faailoa atu i le tatou Maota ma le faafofoga mai i le tatou atunuu o lea na taliaina nei e le tatou Kapeneta, lea e 100 iliafi, o le a saunia e le Malo, e tufa atu faatasi ma le Matagaluega o Tina ma Tamaitai, ma sui uma lava o le Maota, ou te le manao e sau le pulenuu ae le i sau le sui usufono, ae le tufa foi iinei e matou te o atu lava i tua ma ia faapena ona fai e amata muamua i afioaga o lo o sili ona aafia i le taimi lenei, i le manu ainiu, ua uma ona matou asiasia ia le tele o afioaga ae e le i uma lelei ae e matou te toe o atu ia le asiasiga, ona faapea lea ona faamaonia ma faamautuina o fea le afioaga ma alalafaga e muamua ona alu i ai ia iliafi nei, ina ia fesoasoani ai i le aveeseina ma faasino i ai o lo o avatu ia le tatou polokalame i luga o le TV i le taimi nei mo le faatamaia ia ma le puipuia ma le faaitiitia o le ola pea o le manu ainiu.

Ae o le tulaga i le faaaogaina o iliafi, ia e alu atu foi ma le tagata o le Matagaluega, e faasino lelei i o tatou afioaga, faapenisini e outou ma faasuauu, a o lea ua fesoasoani atu le Malo e avatu le iliafi ma o le mea e aupito sili ona taugata lena o le iliafi. Ae e pei o le naunautaiga lena o le Malo ma le Matagaluega ia puipuia ia le tatou niu mai le aafiaga o manu ainiu e ui ina o lo o i ai isi faamai o lo o faapea ona maua i isi atunuu, a o lo o galulue pea le Matagaluega o Faatoaga i le puipuia o tatou niu mai le aafiaga i isi faamai e pei o le yellow leaf, e maua i Papua Niu Kini ia faapea isi atunuu o le Pasefika.

O le tele foi o le niu lea e faaoga i le organic product, i le vaega lea i le Women in Business, ma le lea foi ua oo i ai ia le Pacific Oil, le taua tele o le organic, o organic products i atunuu mamao.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

Ia o le ala foi lena e galulue faatasi ai ia le Matagaluega o Faatoaga ma le Loia Sili, o la ua i ai ia le regulation la ua uma ona ave i ai e le Afioga i le Palemia, e manaomia e regulate ia le tatou organic market ma tatou au farmers. O le auala lena, ina ia maua ai pea le aloaia ma le tauleleia o le tatou atunuu i fua o faatoaga e gaosia e aunoa ma vailaau.

O le tasi o customer e aupito ona tele i le tatou atunuu o le Body Shop i Peretania lea e auala mai i le Women in Business, lea e ave i ai ia le virgin oil ia e le manaomia, e manaomia lava na o le popo i faatoaga e le faaaogaina ai ia le vailaau.

O le tasi o mea ua tatou toe foi laitiiti i le talo, o lo o galulue le Matagaluega i le faamautuina ia le mafuaaga e ala ai ona lavea tatou i le virus lea o le TVCV po o le Taro Vein Chlorosis Virus, e i ai ia le finding ua ataata mai o la e galulue ai le Afioga i le Pule Sili ona o ia o le Soil Expert ia ma le Matagaluega o le SROS e ono tuuaia se tasi o vailaau o lo o tatou faaaogaina. Sa ou naunau lava ia maua mai le faaiuga nei, e mafai ona faalauaitete atu, aepeitai, it's a preliminary finding, e ono aafia se tasi o vailaau o lo o faaaogaina e le tatou atunuu i le fanaina lea.....o le a faamautu atu i se taimi o i luma. Ae o le mea foi lena e taua ai le silasila pea i le faaaogaina o vailaau i le saunia o vailaau mo faatoaga ma togalaau ma so o se mea lava.

O le tatou ulu e pei ona silafia o lea ua fai ia le tatou falaoamata Gluten Free Flour ou te iloa o le tele ia o le maketi o le tasi tagata i Sapani e 10 tane e manao ai, ae o le faalavelave e leai ni masini e fai ai. E na o si tamai masini la e i ai, ae o lo o i ai lava ia nai aisiga tupe la e fai solo i le taimi lenei, atonu lava e oo atu i le tausaga fou pe tali mai foi le Afioga i le Minisita o Tupe i le tausaga fou, i nai nisi o fesoasoani e ono maua ai nisi o masini e mafai ai ona faatino ia lea galuega a o lo o mafai lava ona produce ia le Gluten Free Flour i le faaaogaina o le tatou ulu.

Na saunoa foi nisi sui usufono i a tatou lafumanu, o le mea moni lava e lua i a tatou taavale la e feaveai ai ia tatou lafumanu, e leai se faapopolea i lena mea. O lo o i ai foi ia le tatou taavale aisa lea e fasi ai ia tatou manu mai i Apia nei mo nisi o latou o lo o vave manaomia. O le tasi o poloketi o lalo o le SACEP lea e i ai nei o le fausia lea o le fale o le Static Slaughter Unit o le fale tumau i Nuu e fai ai ia le tatou fale fasimanu.

O le ala foi lea ua amata ai e le Matagaluega ia feutanaiga ma Tutuila i le mafai ona avatu i ai o le tatou povi fasi ia po o le tatou mamoe foi ua tele ia le tatou mamoe, ao le povi i le taimi nei, o i ai ia le tulaga o le Tulafono e mafai ai ona taofiofia ai pea le faaoga o povi o tatou manupapalagi i faalavelave, o le faaoga lea o le Tulafono. Ia aua nei toe faatamaia se manupapalagi mo faalavelave ia ae taumafai e taofiofi ma sefeseфе mo ni faamoemoe faapea aemaise ia le tatou maketi i totonu o le tatou atunuu, aua o le mea lea e tau e le vaega lea i le Ofisa o Tupe ma le Ofisa o le Central Bank o le Import Substitution, ia o lena tou te malamalama e oo foi ia outou Afioga.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafaoga faaaauu i luga o le faitauga faalua – Aso 3**

Ia e pei o le aoga na, ae o le isi mea i le tausaga fou e fai le tatou South Pacific Games, ae 3 lelei fono tetele a le Matagaluega o Faatoaga e 200 i le 300 tagata i le fono e tasi, o lo o faamoemoe i le tausaga fou, o le ala foi lena, e taumafai ai i le tatou meat, ia lelei na fai ma saunia ma lelei foi le faaolaina o le tatou lafumanu, ia e le mafai e tatou te le taumafai e import mai ia ni tatou povi mai fafo, ia ae taumafai e faaoga lava tatou ia tatou lafumanu i totonu o Samoa, e tele lava le sefe ma maua ai tupe a tatou faatoaga e pei la o le faamoemoe lena o le Matagaluega ua uma foi ona matou galulue ma le SPC, matou feiloai ma le Afioga i le Pule o le Matagaluega o Faatoaga talu ai nei i Fiti, fesoasoani mai i le Planning e amata atu i le taimi nei, mo le faamoemoe lea o le South Pacific Games ia, e le gata mo mea o fualaauiaina, ia ae o le tatou meat.

Ia e pei o le tulaga lena e faailoa atu ai foi le tele o nisi o galuega o lo o galulue ai ma Matagaluega e ui ina faapea o lea e tau momoe nisi O le mea moni lava, o le tele o le tatou manao, ae lelava ia tatou tupe, e alofa foi i le Afioga i le Minisita o Tupe ma le Matagaluega, o nisi lava taimi e tomumu lava ae e sao foi latou, ae i le tausaga fou, o lo o i ai le poloketi a le SACEP 2, e pei e ese le igoa lea o le a faaigoa ai, ia ae ou te le tau atua e pei uma lava e le manaia le igoa na ou fai atu i ai e toe faigoa i se isi igoa, ae ou te tau lava e au ia o le SACEP 2.

O lo o i ai foi le polokalame a le IFAD lea e i ai nei, o le International Finance Agriculture Development, e fesoasoani i a tatou faifaatoaga, o mea e le mafai ona fesoasoani mai e le mafai ona kavaina i le tatou paketi, ia ou te lagona e mafai ona fesoasoani mai nisi o vaega ia e faamalosia ai ia le tatou Ofisa o Faatoaga, mamoe ma povi o lo o taumafai lava le faaolaina o mamoe ma povi i tua i Togitogiga, faapea foi le mafa, aua ua alualu i luma ua faapea ona matou vaavaai foi i le asiasiga na alu nei, ia o lo o faapea ona faatupulaia ia le aofai o a tatou lafumanu.

O le nonu talu ai nei o lo o i ai se kamupani se kamupani o lo o faia le nonu iinei, e 80 tonne latou te export i le masina. O le naunautaiga o le Kamupani, e fia oo i le 200 tonne i le masina, ia ae o le faalavelave e le lava le fanua e fai ai.

Ia o lea ua galulue foi ma le Afioga i le Minsita ia Lautafi maua se fanua e ave i ai ia le latou factory. Ia o le tasi lena o vaega e faamalosia i o tatou itumalo o Safata lea ua tele na o atu i ai ia le kamupani lea e ao ai mai ai le nonu. Ia, e manaomia lava aua a oo ina tele ma unaia le fuainumera lea ma amata ona fai le factory fou a le kamupani pe a oo ina mautu ia latou feutanaiga ma le Matagaluega a le SLC, ia o lona uiga o le a tele se nonu e manaomia, ia o mea uma lava na e fesoasoani i le tatou Matagaluega o Faatoaga ia ma le aufaifaatoaga o lo o i ai ia le trainer a Samoa ma le house project ia e fai i le taimi lenei i le tunnel houses ua faatutu i le atunuu. Ua ave foi i ai le talosaga e faaopoopoo ae na o le 100 tunnel houses la e aumai, ia o le mea lea e tupu, e moni lava e na o na tilotilo lava i ai, ae faapea e aumai sau tunnul house.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

Ae o le mea moni lava e le faigofie, ae o le matou vaavaaiga i ai pei sa faapena ona o le tulaga na fai ai sa ave i nai tagata vaivai, aepeitai na ona avatu lava o le pili o le vai e faifai mea mai i luga, e \$300, \$400, \$500 ia na amata loa lea na give up, e pei o le agaga na e ave lava ia tunnel houses i tagata ua foliga na fai ia lea foi ua i ai ia faamaoniga, ma ua mautinoa foi e mafai ona latou faia ma faia lea atinae. E le mo tagata uma, ae....

FOFOGA FETALAI: Ou te tapa lau Afioga, leai ua maitau atu, e fai sina mafafia o lau api e pei e foliga mai e pei e tele se galuega mo le manatu foi lele i mea sa laga e sui usufono mamalu ae e pei na ona fesoasoani atu i totonu o le tatou galuega e tatou te galulue soosootauau.

Tofa Hon LOPAOO NATANIELU MUA: Lau Afioga ou te le o alu i le suafa o le tagata, o lea ou te alu i issues ia na latou tuu maia i luma. O lea la ou te alu atu ai i issues, ae ou te le o alu atu i o latou suafa, leaga a tau atu foi le suafa, o lona uiga ua tu mai tu mai, uma ifo ua po, vatu lau Afioga.

FOFOGA FETALAI: Ia ua lelei, leaga o lea foi ou te faamaumaua mataupu sa laga e sui mamalu. O le ala lena o lou fai atu. E le na o Minisita o lea e faamaumaua, ae o lou tiute lena o le faamaumau o mea sa laga e sui mamalu

O lea la e matau atu ua ova atu i tua o mea sa laga. Ae soso mai i totonu o le tatou Palemene ma le tatou mataupu.

Tofa Hon LOPAOO NATANIELU MUA: O le mataupu e lua mulimuli o le koko, ia e faigofie lava le faiga o le koko latou. Na ona o lava tau mai le fua o le koko pula, ave nini i le lefulefu ave i le toto. Aua tou te faatali mai fua i le Matagaluega, e umi lava, e o foi le Matagaluega e faatau mai mea na.

Ona ou oo mai lea i le mataupu na faailoa mai e se tasi o sui mamalu. I le US\$862,600, lea e maua mai e le Matagaluega o Tupe mai le Forum Fisheries Agency, e tusa lea ma le \$2miliona+ pe a faaliliu i tala Samoa. Ai ua ala ona fesiligia le mea lea, ona sa aumai e le matou Matagaluega i totonu o le Komiti o Tupe. E tatau ona faaala mai i le Matagaluega o Faatoaga ma Faigafaiva. O le mea moni, o lea foi o le faaiuga o le masina lenei matou te o foi i le fonotaga a le FFA, o lo o i ai foi tagata o la matou Matagaluega e tele ina faigaluega tai masina, i le faiga o le FFA ma le faiga o le compliance, i tulaga ma tulafono o le FFA. Ae pei foi e i ai se manatu, aua e pei o le agaga lena na ala ai ona aumai. E tatau ona sau le alagatupe lea i lalo o le income a le Matagaluega o Faatoaga ma Faigafaiva. O le mea la lena o lea e, ona ua taua ii, ae o se manatu sa faapea, e fai pea le feutagaiga ma le Ofisa o Tupe ma le Afioga i le Minisita. Ae na ona ou faapena atu, e tali puupuu atu, o le tupe lena, o lo o aumai i le Forum Fisheries Association, o le tatou share lena o le faaaogaina e Amerika o le high seas.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

Na ona taatia atu ai faapena, sei fai ni matou feutagaiga maumaututu ma le Afioga i le Minisita o Tupe ma le Matagaluega o Tupe, ae na ona faamanatu atu i lau afioga, o le matua tele o galuega ia e faatino e le matou Matagaluega e uiga i le fesootai ma le tupe lea.

Ou te lagona, e leai ma se isi lava mea o mataupu ia lea ua uma ona ou tali atu. Oi toe o le ramp a Siumu ma Poutasi..

Tofa Olo Fiti Afoa Vaai: Lau Afioga i le Fofoga Fetalai, na o si mea lava lea e tasi e fia malamalama ai.

FOFOGA FETALAI: Malie le Afioga i le Minisita, se i tulai mai le sui usufono mo Salega Sasae.

Tofa Olo Fiti Afoa Vaai: O lea la ua manino mai le tulaga o le seleni lea sa ou laga i le \$212miliona lea i le taimi nei lea e maua mai i tausaga taitasi. E pau lava lau fesili na ou fia malamalama ai. Pe aisea ua le faaali mai ai i totonu o tupe maua a le Malo i tausaga taitasi le vaega tupe lea? Ae o le a foi lona faaaogaina ma le faaaloalo.

FOFOGA FETALAI: Tulai mai le Minisita o Faatoaga ma Faigafaiva.

Tofa Hon LOPAOO NATANIELU MUA: Faafetai, sa matou tuu i totonu i la matou tala o le tupe i le tausaga lenei, ae o lea o le a amata nei. Ae peitai na finagalo le Ofisa o tupe e aveese, a o le mea lena, o lea sa tuu se i fai pea le feutagaiga, ae o lo o i ai le faamoemoe o se tulaga faapena e tatau ona fai. Ae po o le a lava le faiga, ae tuu pea se i fai la matou feutagaiga ma le Matagaluega o Tupe ona maea ai lea o lena mataupu. Ne i te i ua tatou talanoa i se mea e le o le Forum sao lenei e talanoaina ai.

O ramps ia mo Siumu ma Poutasi o lea ua uma ona i ai le tupe e faatupe ai i lalo o le Project Development Fund a le FFA. Ou te le iloa po o le a le mea ua tuai, le iloa po o la e gasegase le o lo o vaaia le Matagaluega o Faigafaiva i le taimi nei.

Ona sosoo atu ai lea ma le....ona o lea e le i fesili mai ai se isi, o lea o le a fai atu. O alia o lea e i ai le isi ituaiga vaa fou lea ua develop mo le tatou faigafaiva, e tau fesoasoani i le aufaifaiva, se i oo i le taimi pe a uma ona design, ona tatou matamata uma ai foi lea i ai i se taimi. Ae ua faauma atu ai i ina mataupu saae a faapea ua i ai ni mataupu fou ua tuuina atu ai, ia faamalulu atu.

Ae avea foi lenei itula ou te momoli atu ai le agaga faafetai, i sui usufono mamalu na faapea ona faaleo o latou finagalo i le paketi a le Matagaluega o Faatoaga ma Faigafaiva ma le Faalapotopotoga o Suesuega Faasaienisi i Samoa.

21 IUNI 2018

**Tulafono Tau Faaofi o le Faatatauina o Tupe Faaopopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

E momoli atu foi le agaga faafetai i lau Afioga i le Fofoga Fetalai, faapea foi le paia maualuga i le Matagaluega o Faatoaga ma Faigafaiva mo la latou lagolago. O isi lava taimi, ou te ofo i le le tiga o outou taliga i le Minisita. Ae faafetai i lo outou onosai. Faafetai foi i le Pulega ma le aufaigaluega a le Faalapotopotoga o Suesuega Faasaaienisi a Samoa.

Ona faaii atu ai lea o sau tala, ou te fia momoli atu lau faafetai i la matou itumalo i Vaisigano Nu. 1 mo la outou tapuaiga. O le faiva foi e le tapuaia e i ai lava faaletonu. Ae faafetai, ua ala foi ona lelei le faatinoga o faiva i leni taimi, pe a faapea e tusa ai ma le finagalo o le Atua ona o la outou tapuaiga. Le paia maualuga ia Tapaau ma le Gafa, Tamataulauniu, Safune ma le afio o le Aloalii le afioga ia Vaai i le afioaga o Vaisala. Faapea foi le afioaga o Auala, Tapu ma Lealiifano male Toalima faapea Safune, ma si ou nuu pele o Asau, i le afioaga o Aiga, susu mai Tufuga, maliu mai foi le afioga i le Matua ia Masoe. Faaitualalua i Salafai, Falefia ma le Siuulufanua, Aiga o Tupu ma Aiga o Ee, Aiga o Papa, Aiga Tafai, malo lava i la outou tapuaiga. Faafetai atu foi i le tapuaiga a le Aufaigaluega so o se ekalesia i totonu o lou itumalo, malo lava faafetai le tatalo. Faafetai i faletua ma tausii, saoa ma le malosii o lo matou itumalo, malo lava ia te outou. Aua e moni lava ia matou nei o tama, ae o le tele lava o mea e faatino e outou.

Avea foi leni avanoa e faafetai atu ai, i le afioaga o Asau ma Auala i le galuega. E lua galuega na faaogaina ai taulelea o le nuu i le faamamaina o le fanua o le Malo i Masamasa e aunoa ma le totogi. Faafetai tele lava, o le faamoemoe lava o le Matagaluega aemaise au nei o le Minisita, ia faaoga i ina e fai ai se pa povi. Aua o le tele ia o le fanua e ova i le 600eka, la sa faaoga e le Matagaluega o Faatoaga, e fai ai i ina se isi pa povi ma se isi pa mamoe a le Malo, fai ai ma se isi nursery i ina, ma toe lalaga le mea sa tele ai mea sa toto ai, o la e ola ai lava i le taimi nei. Faafetai tele lava i la outou fesoasoani. O le upu a Kennedy, ask not what your country can do for you but what you can do for your country. O le mea tonu lava lena e faavae ai lo outou finagalo malo faafetai.

Avatu foi leni avanoa e faafetai atu ai ma faamalo atu i le Peresetene o le ekalesia Metotisi, malo lava i lau Afioga. Faamanuia atu lou sui usufono, o au nei o le Komiti tumau o la tatou ekalesia, i le faailogaina o le 150 tausaga o le tatou Kolisi Faafaifeau i Piula. Manuia la tatou Fonotaga.

FOFOGA FETALAI: Tapa lau Afioga i le Minisita mo Galuega, Felauaiga ma Atinae Eeseese.

Susuga Hon PAPALHITELE NIKO LEE HANG (Minisita mo Galuega, Felauaiga ma Atinae Eeseese): Faafetai atu i lau Afioga i le Fofoga Fetalai mo lou avanoa.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolaloaiga faaauau i luga o le faitauga faalua – Aso 3**

E muamua lava ona ou faatulou atu i pou o le Palemene ua sasao nei. Afioga lau Afioga i le Fofoga Fetalai, Lau Afioga i le Palemia, lau Afioga i le sui Palemia, ma le paia o le Kapeneta. Afifio foi ia Minisita Lagolago faapea le maave eseese o sui usufono alii ma sui usufono tamaitai o le Palemene o Samoa. O lo o faavailolo foi le paia ma le mamalu o Faauluuluga o Matagaluega faapea Faalapotopotoga tumaoti a le Malo. Susu lau susuga a le Failautusi o le Maota Fono faapea le maave eseese o le Pulega aemaise o le aufaigaluega. Ou te fia faatalofa atu foi i lau tapuaiga Samoa mai mauga tetele, seia paia maua iti, aemaise le loaloa o le Aufaigaluega paia a le Atua i ona fatafaitaulaga e fia, o lo nonomanu i nuu ma afioaga aua lava se manuia o le Fonousu a Samoa.

Ou te fia faatalofa faapitoa atu foi i le paia maualuga o si ou itumalo palota o Nofoa Tu Taulaga i Sasae, malo le soifua manuia, faamalo le tapuai. O le upu masani lava a le atunuu, e le sili le tai i lo le tapuai. O outou sa ma faigata i ona tulaga faalupeina, o le a le oo i ai se faamatalaga a le auauna ae o le a nuunuu atu ma faatalolo atu.

Lau Afioga i le Fofoga Fetalai, ae ou te le i talanoa atu i mataupu sa laga mai i saunoaga a sui usufono mamalu o le Maota. E muamua lava ona fia faamauiina le agaga faafetai, le Afioga i le Minisita o Tupe faapea le Pule Sili o le Matagaluega pulega ma le aufaigaluega. Ona o la outou galuega sa fita i tuga ai, i le tapenaina o lenei Tala Autu Faatatau o le Tupe 2018/2019 lea ua i lumamea nei.

Faamalo le tapena faamalo le tauatai, e faapena foi se lagona e fia faafetai ai i lau Afioga i le Taitaifono o le Komiti o Tupe Maua ma Tupe Totogi, faapea sui usufono mamalu uma o la outou Komiti mo la outou suesuega auiliili i le Tala Faatatau Autu o le Tupe 2018/2019, faapea la outou lipoti maea tapena, ua i lumamea nei. O lo o tuuina mai ai ma ni fautuaga taua, e toe silasila totoa i ai Matagaluega ma Faalapotopotoga Tumaoti a le Malo, aua le agai i luma. Ou te faatauaaina la outou fautuaga i lalo o le Matagaluega o Galuega, MWTI. Ina ia toe silasila le Malo i se auala e toe teuteu ai le Tulafono, o le pulega o Felauaiga i le laueleele LTA, faapea le Matagaluega o Galuega Felauaiga ma Atinae eseese MWTI. Ina ia faamatuu ese mai ai le Regulatory Function mai le Ofisa Sili, CEO a le LTA ma toe faafoi atu i le Ofisa Sili CEO a le MWTI, ina ia maua ai se tutoatasi po o se independence, o le siakiina o galuega, o lo o faatino e le LTA. Lau Afioga i le Fofoga Fetalai, o le fesili ua tulai mai i lou mafaufau. Pe talafeagai ona faatino lava e oe se galuega ma toe siaki lava e oe, ma pasia foi e oe au lava galuega sa faatino? O le tali, e masalomia lava le atoatoa ma le lelei seia vagana ua i ai se independent opinion e famaonia ai lea tulaga. Ou te manatu ua ae se tofa a le Komiti mo lea teuteuga, ona o le tele o galuega faatino mo auala ua faitioina e le mamalu o le atunuu, e faapea e le lelei ona faatino e nisi o Konekarate, o lo o faaogaina e le LTA, mo galuega faatino mo le faaleleia o tatou auala, public roads, aemaise foi o tatou auala galuega.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaaauau i luga o le faitauga faalua – Aso 3**

Lau Afioga i le Fofoga Fetalai, o le tele o sauna a sui usufono mamalu, sa momoli mai ai la latou faafetai i le Malo mo galuega sa faatino, ia viia le Atua. Ae mulumulitai mai foi ma ni faitioga. O le malo nei e talia faitioga talia fautuaga. Ae sa taua e le Palemia, o le Malo galulue, e le faaluelue. O a la ni faitioga, o le a mafai lava ona galulue i ai le Kapeneta e faaleleia tulaga na. O le tele la o talosaga mai ia outou Afioga, e tele lava i aualagalue, faaopoopo mai foi ma talosaga mo ni auala mo turisi. E fou lea ituaiga auala ae le afaina. O le a saili pea le Matagaluega, po o fea tonu o i ai auala ia mo turisi, leaga e taua ona o le atinaega o tourism and industry, e aoga foi mo tagata tafafao mai fafo, ina ia lelei auala e tafafao ai i matafaga.

Maumau lava pe ana tele se tupe faaagaga i totonu o le Tala Faatatau o le Tupe, semanu e faatino uma lava manaoga uma o auala o a outou Afioga, sui mamalu o le Palemene. O le galuega taufaasoosoa lava a le Matagaluega o le LTA, o lo o taumafai e faaoga uma tupe faatatau mo auala galue, ina ia tele ni a tatou auala, mo lenei Tala Faatatau Autu o le Tupe 2018/2019 faatinoina. Ua i ai fuafuaga a le Malo mo faamuamua. O auala ia e tatalo mai, o le a fai le asiasiga, alu atu le asiasiga e tau i tuamaota i mea o lo o faamoemoe e fai ai faatoaga. A alu atu le asiasiga e leai ma ni faatoaga, ia faamalulu atu, toe tuu i lalo le talosaga a lo outou afioaga, ae aumai i luga isi talosaga ia e alu atu le asiasiga e tele atinae la e fai, e faateleina ai foi le tamaoiaiga aemaise a tatou oloa ia e auina atu i fafo i fua o faatoaga.

O le upu moni lau Afioga i le Fofoga Fetalai, toe tolu tausaga o la tatou nofoaiga. O le faamoemoe maua luga lava ina ia faasopolia uma a outou talosaga mo aualagalue a o le i maea tausaga o totoe o la tatou Paeaiga.

Lau Afioga i le Fofoga Fetalai, o le vaiaso na tea atu nei, sa tatala ai nisi o aualagalue e sefulu, e fa mo Upolu ae ono mo Savaii. O le aofaiga atoa o auala sa faatupe i le Tala o le Tupe o lo o faagasolo nei e 12 toe lua auala galue mo Upolu, o le auala o Toamua ma le auala o Aleisa Sasae o lo o tau faamaea. Sa sauna se faafeagaiga mai Salafai sa faapaiaina le auala galue o lona afioaga ma faapea mai, ua manaia tele le auala ae paga lea ua matauina ua fai ma auala e fai ai tuuga taavale a le latou afioaga. E toe faamanatu atu ia outou afioaga uma ia na tatala auala galue, faamolemole o tatou aualagalue e le o ni auala na fai e le Malo mo tuuga taavale. Ae o auala e faafaigofie ai femalagaiga ma agai ai i tua maota e faatoa fanua e fai ai ni atinae tau faatoaga.

Sa taua e sui usufono mamalu le tulaga e uiga i le matagaluega o le PUMA lea i lalo o le MNRE ma tuualalo mai ai po o le a se fuafuaga a le Malo ae toe aumai le PUMA i lalo o le MWTI. O le mafuaaga ona o le poloka o le faia o pemita mo laoa ma maota o le mamalu o le atunuu ona o le tuai o le process a le PUMA e tapena ai le latou development consent (DC) ona faatoa mafai lea ona issue se pemita mo le fausiaina o se Laoa po o se Maota e le matagaluega o le MWTI.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaaauu i luga o le faitauga faalua – Aso 3**

Lau Afioga i le Fofoga Fetalai, sa i ai se talosaga mai se aiga faipisinisi mai Amerika Samoa sa talosagaina se pemita mo le fausiaina o le latou beach resort i Falelatai. Sa oo atu i lou ofisa ona ua fiu e faatali le latou pemita, sa ou tuliloaina le building section a le MWTI pe aisea ua tuai ai le issue iga o le pemita ae tali mai o lo o faatali le development consent (DC) mai le PUMA. Sa ou fesootai atu i le PUMA e tuliloa lenei mataupu, o le tali mai a le PUMA o lo o faatali le fono a se komiti e iloiloaina le talosaga ona faatoa issue mai lea o le latou development consent. Atonu e tele foi ni galuega e faatino e le PUMA ina ia faamalieina uma tulaga o tulafono, e le gata o tulafono o le tatou siosiomaga ia ma tulafono lava e puipuia ai ia tuaoi.

O lo o faitio mai pea le mamalu o le atunuu i le MWTI i le tuai ona maua a latou pemita e faatino ai a latou galuega. E taua la le toe lagalaga ma ia sui mamalu o lenei mataupu se i toe silasila iai le Malo.

E i ai se sui usufono mamalu sa talosagaina ni moli auala mo lona itumalo ae toe faamanatu atu ia outou Afioga le process mo ni talosaga mo ni moli auala ina ia tuuina mai le talosaga tusitusia i le EPC ona tapena lea e le EPC a outou talosaga mo le tauaoina atu i le komiti o le CSO e faatalanoa ai ma pasia.

O le sui usufono mamalu sa fesiligia le Pulega o le Suavai ma le mafuaaga ua le toe maua ai e lona afioaga le suavai taumafai, a o lea ou te matau atu e le o alaala mai le Afioga i le sui usufono. Ae se i faamatata atu pea o la e faafogafoga mai lona afioaga. Lau Afioga i le Fofoga Fetalai o le galuega lea sa faatino e le Pulega o le Suavai i le afioaga lea o Samata ia Tesema 2017 mo le afioaga, o le toe faataatia lea o ni sub-mains se fa mo le toe faaleleia o le suavai taumafa mo le afioaga. O aiga ia e le i tosoina laina fou mo le latou suavai taumafa o le a faatino pe a uma ona totogi muamua i le Pulega o le Suavai a latou pili tuua arrears. Mo le silafia e le sui usufono mamalu ua toe aveeseina mai masini a le Pulega mai le afioaga ona ua fia faaogaina masini mo isi galuega a le Pulega. Ae a maea loa ona totogi muamua pili tuua ona toe foi atu lea o le masini e toe faaola le suavai taumafa mo le tou afioaga.

Sa fesiligia foi e le sui usufono mamalu o Gagaiformauga Nu.3 le tulaga faaletonu o le latou suavai taumafa ona e le maua i taimi uma. Mo le silafia e le sui usufono mamalu o suavai taumafa mo le itumalo e ola mai le pamuvai a Letui, o le tau e faagaoioi ai lea pamuvai e \$88,800 i le tausaga. Ae o pili vai e aoina mai e le Pulega mai le itumalo e na o le \$45,600 i le tausaga, e talitonu o le mafuaaga lea ua faatulaga ai taimi e maua ai le suavai taumafa mo le tou itumalo. O lea la e amata ona tatala mai le suavai i le itula e 4:00 i le vaveao ia ona toe muta lea i le 9:00 i le taeao ona toe tatala lea i le itula e 2:00 i le aoauli ia ona toe muta lea i le itula e 7:00 i le afiafi. Ia masalo a tuufaatasi itula pe 10 itula e maua ai e le itumalo ia le suavai taumafa a o le fautuaga lava ina ia faaoga ni mea e tali ai suavai ona o le tulaga pagatia lea o le tau faasoasoina o tupe a le Pulega ina ia faapena ona ola umi le pamuvai ma faapena foi ona umi le soifua o le pamuvai. Ia aua a umi ona faaoga ae le tapeina ia e mu le pamuvai.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

FOFOGA FETALAI: Ou te vaelupeina le saunoaga manino a le Afioga i le Minisita o Galuega e tusa ia o mea sa laga e sui usufono mamalu ma ou te faamalulu atu, se i tatou talii mai i le tatou malologa ona faaauau lea o le saunoaga.

Na faataatiaese Taualumaga a le Fono Aoa mo lana malologa masani i le itula e 4:43 i le afiafi ma toe faaauau i le itula e 5:39 i le afiafi.

Na toe faaauau Felafolafoaiga i le faitauga faalua o le Tulafono Tau Faaofi o le Faatatauina o Tupe Faaopoopo (Nu.2) 2017/2018 ma le Tulafono Tau Faaofi o le Faatatauina o Tupe 2018/2019.

FOFOGA FETALAI: Ou te faasilasila atu o le a amatalia Taualumaga ma galuega a le Fono Aoa Faitulafono, e fai le malologa o lo o saunoa le Afioga i le Minisita o Galuega. Ia ua ou manatu ua maua foi le malosi faaopoopo e le paia o le Palemene e faaauau ai le tatou fonotaga ma le tatou galuega. Ia ma lou faaaloalo ou te tapa lau Afioga i le Minisita o Galuega Esee.

Susuga Hon PAPALIITELE NIKO LEE HANG: Faafetai i lau Afioga i le Fofoga Fetalai, faafetai mo le avanoa e toe faaauau ai le folasaga a lenei sui usufono. E manatu foi ua saoi le taligasua a lau Afioga i le Fofoga Fetalai aemaise le Afioga i le Palemia ma le paia o le Kapeneta ia aemaise foi le mamalu o sui usufono o le maota ua maua foi se faasiliga malosi e faaauau ai le tatou galuega i lenei afiafi.

Lau Afioga i le Fofoga Fetalai toe tasi lava si mataupu lea sa laga mai e le sui usufono mai le itumalo o Gagaemauga Nu.3, lea ou te matau atu e le o alaala mai le Afioga i le sui usufono. Ae sa fesiligia e le sui usufono le kamupani vaa a le SSC, pe aisea ua le toe tosoina ai le trolley, ai o le kololi lea e avatu ai meaai ma meataumafa se i tulou, e faatau ai meaai i le pasese o le vaa i totonu o le MV Lady Samoa 3. O le tali o lo o faaauau pea ona faia lea auaunaga i luga o le vaa se i vagana ai taimi e faaletonu ai le tau lea e sousou ai le vasa ia ma faigata ona faatino lenei auaunaga ona taofi lea ae o lo o faatino pea lenei auaunaga i luga o le vaa.

O le fesili lona lua pe mafai ona silasila le Faalapotopotoga i se toe fetuunaiga o tuutuuga i le tau toe totogi, changing fee mo le suiina o avanoa o taavale ua maea ona faia avanoa, confirmed bookings e malaga ai le vaa. O le tali o lo o ua toe iloilo nei e le Faalapotopotoga o vaa tuutuuga ma aiaiga mo le toe faatulagaina o le tau mo le toe suiina o avanoa mo taavale e malaga ai i le vaa. O nei suiga ua iai le faamoemoe o le a amata faamamalu i le masina fou.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafaoga faaauau i luga o le faitauga faalua – Aso 3**

Ia lau Afioga i le Fofoga Fetalai, e manatu ua afea uma e le folasaga ia manaoga ma ni talosaga aemaise ai foi ni faitioga mai sui usufono. O galuega uma ia e agai i le faiga o aualagalue o auala public roads ia e le gata i lea o auala sima i luga o vaitafe, auala sima i lalo o vaitafe, taligalu ia ma mea eseese uma sa folasia ia outou saunoaga o lea ua faamauina uma lava ia tou afioaga. Ae tuu mai pea le faatuatuaga o le a faagasolo pea le galuega ina ia maea le tatou nofoaiga o lea toe tolu tausaga ua sopolia uma ia aualagalue o tou afioaga. Ae pei ona ou talanoa muamua atu o le ata lena o tulaga e faataunuu ai tou talosaga ina ia mautinoa o lo o fai ni faatoaga i tua maota aua e leai se aoga e fai ai auala ae na o tuuga taavale mea la e fai i tatou auala. Ia lau afioga i le fofoga fetalai e faauma atu lau folaga i se tamai fagogo lea atonu foi e faatupu manatu ai i sui usufono mamalu o le Palemene lea faatoa afifio mai i le maota fono o le Malo o Samoa.

Mo le silafia e lau Afioga Nafoitoga e malamalama lau Afioga aemaise foi le mamalu o le Palemene. I lou oo mai i lenei Palemene o le 4 lenei o Paeaiga tusa la ua 17 nei tausaga o ou faipule. E i ai le Paeaiga sa ou Minisita ai foi, o le auga aute o le faamatalaga se i tau atu ia outou Afioga ua tolu Paeaiga e leai a ma ni au auala na faia po o ni auala galue. O le aoaoga la lea aua ou te talitonu ou te toe foi mai i le Palota o lou faafeagai ma le itumalo fai mea e finagalo ai le itumalo. E tatou te le malo i ni auala, o auala ia o le auaunaga lea a le atunuu mo le mamalu o le atunuu aemaise tou afioaga aua la tatou te faamoemoe tatou te foi mai i ni palota pe a faatino aualagalue. O lau a mau lena, o tatou tagata foi ua malamalama lelei. O la e silafia e le o ni tupe a tatou lea e fai ai auala ae o tupe a latou, o latou lafoga ia e pisa ai le Minisita o Lafoga e toe sue nisi tupe mai lafoga e toe faatele ai ni tatou auala e fai. A o lou talitonuga lena ma lau mau from my own experience ona o lea ua faafa nei ona ou foi mai ia ou te lei malo ona o ni auala. O lou talanoa a ma pipii i le itumalo ma fai o latou finagalo. Na fai lau survey i nai sui usufono ia na o le tasi a latou Paeaiga ma toe o atu, o le tala mai i nuu ia sa omai ai fai mai, ia na tu a le sui usufono, e le i toe iloa atu latou. Ia pei o le tulaga lena faataua le tulaga lena ae le o auala galue aua o lau tautinoga lena e tatou te le malo i le faiga o ni aualagalue. Ia ona faauma ai lea o se faamatalaga lau Afioga, e fia faamauina foi le agaga faafetai i lau Minisita Lagolago ona sa saunoa foi se sui usufono mamalu ananafi o mea nei o Minisita Lagolago na o le tafafao i taavale a le Malo ae leai ni galuega e faia. E le sao lea faamatalaga leaga o lau Minisita lagolago e fono ma komiti faufautua i masina uma, fono ia maua ma faaululuga uma o le matou Sector i masina uma. A fai fonotaga i Savaii ua ou le avanoa ia o le Minisita lagolago e alu e faatino le ma galuega, o lea la e tau atu i le sui usufono lea na saunoa ananafi ua galo ia te au le sui usufono. Ia ae o le tulaga lena, e le tafafao Minisita Lagolago ia e pisi foi latou e faatino a latou galuega ua tofiaina ai latou. Ia ona faaii lea o se faafetai i Faalapotopotoga ma matagaluega uma o lo o i lalo o le vaavaaiga a le Minisita o Galuega.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

Ia a outou afioga ma a outou pulega ma le mamalu o a outou aufaigaluega, malo lava le galulue. E le faigofie le tatou galuega, tatou te tapena mai a i le amataga pe a maea le Tala o le Tupe tapena galuega ua fuafuaina iai le Tala o le Tupe ia sagai ane lea ai o le tai tatou toe feiloai i le vaiaso fou e tapena se tatou polokalame aua foi le faamalieina o finagalo o le Maota nei i tulaga o galuega ia e faatino e tatou vaega eseese. Ia ae o le faafetai lena ma le faamalo i tou afioga o lo o avea ma faauluuluga o matagaluega eseese ma faalapotopotoga eseese.

Ia lau Afioga i le Fofoga Fetalai, ia agalelei mai le Atua i lau Afioga faafualeva lou soifua manuia faatumu lau utu aua le feagai ai o lau Afioga ma le faatautaiina o le tatou Maota Fono. Ia faapena foi ona molimoli atu faamanuiaga i lau Afioga i le Palemia, lau Afioga i le Sui Palemia ia le maave eseese o le Kapeneta ma Minisita Lagolago ia ma le la foi itu o le malu i Afioga i alii ma tamaitai faipule. Ia faapea foi le loaloa o le paia ma le mamalu o Faauluuluga o Matagaluega ma Faalapotopotoga o lo o tatou faatasi i lenei Fonotaga. Ia ma lou faaaloalo tele lava, soifua manuia le tatou Fono.

FOFOGA FETALAI: Malo faafetai, e le faafuluina foi se upu a le Nofoa i le saunoaga a lau Afioga i le Minisita o Galuega. Ia malo faafetai, o le fetalaiaga a e fai Atua, se togi seu malaga i tila ua faapulou le tualima ua faamalo le fai o le faiva. Faafetai foi i lau Afioga i le Minisita Lagolago le sui usufono o Sagaga le Usoga o lea ua momoli atu le faafetai a lau Minisita, ia o uiga na o le galulue faatasi e vaavaalua i le tuleiga o le matagaluega. Ia e le o tauaso ma laaloa ai le silafaga a le Atua i le afu maligi aua se ai mo le atunuu ma lana tapuaiga ia manuia Samoa.

Ia malo faafetai, ua oo mai le faasologa i lau Afioga i le Minisita Mo Tagata Tafafao Maimoa Mai lau Afioga Sala i lena itu o le Satuala i lau Afioga, ia tulai maia manuia le saunoaga.

Afioga Hon SALA FATA PINATI (Minisita mo Tagata Tafafao Maimoa Mai Fafu): E toe faafetaia lau Afioga i le Fofoga Fetalai, ou te faatalofa atu i le paia o le Maota i le Afioga i le Palemia, lau Afioga i le Sui Palemia ia ae faapitoaugafa se faamatalaga a lenei sui usufono i lau Afioga i le Taitai o le Maota lau Afioga i le Fofoga Fetalai, malo. Ia lena itu o le Maota i le afifio o sui usufono o le Maota ae tainane ia Minisita Lagolago, le paia o sasao nei i le aufaigaluega a le Malo. Ou te manatu ua vela foi le fala i la outou tapuaiga, malo le faatoatoa, malo le onosai ia o le galuega e le i tofia tatou e omai e nofonofo. E malie a le saunoaga a le Palemia, o le galuega e fai faatasi e afoi ia i tatou ona tatou galulue aua itumalo na tofia i tatou. O lea faatoa uma nei a ona fai le fagogo a lou uso a Minisita, o le fagogo e faapea ua faana Paeaiga mai Paeaiga ia e fa seia oo mai i le aso e le i i ai se auala galue ua faatino i lona itumalo. Ia ona ou faaopoopo atu lea ma ou faapea, ia amuia maua aua e le i faatinoina ia vaega.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

O le 12 lenei o tausaga o ou saofai iinei, o le lua lea o Paeaiiga i le Nofoa o le Minisita o le faitau a le matou itumalo i Savaii i Patamea ma Samalaeulu ua ou olegia i latou. E mafua le tala on aua 12 nei o tausaga e le i faia se auala galue o nuu ia, mai le 2006 sa ou lauga muamua ai lava i le lauga faataupou ma taua ai ia auala o lou itumalo. Ae o le tala e fai e ao foi ona o tatou faapea ifo tatou talia po o fea a oo i ai aua foi o le faasoa e faigata ona faasoa le tatou keke lea o le a aumai. Ua ou saofai nei i le Nofoa o le Minisita e le mafai ona ou faapea atu faamuamua au nei, leai ua uma le 5 tausaga na o le tuumumusu a, se alii e alofa maia o lea ou te nofo aitalafu i lou itumalo. O la e faafofoga mai le itumalo a lea na fua mai semanu ai lava au e fai aiga i le Palota ia o fua na o le le fiafia o lou itumalo i lou amanaia o i latou, ae ua i ai foi tala, se o lena e olegia e le tatou faipule tatou. Ia afai o faafofoga mai lou itumalo, leai o le tatou matafaioi lea o tatou o le taitai, a faasoa e faasoa i le tatau, e faasoa i le mea e gafatia i lea taimi i lea taimi. Ae amuia outou, papale mai afai le galuega ae faapefea ia matou nei, faapefea le toatele o lo o faapena ona fai le faiva o le tapuai. O lea lava e fai le galuega e le o faapito manu ia tasi se i tulou lava, ae ou te aveatu ai malu i puega i ina i le tofa. E moomia lo tatou galulue e tausoa faatasi le tatou avega.

Ia ona oo mai lea o sau faamatalaga i nai ou uso mai Falealili, talofa e, se o oulua a e matautia oulua. Amuia ia itumalo ua tofia mai ni toa i totonu o le Maota lenei, e leai se afu e pau fua i le eleele e le fua mai i fua lelei. O lo o sisila le Atua e le i alu vale le malosi. Aisea? A lea ua tino le galuega lea, o lea ua saunoa mai le Minisita o le a faapena ona tausaili le manuia mo outou. O le pepa lea ia te au i le taimi lenei o lo o faapea mai, ua maea faatalanoaga a le Ofisa o le Pulega ma le matagaluega o Galuega Tetele ma le ofisa o le Pulega mo auala ma ua tuuina mai le fesoasoani i le faatinoina o manaoga tau auala pe a mautinoa mai vaegatupe ae ua maea ona faatalalanoa mai ai fuafuaga.

Afioga Fuimaono Teo SamueluTeo: Lau Afioga i le Fofoga Fetalai.

FOFOGA FETALAI: Ia se i tulai mai le sui usufono o Falealili.

Afioga Fuimaono Teo SamueluTeo: Faafetai i le Afioga i le Minisita mo le saunoaga matagofie, o le pepa lea na lau mai e leai ma se mea o tau maia i o le a fai matou auala ia i Falealili, o lana a pepa lea na tusi, ma lou faaaloalo.

FOFOGA FETALAI: Malo faafetai, pei e faale o maua mai e le sui o lena ua i ai fuafuaga.

Afioga Hon SALA FATA PINATI: Faafetai i lou uso, e matai foi ia matou i Leauvaa. E leai ou te le olegia oe i se faamatalaga afai e talanoaina e \$400miliona le tupe na maua mai i le Turisi.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

O le a la le mea o le a le faatinoina ai galuega e saga aumai ai Turisi i Samoa ma faapea ifo e matautia le matagofie o Samoa, ta fia Falealili fua, ta fia Falealili fua.

Mo si ou tama po o si ou uso lea iaTafua, e leai se mea o e tagi mai ai ou te le i faia. E te manatua sa ou i le vaega o Leoleo ua tuli mai ai au ae na ou faia uma a mea na e manao i ai. O le tulaga i mea tau garden toilets o le fesoasoani mai i le sanitation project o lo o faatupeina e Malo a Europa e faau mai la i le Matagaluega o Punaoa Faalenatura ia se manaoga o so o se itumalo lava po o ai lava se sui usufono. Mo lo outou silafia e tasi leni auauana lelei mo le atunuu nei, o fea lava e femalagai ai e oo mai loa le call of nature i tagata e ao a ona saili le mea e alu i ai se i tulou lava. O le ala la lea e tatau ai ona faataua, ia faataua e o tatou sui o i tatou o le faitotoa o tagata mai fafo, ia tatou puipui ia faapena ona tatou tutu ane ma faapea, o au lava o le Samoa. O au lava o le Samoa ou te faia mea silisili ma e manumalo ai lava oe. Tafua o lou uso a sui usufono po o lou tama, e leai se mea e tuua o nei mea uma pau lava o lea ia a maua a ni moa se lua ta te o ai i tua ia ta te o a faatino uma galuega nei, ma le faaaloalo lava.

I le saunoaga a Gatoloi faafetai, e moni o le responsibility a le Kapeneta e collective. O le a le uiga? O le finagalo autasi o le Kapeneta ia ave le Miss Samoa i Savaii. Aisea? O Savaii e faatafunai pe a? Ailoga leaga o Savaii e i ai le upu foi lea, o Savaii o le motu tele e fai mea mafai. O le agaga lena afai e lelei i Upolu nei ma Apia e ao foi on atatou o e ave mea lelei aua Savaii.

Lau Afioga i le Fofoga Fetalai ua maea se tautalaga a le tamaloa mai Leauvaa, pau lava o lea ia faamanuia mai le Atua i lau Afioga ia faapea foi le paia o le Kapeneta i le Afioga i le Palemia ma le Sui Palemia. Ia ae a le Fonousu a Samoa ia faapena ona liligi mai faamanuiaga a le Atua, ia o matagaluega uma a le Malo ua faapea ona tatou faatasi ia outou faamaoni e fai o outou tiute ae ia tautuana ia fai foi ma se alofa. Fai fuafua i tagata, e tu le Malo i le tagata ae le tu le tagata i luga o le Malo, e faavae mea uma i le pulega lelei. A faaletonu le pule po o ai lava e ao foi ona lipoti mai i le aiga Minisita e maua ai le tonu e ao ona sailiili i mea tonu ma mea lelei aua o le tatou lea matafaioi e tatou te faia mea silisili mo Samoa ma lana tapuaiga. Ia manuia, faafetai tele lava mo le avanoa.

FOFOGA FETALAI: Malo faafetai saunoa i lau Afioga i le Minisita o Tagata Tafafao Maimoa mai ma nisi o matagaluega o i lalo o lau pulega. Ia ma ua oo mai le faasologa i le Minisita o le Soifua Maloloina, tapa ma le faaaloalo lau Afioga i le Minisita.

Afioga Hon TUITAMA TALALELEI TUITAMA (Minisita mo le Soifua Maloloina): Ua sausaufialele le manu nai utufiu peitai e le naunau i le lauama na ua e faatali mo le faamuli o atu. O le a ee ia ma papaaao lau Afioga i le Fofoga Fetalai i lou talaga atoa ma lou nofoa vaevaeloloo, le fala na folaloo.

21 IUNI 2018

**Tulafono Tau Faaofi o le Faatatauina o Tupe Faaopopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

Ee foi i mauga o ao le afio o le Afioga i le Palemia le Afioga i le Sui Palemia ma le mamalu i le aiga Kapeneta, ee i fatalele le paia maualuga o Minisita Lagolago faapea foi sui usufono mamalu o le Fono Faitulafono a Samoa o loupe na faia mai le fuifui. Ee foi ma papaaao le paia maualuga i le tapuaiga i faauluuluga o Matagaluega o e o lo o tautua faatupu i le finagalo o le tatou Malo ma le atiaeina o Samoa. E faapea foi lau Afioga i le Failautusi ma le mamalu o e o lo o tautuaina le Fonousu a Samoa i lenei fonotaga. E talitonu e le toe faloina le afaloloa pe toe ta i utumaau so matou leo, aua e le toe faamatieina pe faaitiitia foi i sa matou upu po o so matou leo paia ma mamalu o sa ma faiga a o le a taoto o se ia mai le moana, taoto a o se taotoga a iasa. A o le a liuliu alo o le lupe, taumafai sina upu tau lava ina tali atu ai i le mamalu o lenie Palemene i mataupu na laga ma faafesiligia i Matagaluega. Ae momoli atu le faafetai tele i la matou maitau i manatu na laga ma faafesili mai ua totogo ae ai i o matou loto ma lo matou talitonuga o lea tatou te galulue faatasi aua o ia manatu ma ia tuualalo o le naunautaiga lava lea ina ia manuia ma sologa lelei le auunaga aua le soifua maloloina o le tatou atunuu. Ae le mafai lava ona faamalieina le tatou atunuu i se auunaga faatauvaa, ae taumafai pea le aufaigaluega o le a se mea e oo i ai le taumafai, o le laei lava mo le maa, ma o le tatalo lava ia faapaiaina ma ia auala atu ai le mana faamalolo o le Atua i e o le tatou atunuu o lo o sulufai mai mo togafitiga aua gasegase o le tino faapea foi le mafaufau.

Mai le toatolusefulu o sui usufono sa tutulai ma saunoa i lenei fonotaga, e 12 i latou na afea le Matagaluega a le Soifua Maloloina. Ae ui i lea 12, sa tele lava ina taga tasi o latou finagalo faaalua ma o lea foi e i ai le lagona e puupuu foi sa matou tali i le faavasegaina o mataupu taitasi e le tele ni vaega sa fesiligia ai le Matagaluega. Ou te amata atu i le tulaga o falemai i itumalo faaitumalo i nuu i tua. O le tele o sui usufono sa faafesiligia ma faatalosagaina foi se tulaga faaleleia o falemai i tua, faatasi ai foi ma le auunaga o lo o tuuina atu, ae faananau lava lo latou tauanau ona o le mataupu lava lea tauave i le tele o fonotaga ua tuanai. I lau matau, o lo o nanau pea i ai le paia o sui usufono mamalu ia i ai se fomai pe faaumiumi pe faatele se taimi o fomai e galulue ai i tua i falemai i tua. Ma e atonu o se tali fiafia pe afai e malamalama lelei le mamalu o sui usufono i le taumafaiga lea o lo o i ai nei le tatou Matagaluega o le toe tuufaatasia lea o le auunaga, aua o lea fuafuaga o lo o auala mai ai le faatinoga o lo outou finagalo lea tou te manaomia.

O le tulaga la o lo o faagasolo nei i lea fuafuaga pei ona tuuina atu foi i le Komiti sa feagai ma lea iloiloaga, o lo o tuuina atu ai se auivi i le faatinoga o galuega aemaise lava nuu i tua ona o le talitonuga, o lea sa taua foi ma faaleo i le tele o saunoaga a le tatou taitai le tulaga malemo ua i ai nei le soifua o atunuu o le Pasefika e aofia ai ma Samoa ona o le loloto o le fotuai mai o faamai nei le pipisi.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaaauu i luga o le faitauga faalua – Aso 3**

Ma ua i ai le talitonuga e le gata i Samoa nei ae faapea foi i atunuu uma o i lalo o le pulega a le faalapopotoga o le soifua maloloina o le lalolagi e faaleo pea i le tele o fonotaga faifaipea. Na pau lava le auala e foia ai lea faafitauli, o le toe foi i tua i nuu ma afioaga ma faalatalata le auunaga i nofoaga o lo o afifio ma papaaao ai le mamalu o tagata o le atunuu. O lenei la e auala mai le taumafaiga o lo o fai nei lea tulaga. O le faamaoniga o lea vaega, o le faaiuga o le tausaga nei ma le amataga o le tausaga nei sa faagasolo ai a matou fonotaga ma le faletupe o le lalolagi. Na taunuu mai i Samoa sui o lea foi faletupe, sailiili po o lea se auala e faaoo mai ai le latou fesoasoani mo Samoa e ala lea i le soifua maloloina. Ma o le latou mau ua ogatusa ai le futia ma le umele i lo matou foi talitonuga o le auala lea o lea e manaomia e tatou o le toe foi i tua i nuu ma faalatalata i nofoaga o lo o afifio ma papaaao ai ina ia togafiti gasegase ae le i faatupulaia, po o lea o lo o faapuina i le faaperetania, o le primary health care, po o le togafitiga lea o gasegase faatoa aliai mai ae le i oo ise tulaga ogaoga.nai lo le tulaga o lo o atagia i le tatou auunaga o lo o fai nei, e moni o lo o tele le vaegatupe o lo o alu faapea foi gaioiga o lo o fai i togafitiga maoae e faatino i totonu o maota gasegase, ae a tuu i se isi tulaga, o lea e faatalitali ogaumu seia oo mai gasegase ua oo i tulaga tuga ma o nisi ua le mafai ona toe faafoi i tua le soifua maloloina ma ua maumau ai lava le soifua. Ina ia taofia la ma faaitiitia lea tulaga, e lelei pe a togafiti i tua i nuu ma aiga ae le i oo i se tulaga e moomia ai, aua e oo mai i i lea pei ona maitauina nei, ua agai i luga e ua faaleagaina fatugao ma ua manaomia le faamamaina o le toto, ua 109 i latou o lo o i ai nei i Upolu ma Savaii ua lua fale faamamatoto, ma o lo o faatuputupulaia pea. O lea foi ua amataona tilotilo le Matagaluega i se isi auala ina ia faaitiitia ai ona o le taugata o le faamamaina o le toto. O le tau sao lava ia o le faamamaina o le toto i le taimi e tasi, tusa ma le \$1,000. O mea o lo o faaagaina, o taimi ma vailaau o lo o faaagaina e faatino ai lea auunaga a o lea na o le \$10 lea e tauave e le tatou atunuu ae o lo o tauave e le Malo le isi vaega tele. A fua la i lea tulaga ae faatupulaia, o lona uiga o le tele o le tamaoiga ma tupe e fuafua mo le soifua maloloina, o lona uiga o le a tele ina alu i totonu o le auunaga lea. O lea foi la ua amata ona tilotilo le Matagaluega i se isi auala e faaitiitia ai lea tulaga ina ia gafatia e le tatou tamaoiga ona tauave lea auunaga mo e o lo o ua aafia ai, ae mafua mai lava, o lona tou te silafia, o le suka, toto maualuga. O le suka lava ia, e tasi le aafiaga, e tasi le igoa o le faamai o le suka, ae lima ona aafiaga tuga. Muamua, o le tauaso, e afaina ai fofoga ma le vaai ma oo ai lava ina pogisa le silasila a o tatou tagata. Lua, e afaina ai fatugao lea pei ona ou talanoa atu, e manaomia ai le faamama o le toto. Tolu, o lea ua amata ona e le lava a tatou wheel chair, ua tele ina momotu vae o i latou ia ona ua le mafai ona toe foia le afaina i siama pe afa i aafia i le suka. O lea ua tele ina moomia le tele o wheel chair.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaaauu i luga o le faitauga faalua – Aso 3**

O le tulaga i Fiti lava ia pei ona aumai i le pepa lea foi sa outou faitau ai i le vaiaso talu ai, e tolu e e taoto e aveese se vae po o vae uma e lua i le vaiaso e tasi. O se tulaga maoae lea. O tatou foi, o lea ua amata ona vaai i ai, o lea ua i ai le tatou fale ua fai ai aao faapipii ma vaega o le tino e faapipii, o mea foi nei o mechanics. O lea foi ua amata ona faasolosolo ina tumu le fale e vaai ai mata ona o lea ua toatele tatou, o lea ua ave nisi i Niu Sila e fai ai togafitiga faapitoa ona ua tauau lava ina pogisa le silasila. O ia la tulaga lea ua agai i ai le fuafuaga a tatou, o lea la e faagasolo i tua, ma ou te fai atu, o lalo o lea taumafaiga, o lo o i ai fuafuaga ina ia faaaauu ma faaopoopoina le i ai o fomai i falemai i tua. Ae le i faia lea tulaga, ae i ai tulaga moomia lea la sa faatalanoa ai ma le Faletupe o le Lalolagi, ia faaleleia muamua falemai. E tatau ona i ai ni nofoaga e faamautu ai le aufaigaluega pe a manaomia le i ai pea o le aufaigaluega mo le 24 itula. Ia o tulaga ia. E mafai ona ou talanoa atu i falemai i tua taitasi ma tulaga o lo o i ai i le taimi nei, a o le aotelega lena o se faamatalaga mo le tulaga o tatou falemai i tua, atonu e le o toe mamao. A maea ona faatino le fuafuaga o lo o i ai nei le tatou Matagaluega ona amata loa lea ona faagasolo polokalame ia lea e pei ona ou talatalanoa atu ai.

O lona lua, o lea sa laga e nisi o sui usuofono le tulaga i taavale foi nei e tu i Sataua ae utu mai i Saasaai. O le tulaga lea sa tupu ae le i alu atu le matou asiasiga i le 2015, ona faatonuina loa lea o le falemai lea, aua le toe ave taavale e utu i Salelologa ma Saasaai i pamu ia ae faaaoga le pamu lea e i Asau. Ona faapena lea o le tulaga sa i ai, aamata mai le 2015 e oo mai i le tausaga nei o utu i Asau taavale nei. A o le faalavelave foi o nei fuafuaga e prepaid. E totogi muamua le tupe e fuafua mo le masina ona faatoa mafai lea ona utu ai taavale ia pe a manaomia. O le mea la ua tupu pei ona outou silafia o fuafuaga mo le tuufaatasiga lea lea ua faasee ai le tulaga tau tupe i le Finance latou te pulea, ma e le mafai la ona faatagaina i lalo o lea pulega le tulaga lea o le prepaid o le penisini o lea la ua toe foi ai taavale ia e utu i Saasaai o lae mafai ona utu ai faaaitalafu. A o lena foi utu faaaitalafu, na o le lua vaiaso e faataga ai ua tatau loa ona totogi. A leai, ua le mafai foi ona toe utu ai ni taavale. E pei o le tulaga la lea ua ala ai ona tupu pea le vaega lea ae atonu o lea e faagasolo pea i luma ae o le a silasila pea i ai ma amata ona fai se isi fuafuaga talafeagai ina ia toe mafai ona faaaoga pamu ia e i Asau ma isi pamu e taulalata atu i Sataua. Mo le silafia o falemai ia o tatou i Savaii e tofu lava ma le taavale, e tolu ambulances o lo o i Savaii, e lua o lo o i Tuasivi ma le tasi i Sataua. Ia, o le tulaga lea i taavale. O taavale ia e faaaogaina e le aufaigaluega latou lava taavale lea sa taua, na mafua lea tulaga ona o i latou lava. E pei ona silafia o le taavale ua tofu le falemai ma le taavale e fai agai i ai latou fuafuaga. O le faasoaina o le taimi o le taavale e faaaoga ai peitai, o le vale fuafua e latou lava lea la e sasi ai latou ona faaaoga ai lea o latou taavale ae le o se faatonuga a le Matagaluega e faaaoga a latou taavale.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafaoga faaauau i luga o le faitauga faalua – Aso 3**

O le management issue, e le o se tulaga faapea ua encouraging ina e le Matagaluega lea tulaga leai o latou foi loto fuatiaifo o lea ua misi le faaaogaina ona o la ua call inside i le taimi ua faatino ai lana galuega ma le faaaogaina o le taavale i le isi matafaioi masani, ona faaoga lea o la na ia taavale, ina ia faataunuu pea lana matafaioi a ua le faaaogaina ai le taavale a le Malo, a ua faaoga lana ia lava taavale.

O le totogiina foi o pili lea sa taua e se tasi o le Komiti, o le Komiti o le tatou tupe lea sa taua, ou te faasao atu i le tulaga lea, leaga ua i ai foi isi, o isifo na oo atu ia te au e tau atu le vaega lea, e faapea se ua fiu e faatalitali ua tea le ua fia o i le fale ae le i alu atu lava se isi e e tusi ia le latou pili e fia totogi o ai, ona o lava lea ae e le totogia. E le faatoa tupu la lea o le mea lea.

Lea ua ou vaavaai atu i le litpoti lea a le tatou Komiti o Tupe Faaalu ma Tupe Maua, i lona itulau e 63 o lea e tau mai ai e faapea o lea sa fesiligia foi le Matagaluega, o lea e faapea, o le a o atu ia tagata o le vaeg lea o le finance, e o e asiasi faatasi ma fomai i le taimi e fai ai asiasiga, a tea le mai, ia a e la ua i ai ma latou, ona fai lea o latou pepa ma o. Ou te iloa o se fuafuaga e le talafeagai lea, ia te au lava ia, a faapea o vaega ia o le falemai, o le surgery, paediatric, ophthalmic, medical, surgery, e 5 vaega o le falemai e asiasi uma i le taeao i le taimi e tasi. E toa 5 foi la tagata o le Finance o le a o e mulimuli i fomai ia se i tea se mai leai, ou te iloa o le a i ai se faiga e talafeagai, e fai ai. O le faigofie ia o lenei mataupu. It's a management issue, faigofie ia ona solve. Ae lafo mai ia le faatuatuga i mamalu o sui usufono sa laga le mataupu lea, sao lelei, komiti i lau concern, e i ai fuafuaga e mafai ona fai ai le faafitauli lea, ae faafetai mo le laga o le mataupu lea.

Sa faaleoina e se tasi le mataupu i le Boom Vodka. Taimi nei a ta fealuai i le taulaga ma nuu i tua, toeitiiti lava tofu le faleoloa ma le advertisement la e Boom Vodka. O lona uiga, ua fai lava si taatele o le Boom Vodka, o lea foi ituaiga faamalositino, i totonu o le tatou atunuu. Mo le silafia, o fuafuaga a le Liquor Board, o lea ua i ai nei ia le Ministry of Revenue, lea ua tuu atu loa i ai ma le Ministry of Health, amata i le aso muamua o Ianuari, o le a faasa ai loa ona toe faatauina ia le meainu lea, po o le spirit lea, e ova atu ma le 500mls, aua foi o le spirit lea, e faatau i isi tamai fagu e faapea, e mafai la e tamaiti ona faatau mea ia ma o inu.

Ae lea la ua i ai le... ua ou fialia i le faaiuga a le Liquor Board, e le toe faatagaina ona faatau i lalo ifo o le 500mls. Ia ma le tasi foi, o le foi ua i ai le tapulaa o le malosi, e faatau ai. O le malosi la e faatau ai equal or less than 40% le malosi e faagata ai le malosi e mafai ona faatauina atu. Ae o le allegation lea na aumai e faapea o lea e faaoga ia clening spirit i totonu o mea nei, ia e fai la si matuia o le tuuaiga lea, ma e tatau ona fai i ai se sailiiliga tatau.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaaauu i luga o le faitauga faalua – Aso 3**

I lou lea iloa ua uma ona feiloai ia le Liquor Board, le Ministry of Health ia ma le Inland Revenue e tuuina atu i le SROS ia se sample o le spirit lea fai ai sana legal exercise e saili ai, po o a tonu ingredients le e i totonu o le sipili lea, ina ia faamautinoa ai pe sao ia lea tuuaiga pe leai. Ia po o ni tala faalogo foi ma ni tala faatupu e pei foi ona taatele i totonu o le tatou atunuu i ia tulaga, ae tatau lava ona saili le amiotonu, o lea la o le agai e fai se sailiiliga i le tulaga lea.

Ma o lou talitonuga, so o se sipili fou e tatau ona toe silasila i le Liquor Act po o le registration po o mea tau mainu. Fagumalolosi, e tatau ona aumai ai ma ingredients o lo o i totonu o le whiskey, o a ingredients la e i ai. La e pei o le tatou whiskey lea e i ai, ia o lea e fai i le aano o le talo, ia ao isi foi whiskey e ese foi fualaaui la e faaogaina ai lea e maua ai whiskey e tatau lava ona i ai ia se *prescription ingredients* o lea e i totonu o lea whiskey, lea vodka ma lea spirit ma faapena ae e le o i totonu la o se vaega o le Tulafono, se manaoga faapena, e tatau ona aiaia i totonu o so o se mea fou ne i taunuu mai i totonu o le atunuu. Ia e na o ni nai manatuga e fesoasoani ai i lea tulaga.

Sa taua ia le procurement foi lea, sa tilotilo foi i ai ia le tatou Komiti o Tupe, ma e ou te faafetai ai i lea mea e le alo i le ata o le Laau i le tulaga lea, tele le faaletonu o lenei mea, lea foi ua uma ona outou silasila i faasalalauga i le nusipepa ma le news, i le procurement foi lea sa tupu mai i le falemai, na tuuaina ai foi nisi o tagata faigaluega. Ma e oo mai foi la i le taimi lenei, e le o 100%, e le o 100% o le matou fonotaga o le Board of Directors, o le o le Transitional Board o lo o faagasolo ai nei le merge tilotilo foi i le mea lea, ma faatonuina ai le matou Audit Sub Committee, a le Board, e fai mai se ia silasila i le Procurements of drugs, the entries ma supplies.

A o talia foi le lipoti, ae oo mai nisi ia te au, fai mai e tele foi le faaletonu lea i totonu o le procurement, process. O lea la e faafofoga mai ia le tatou le audit agenda, ona ou talosagaina loa lea e fai se external audit o le procurement o le falemai ma le pharmacy, ona o le faaletonu lea e tulai mai pea Ua uma la ona tali mai le Audit Agendas, o lea faatoa amata i le Aso Lua o le vaiaso lea na tea atu nei, ia le faagasologa o le latou external audit, atonu e sau se taimi, ona manino laia lea o le mata o le vai, e tusa ai ma le tulaga lea i procurement, ae sao lelei ia le popolega ma le silasila a le tatou Komiti e tusa ai ma le latou latou lipoti i lea vaega o le auaunaga.

FOFOGA FETALAI: Ou te fesoasoani atu i le Minisita o le Soifua Maloloina, leai o mataupu e ao ona faamalamalama, ia ae manaia le aumai e faapupuu mai aua o lea ua e saunoa ai i faiga faavae ma faasolo ai fuafuaga a le Matagaluega, ia o a mea uma na ona faailo mai leaga o la e faapena e fai alofa atu foi, a gasea lau Afioga, pe a fai na aafia uma le tulaga lea i le saunoaga a le sui usufono, aua o le tiute lava ia malamalama le atunuu ma sui usufono mamalu, tulai mai le sui usufono.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolaloaiga faaauau i luga o le faitauga faalua – Aso 3**

Afioga Hon TUITAMA TALALELEI TUITAMA: Ia ua maea foi, toe lava o nai vaega ia, ae o le mea sili, e le o faalavelavea ia le tulaga i le,, ae o le tatou boss lea e saunoa, e tatau ona tatou usitai uma i le Afioga i le Fofoga Fetalai, lea la e faauma atu faapea, Komiti Tumama, o le tasi lea vaega o lea e faamamafaina.

Susuga Hon Laauli Leuatea Polataivao Fossie Schmidt: Lau Afioga i le Fofoga Fetalai, ia na faatalitali se i uma le saunoaga a le Minisita, ona o le tulaga lava lea sa ou avatua, e le i faia fua le fai atu, faalogo atu foi ona o le talitonuga ua i ai ia faamaumauga aloaia na aumai i fafo, lipoti na connect mai i fafo. E mafai ona ou tapa ia le na aumai le mea na supply mai ai mea ia, o le talitonuga na lau Afioga ae faafetai o lea ua maua o lea ua fai i ai ia suesuega.

O le mau na aumai mai fafo, e le o se mea e tatau ona inuina le mea lea, o le mea e tatau ona fufulu ai mea faigaluega, i le tulaga e pei ona ou faaali atu muamua, ae lafo atu, lafo atu i lau Afioga ma le agaga faaloalo.

FOFOGA FETALAI: Se tulai mai le sui usufono mo Palauli i Sasae, ia malie lau Afioga i le Minisita.

Afioga Tuifaasisina Misa Lisati Leleisiuao Palemene (Palauli le Falefa): Ia, e fia faamanatu atu i le Afioga i le Minisita, sa laga foi e lenei itumalo le tatou falemai lea i Tuasivi i mea taumafa, faapea le maota gasegase i Motootua. Po o le a le faiga faavae a le tatou Matagaluega, faafetai.

Afioga Hon TUITAMA TALALELEI TUITAMA: Lau Afioga o lea e le i uma lau folasaga, ia ae ona o lou faalavelave lea ua faalavelave mai ai ma latou nei. E oo la i lea toeaina e i ou tua, o lea ou te le i oo atu i ai i le mea lea, ae o lea e faamau. E le i uma lau folasaga lau Afioga i le Fofoga Fetalai, o lea e kava ai mataupu ia.

Lau Afioga i le sui usufono mamalu mai Gagaifo....

FOFOGA FETALAI: O na foi e i ai ia le suafa matai o taatia mai o le Soifua Maloloina, o lena foi e tatau ona i ai se suafa taatia mai i ina.

Afioga Hon TUITAMA TALALELEI TUITAMA: Ia toe lava o le taatia o le tagata le mea lea e fai.

Lau Afioga i le sui usufono mamalu mai Gagaifomauga Nu.3. ia lelei, faafetai atonu o se taimi ona oo mai lea o faamaumauga ia fesoasoani tele i le tulaga lea ua faagasolo atu i ai ona e taua lau mataupu. Ae silasila foi na e saunoa ananafi, e faatino ai lava ananafi ma fuafuaga ia. Ia ae lea ou te fia talanoa i le tulaga lea i le Komiti Tumama, ona e fia avea le avanoa lea lau Afioga i le Fofoga Fetalai, e momoli atu ai ia se naunautaiga o le Matagaluega.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

O lea ua uma ona laugaina i totonu o matou Komiti Faufautua, Upolu ma Savaii, e faamalosia, ma unaia ia o tatou nuu e toe faamaopoopo tatou Komiti Tumama, ona o le matau a le tatou Matagaluega, o se vaega malosi tele lea o le tatou atunuu, e fesoasoani i le unaia malosi o le tatou atunuu, e pei o le tulaga sa aumai i fatia ua sola. O lea la e toe fia faaolaola ia le tulaga lea, ae toe tatalo atu foi i o tatou sui usufono uma o lenei Palemene, e manaia pe afai e tofu uma tatou ma Komiti Tumama i o tatou nuu, o le piitaga lea ma le sootaga lea o le soifua maloloina lea e faamoemoe i ai le faagasologa o lana galuega e pei ona ou talai atu, o le a fuafuaina mo le agai atu i tua, e momoli atu ai ia le galuega lea, ma galulue faatasi ma Komiti Tumama i totonu o nuu, ia mo fuafuaga lava tau i le Soifua Maloloina i le tatou atunuu.

Lau Afioga i le Fofoga Fetalai, ia ona ou faaiu atu ai lea i le mataupu a le toeaina lea ua le lava onosai, i meaai ia, ia e na o meaai lava ia le olaga, o lenei, i meaai ia mo le falemai i Savaii....

Tofa Ili Setefano Taateo Taafili (Aana Alofi Nu.2): Lau Afioga i le Fofoga Fetalai, pe maua se avanoa?

FOFOGA FETALAI: Ia, malie le Afioga i le Minisita o le Soifua Maloloina, tulai mai le sui usufono o Aana Nu.2.

Tofa Ili Setefano Taateo Tafili: Faafetai atu lava i lau Afioga i le Fofoga Fetalai mo le avanoa, sa nofonofa lava ma maitau foi le saunoaga a le Minisita o le Soifua Maloloina, ae foliga mai o lea o le a tau faaiuiu le saunoaga ae e le i afea lau mataupu e pei ona avatu i le falemai faaitumalo i Leulumoega, sa ou faapea au o le a faamuli i ai le saunoaga a lou uso a faipule mai Aana, ae foliga mai o le a faaiu ae le i afea le falemai o lou itumalo,

FOFOGA FETALAI: O lea o le a faaiu i ai.

Afioga Hon TUITAMA TALALELEI TUITAMA: E faapea o lea na e maua mai o lea na avatu i le aotelega o falemai i tua. Silasila foi, e moni na e saunoa ma e faapea mai o lea ua i ai le fuafuaga e tapuni Leulumoega, a o lena ua e silasila i ai e le i leva foi ona uma ona lipea Leulumoega, lea ua uma ona tiles uma totonu o wards. O le isi foi asiasiga i le tausaga talu ai lea e i ai le fuafuaga lea, sa faalelei bathroom tiles uma wards e lua faalelei moega. E le o tuulafoaia la Leulumoega pei ona e saunoa mai ai, o la e foi e i ai ma le fomai i le taimi nei i Leulumoega, full time. Ia, e le o se tulaga la lea o se tuutiai po o se tuulafoai.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

E ui lava o la e i ai fuafuaga mo Faleolo, ae o lena ua e silasila i Faleolo, e leai ni nofoa e nonofo ai fomaini, e tele le anoano o mea e manaomia faatoa mafai ona effect le fuafuag lea a le Malo e tuu i o ona o le isi tulaga foi e pei ona e vaai ua fufusi le fanua i Leulumoega lea e fai ai tulaga ia, ae le o tuulafoaia. O le mea lea e faamanatu atu i le sui usufono, e le o tuulafoaia le tatou falemai.

Ona oo mai lea i le aai lau Afioga, o le taimi nei o tatou gasegase ia e taotoo i Tuasivi, o la e tele le privilege life, o la e flat fee, flat fee, e tusa lava pe lua vaiaso e tasi lava le fee na o le \$15 le fee. Po o le masina e tasi lava le fee, e le totogi asoina, po o le a le tele o aso na o le \$15. Tatou talanoa loa la i meaai, a aumai loa la le meaai, faaopoopo le meaai e eseese pei ona manaomia, o le fuamoa ma le bacon i le taeao, toast pata siamu, peanut butter, polesi. O mea uma ia e alu i le taeao. Uma alu atu le ipu susu e faasusu ai le kofe ma le suka. A faaopoopo uma la le meaai ia e asi, o ai e amoa le meaai lea? O le taimi nei, o lae fua lava e le mai ia lana ia meaai e fia tausami ai, fai i lona aiga, ua lava a sina ia tunupau se tasi ma se ta fasitalo, ona aumai lava lea tausami, malie le loto, e le atoa se \$10 o le meaai. A fai nei la le mea lea ua manaomia ai, ia sauni foi la le tatou motu i Salafai, e tusa lava pe flat fee, ae a totogi loa meaai ia, o lona uiga, e \$50 le taeao, \$50 le aoauli, \$50 le afiafi, ae le taulia ai meaai foi nei faavaiaiga e tai \$25. Lau Afioga, e uma ae le aso, ua ova i le \$100 le pili. Aua la le toe complain mai lava se isi. Afai o le mea lea, o lea la ua uma ona fai le fuafuaga. Lau Afioga, se i silasila i ai, e leai se umukuka, e leai ni kuka o i ai i le taimi nei, a o lea la ua outou finagalo e fai le mea lea, o lea la ua uma ona fai le fesootaiga ma le caterer. O lea la ua omai tagata polofesa e fai meaai, o lona uiga la e i luga atu le tau ma le tau lea na ou tau atua. E amata atu la i le vaiaso lea onafai meaai, a o lea ua uma faatonu le caterer o le a saunia taumafa na, ae na pau lena o se lapataiga e avatu i a tatou gasegase ia sauni ane e amata ona ave tusi apalai i Niu Sila e lafo mai ni tupe e totogi ai meaai ia o le a fai.

Ia, e le augata le tatou Matagaluega e faatino ia mea, e ui lava e le o se matafaioi lea a le falemai, ae i ai lona piitaga ma le Matagaluega o le Soifua Maloloina pe afai e avatu foi meatausami e talafeagai lelei ma i latou o lo o taotoo ai i totonu. E pei la o le share lena a le falemai, ae o le afai lava lo outou finagalo, o lea ua faamalieina.

Lau Afioga i le Fofoga Fetalai, ia tau lava ina ou faamalo ma faafetai atu i le tapuaiga a si ou itumalo o Aana Alofi Nu.1, faafetai i le tapuaiga a Aiga o Faletolu ma Fuaifale, faapea foi le aufailotu ma le aufai tatalo i le tatou itumalo, faamalo i la outou tapuaiga e manuia ai faiva. Ia faamanuia le Atua i lau Afioga i le Fofoga Fetalai faapea foi le mamalu o lenei Palemene. Ia soifua ma ia manuia.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaaauu i luga o le faitauga faalua – Aso 3**

FOFOGA FETALAI: Malo faafetai saunoa faamalamalama i lau Afioga i le Minisita mo le Soifua Maloloina. Ia ma e i ai le manatu ua see mai le faasologa i lau Afioga i le Minisita mo Pisinisi ma Alamanuia ma le tele o nisi kamupani o lo o i lalo o lau vaavaaiga.

Afioga Hon LAUTAFI FIO SELAFI PURCELL (Minisita mo Pisinisi ma Alamanuia): Faafetai atu i lau Afioga i le Fofoga Fetalai. A o le i faia se upu e muamua lava ona faatulou i le paia o le Maota, afio o lau Afioga i le Fofoga Fetalai, afio lau Afioga i le Palemia ma le mamalu o le Kapeneta, Minisita Lagolago ma le paia o lena itu. Tainane foi le afifio o Faauluuluga o tatou Mtaagaluega o lo o vae ma lima i ai le tatou Malo, le paia i le Ofisa o le Fono ma Samoa ua sasao nei. E faatulou foi i le faafofoga a Samoa o lo o mafai ona maua mai lenei fasalalauaga i lenei taimi o le afiafi mai lava i ona ao seia oo i ona iu.

E faamalo atu foi i si ou itumalo o Satupaitea, faamalo le tapuai a o taumafai e fai se galuega aua se sao o le tatou itumalo i upufai o Samoa. Ua ou tulai atu lau Afioga ona e i ai nai sui pe toaono ea lea sa taua Matagaluega eseese ia e i lalo o lau vaaiga i a latou saunoaga. E taumafai lava e faapupuu atu tali ina ia outou silafia o lea ua ou faamauina a outou saunoaga ma outou fautuaga, a o lo o matala lava le Ofisa o le Minisita lenei tou te afifio atu ai pe a le faamalieina outou finagalo.

Sa taua e se tasi o sui usufono le lagolago a le tatou Malo i le private sector. O faiga lava ia a le tatou Malo, e le tau faalaulauina atu le tele o le fesoasoani a le tatou Malo i le private sector. O lo o galulue faatasi lava le tatou Malo ma le private sector. Aisea? Aua e faataua e le tatou Malo le sao o le private sector, o le private sector e drive ina le tatou economic development. E leai la se manatu o le Malo faapea e faatuatuanai le private sector pe afai o le manatu lea. O lo o galulue faatasi lava le tatou Malo e ala i le tele o auala ina ia tatou soosootauau ma le private sector ma uunai le development o le tatou private sector. Pei ona silafia o le vaiaso foi lea na tea nei sa fai ai foi le laugatogi o le export award, sa lagolago malosi foi e le tatou Malo tulaga ia. Aisea? Ina ia uunai le atiaeina o i latou o lo o fausia oloa i totonu o Samoa mo le agai atu i fafo. O lo o i ai le tupe faaagaaga lea foi e i totonu o le budget pe \$200,000. O le vaiaso lea ona faasafua atu foi lea i tua i le private sector ;lea ua lautogia e maua lea fesoasoani. E i ai foi tupe a le tatou Malo lea o lo o ave i lalo o le small business. Tasi foi lena development a le private sector e \$450,000 atoa ai ma isi lava mau fesoasoani a le tatou Malo pei o tax credit, o duty concession, o tulaga uma na o faiga faavae na a le tatou Malo lea e fesoasoani i le private sector. Atonu e i ai nai mea laiti foi nei e pei e foliga mai e tau eseese ai i isi taimi, a o le manatu atoa o le Malo ia develop le tatou private sector i tulaga uma ina alualu agai i luma le atinae o le tatou Malo.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaaauu i luga o le faitauga faalua – Aso 3**

O le tasi o sui usufono sa faapea mai pe i ai ni fanua o le tatou Malo e omai i ai nuu i tua e develope ai ni commercial farming. O le tali puupuu atu lava i le sui usufono mamalu, i le taimi nei e le o i ai ni tatou fanua i le tele lea e 50 agai i luga, po o le 20. Ua utiuti lava fanua o le tatou Malo ua faamalosia lava e le tatou Malo i le taimi nei aemaise le SLC o fanua i lalo o lau vaavaaiga, a e le faaaogaina le fanua, ua sei ese le fanua ma oe. E i ai lava nai tulaga ua saisaitia ai le SLC ona o feagaiga na fai pei ona taua e se tasi o sui usufono, o feagaiga na fai ua saisaitia ai ua le mafai lava ona tago atu le SLC e sei ese mai fanua ona o tulaga ia. A o lo o galulue ai loa a le SLC i se auala e mafai ai ona faataunuu manaoga ia e sei ese mai fanua. A o le tulaga e i ai, o i latou uma lava e i ai fanua tetele nei, o la e ua latou silafia, 'Use it or lose it.' O le policy lena o lea e i ai nei, a e le faaaogaina, e tele lava le avanoa e sei mai ai. O fanua fou lea ua ave nei e tagata o la e ua faaopoopo i ai le mea lena, a le faaaogaina le fanua ua se i ese mai le fanua mai ia oe. Ia atonu o se taimi ona maua ai lea o ni tulaga faapena i le sui usufono mamalu, ae lelei lava le aumai o sau tusi e taatia i le SLC, e le iloa lava manuia e ono tulai mai.

Sa taua le tatou Apprentice Scheme e nisi o sui usufono. E faamalo atu. O le tasi foi lea fesoasoani a le tatou Malo i le private sector i le uunaia o tomai o latou e faigaluega e iu mai i le Apprentice Scheme le fesootaiga lea ma le NUS. O le taimi nei o lo o review le curriculum e le NUS ma le SQA i le auala e mafai ai ona siisiitia pea i luga tomai e aoaoina i lalo o le tatou apprentice scheme ina ia comparable ma tomai ona faapea lea e maualalo le level o le tatou apprentice scheme mai isi atunuu, lena la o lo o galulue ai i le taimi nei. O lo o i ai foi i le review lena le avanoa e toe faaopoopo ai nisi trades skill se lua i le fitu lea e i ai nei pei ona taua e se tasi o sui usufono. E sao o tatou skills nei e faamoemoe e faaopoopo i ai e lavea ai auto electronics o leitio ma taavale i lenei vaitau ua tele lava ina electric tulaga uma atoa ai ma le panel beating. O le lua la lena o lea e fia faaopoopo i totonu ia, ae pei ona fai atu, e fuafua i le review o lo o fai nei pe mafai e le tatou provider o letatou theory side o le scheme ona faatino. E fuafua foi i le curriculum a le NUS pe mafai ona latou faatinoina.

Sa taua foi e i ai nisi tomai, ae o mea uma lava o manatu lelei. A o le taimi nei, o le tatou Apprentice Scheme is trades focus, e focus lava trades foi nei tatou te masani ai ae le faapea ua tapuni ai i ina le fale aua ne i toe ofi atu nisi. [Atonu lava e i ai se taimi pei o mea ia o domestic duties skills ma tulaga faapena.](#) Atonu e i ai se taimi, a o le taimi nei o lo o focus lava i trades lea tatou te masani ai, ae le faapea ua tapuni ai i ina le fale aua ne i toe ofi atu nisi Toma i le lumanai. Atonu lava e i ai se taimi pei o mea ia o domestic duties skills ma tulaga faapena. Atonu e i ai lava se taimi, ae taimi nei o lo o focus lava apprentice i tatou trades ia lava le toatele ma lava le siitia o tomai o tatou trades people.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

Sa taua mataupu tau le safety at the work place e se tasi o sui usufono e faapea e link atu agai le apprentice scheme. Ia, atonu foi e i ai se auala e mafai ona fai i le tulaga lea. A ia manatua foi o le university o mea lava tau theory, ae a oo mai loa i le practical, o fale faigaluega lea la e pipii atu i ai le Matagaluega o Leipa i le tulaga lea i le faataua o le saogalemu, safety at work po o le occupational health safety. E faataua tele le tulaga lea i le Matagaluega ma o le masina foi lea na fai ai awards e ave ia i latou o falefaigaluega tumaoti, o galuega a le Malo ua faamaonia i asiasiga ua latou ausia le tulaga o le saogalemu i totonu o falefaigaluega mo tatou tagata. Atonu o lea na maua i se tasi o sui usufono e faapea ua i ai se faatonuga a le MCIL ia tofua le pamu penisini ma le forklift. Atonu e mau sese lea tulaga. A faapea e i ai se tulaga faapena, masalo ai o mea ia e feaveai ai kalone 44 mea foi nei e tai lua pau. Ia o mea e tatau ona fai, e pupui ai le saogalemu o tagata faigaluega. Afai o ni kalone 44 e tatau ona fesiitai, e tatau ona faatau e le employer ia mea faigaluega e faaitiitia ai le aafiaga o tagata faigaluega. O tulaga na o labour safety standards, lea ua tatau ona oo i ai lo tatou Malo. E le tatau ona toe feamoai e nisi ia kalone mamafa, ona ua alualu i luma lo tatou atunuu. Ae e leai se faatonuga a le MCIL e faatau ni forklift o tagata e faia, ia tei ua sese ia le mau a le sui usufono. Ona oo mai lea i le sui usufono mo Vaimauga, o le sui usufono lenei e ese lou fiafia i ai, o lana mataupu lava lenei, ou te sau ananafi ua uma ona tusi mai le tali o mataupu a le sui usufono lenei mo Vaimauga aua ua ou iloa o lana mataupu foi lenei lea foi o le a toe aumai mo lona itumalo. O le tali foi lea ou te avatua i ai, lea na ou avatua muamua foi i le isi a tatou Fonotaga, o le tali lava lea, lea na ou tago atu toe aumai, lea foi o le a toe tali atu i ai.

Ua uma ona fai fuafuaga a le Malo i fanua nei i lou itumalo. E le na o lou itumalo foi lau afioga, o lea ua fai i ai fuafuaga ia a le Malo i le tau e faatau ai fanua. Ua leva ona alaala ai itumalo ma o latou faaaogaina, a o fanua o le Malo. E leai lava se mea a le Malo o maua mai ai, sa nofo fua ai lava. O lea la ua tago atu le Malo e fuafua faalelei ona fanua. E le na o le Vaimauga e lavea ai foi ma Faleata, la la ua fai lava finauga ma Faleata, lea ua toamalie, la ua faagasolo ua faatau o latou fanua. Ae pei o i Vailele ma Letogo o lo o i ai lava nai faafitauli. Ae o le tau lena ua uma ona iu i ai le fuafuaga a lo tatou Malo, lea ua uma ona logo atu ai le itumalo. Ma e i ai foi options na ua avatu, atonu e le talia uma e tagata. Ae toatele lava ua o mai, ua manao lava latou e faatau o latou fanua ia i le tulaga lea ua avatu i ai e le malo, e pei o le tulaga lea na saunoa i ai le Palemia, ua mananao latou e faatau, ae o le faalavelave, o lo o taofiofia i faafitauli ia i totonu lava o le nuu ia. O lea e faapea mai e tatau ona \$8,000, e tatau ona avatu fua. Ae o le tali moni lava lena i lau Afioga, o le tau lava lena e \$35,000 i le kuata eka. O lea ua alu ai uma lava ma isi foi nuu. O faiga faavae na o lo tatou Malo. O fanua ia ua tuu atu i tua o lea ua tau o fanua faaleaganuu, a o fanua a le Malo. O lea sa faamalamalama atu e le Palemia le mea e tau ai faapena a o fanua o fanua a le Malo.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

E faamalulu atu i le sui usufono. E pei ona fai atu, se alu atu ta talatalanoa, e i ai isi mea laiti na e pei ona e fai mai ai, fai mai o fanua e eseese tau, ona o le tulaga o fanua. O lea e te taua faapea o fanua o Fagalii o water catchment area. E i ai lou talitonuga afai o ni water catchment area, e le tatau ona nonofo ai ni tagata. Aua o le mea o la e faamoemoe le Malo ia aua nei taina i lalo laau. A o lea e maua atu, o lea e te faapea mai, o nisi na o fanua. O le mea la lena, afio atu ta talatalanoa ma sei tilotilo lelei i faafanua po o fea fanua na, ona fai lea o ni fuafuaga. Ae e te nofo lava seia oo foi i le taimi e fai mai ai lauga ona sau lea. Ia o lou aluga foi lena faatoa ta feiloai foi i i. La e matala lou ofisa ta te talatalanoa ai, ma avatu ai le Pule sili o le Matagaluega a le SLC, e vave ai lava ona foia faafitauli o lo o tulai mai. O lo o i ai si aiga lea e faapea i talane o le malaevaalele. O le naunautaiga lava i le mea o lo o taumafai i ai i si aiga lea, ona o le saogalemu. O le saogalemu ne i te i ua i ai se afaina i se faafitauli e tulai mai i se vaalele. O lea la ua faapea mai i le taimi lenei, ua leai se fanua o le Malo e ave i ai, ia pau la ia o fanua e ave i ai o Vailele. Ae e alofa foi i si na foi aiga. O lea la na tuu atu ai e le Matagaluega i le alalafaga, e sue ane e outou pe i ai se fasifanua iina, ae mafai ona avatu i ai le aiga lea. I le taimi nei, o lo o fai feutagaiga i le itu le la, pe maua sina fasi fanua e ave i ai. Aua o la foi e manao mai e compensate atu. O mea na e talanoa ai lava le Matagaluega ia ma le aiga o lea e aafia. E faapena faiga faavae a lo tatou Malo, ona o lea o le a aveese. Ae leaga la o le a aveese ona o le faamuamua a le Malo mo le saogalemu o le aiga lea. E le se aveese faapea o se isi lava tulaga, ae te i ua tupu mai se faalavelave. E faapena foi le malae vaalele faavaomalo, lea foi na oo i le tulaga faapena. O lea lava e faagasolo i le taimi nei. O lau fautuaga i le sui usufono mamalu, se alu atu ta talatalanoa ma avatu sat a panikeke e ai.

O lea e te talosaga mai i fanua e fai ai malae o au aoga tulagalua i Fagalii ma Letogo. O Letogo lena ua avatu i ai tusi a le Matagaluega i ai i le alaafaga. E alu atu le asiasiga a le Matagaluega, ona tilotilo lea po o fea se mea e ono agavaa e faatino ai le manaoga lea. O Fagalii, o lea ou te le o maua po o, o lea e faapea mai le Matagaluega e le i oo atu se talosaga. Afai o lea faatoa aumai lau talosaga, se i faaoo atu i le Matagaluega, se i o atu foi e tilotilo po o le a tonu le auga o lo outou manao. Ae o galuega lava e mafai ona fai, pe a lava le taimi e tuu mai ai o outou manaoga. Ma fuafua foi, e le faapea o fanua o le Malo e tupu pea, *we can only do so much with a certain amount of land, afai la o lea e manao mai i mea e nonofo ai tagata manao mai aoga, we can only manoeuvre so much.* E taumafai lava ina ia faamalieina outou finagalo.

Sa taua e le sui usufono le maketi faapea ua tau le sao tagata i totonu. Le sui usufono mo Salega, o lena foi ua uma ona logo atu lou finagalo i le Matagaluega, o lo o i ai lava le Matagaluega e feoi ai i o. Afai o se mea foi lea ua o atu ua faalalava mai talo a isi la ua muamua atu. O le faiga lava lena o le maketi, o tagata mai i ma o le tatou atunuu, o lea e tauva i i, i le isi lea e pito atu lava i luma.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

Ae o le a logo pea i le Matagaluega, se i faaavanoa lelei mea e o atu isi la e tuai atu, a o la e avanoa le mea e o ai i totonu. Pe afai o le tulaga lena sa e silasila i ai, ua tau faanoinoi tagata ua le mafai ona sao atu i totonu ona o le toatele o le au faatau, ae o lo o tele lava le avanoa i totonu o le maketi.

Sa taua e se tasi sui usufono tupe maua a le MPE, o la e alu atu i le tatou tala i le tupe, o le tausaga faaletupe lea o le a uma nei, e \$31/2miliona le tupe na e allocate o tupe maua a le MPE ma le \$4miliona i le tausaga faaletupe lenei. E pei o tupe maua a le MPE, e ala mai lea dividend le vaega foi lea o Public Training Bodies ia e faamoemoe i ai le Malo. O le naunautauga lava ia faatele lava lenei tupe i tausaga uma. O lo o galulue pea i ai le Matagaluega ina ia faatupu ia tatou tupe nei.

Ona ou oo mai lea i le tatou vaalele, lau Afioga i le Fofoga Fetalai, ua tele lava foi saunoaga sa taua ai le vaalele i la tatou Fonotaga lenei. E pau lava se tala a au nei, o le Minisita o lo o vaaia lea vaega, e momoli atu lava le faamalo ma le faafetai. E lagona lava le eseese o faaupuga na fai i le amataga o la tatou vaalele, ma saunoaga ia ua saunoa mai ai o tatou sui usufono. Ua lagona le lagolago ua tuuina mai. O ai nisi e taitaia le lagolago o a tatou atinae? O outou Afioga. O tatou o le Malo, o tatou e taitaia mea e lagolago ai a tatou atinae o lo tatou Malo. Ona mafai foi lea ona tilotilo mai le atunuu, o tatou alaalfaga o lo o tatou represent ina i inei. Tatou te solomua ona lagolago ona omai foi lea o latou. O tatou aiga mai fafo, e mulimuli lava i mea o lo o i ai tatau o le Malo, taitai o alaalfaga o lo o alaala ai.

O le talosaga la, ia outou silafia e manaomia le lagolago a lo tatou Maota nei. E manaomia le lagolago a Samoa atoa. E i ai le faaupuga lea sa fai e le Minisita o Aoga i le isi a tatou Fonotaga, takes a community to raise a child, a o le mea lenei o le vaalele, i lau faitau e mafai ona fai le upu faapea, “it takes a country to run an airline.” O le manatu tonu lava lena, ia lagolago uma lava tagata, se i tupu ma matua la tatou atinae lea, ona fua mai lea i ni fua e toe maua ai ni faamanuiaga a lo tatou atunuu. O le tagata Samoa e Samoa maioi, o lona tino o lona fatu o lona agaga o lona mafaufau, e tatau ona faaali ii. Lagolago le atinae a Samoa, ae le o le alu femalagaai solo i isi vaalele, ae fai mai o ia lava o le Samoa moni. O lea foi e faataitai e le Afioga i le Minisita o Faatoaga. Eat with your heart, not with your mouth. Ia loto nuu, ia faatau a tatou talo, e ese le manaia o ia ituaiga faaupuga. O le faaupuga foi lena o lea e fia fai mo o tatou tagata i la tatou vaalele. O mai, o la tatou vaalele lenei. Ou te le iloa lava po o le a se isi auala e faaali ai lo outou loto Samoa, ma lo outou tinou, ina ia atinae Samoa. O tatou uma o Samoa. O le tatou vaalele, e le o se vaalele a le HRPP, e le o se vaalele a le Polenisia, e le o se vaalele a le Kapeneta. O le vaalele a Samoa atoa. E mai lava i Saua seia paia Agalega, o Samoa na e ona ina le vaalele. Samoa o lo o i Amerika, Niu Sila, o Ausetalia, o la tatou vaalele lenei. O mai laia, o le talosaga atu lena.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

Alofa le Atua i Taulumaga o la tatou Fonotaga. Lau Afioga se i ou pai atu lava i si o tatou itumalo. Si ou itumalo pele o Satupaitea, faamalo le tapuai. O upu a le atunuu, o faiva e tapuaia e iu ma le manuia. O lena ua taumafai atu so tatou leo i lenei afiafi i le Fonotaga a le Palemene o Samoa. E ui ina tatou le feiloai soo a o lena lava ua faatino a tatou galuega. O lena ua maea a tatou atinae e lua. O lena faatoa tatala le auala i Satufia i lena vaiaso. O lena foi ua maea le phase muamua o le tatou falemai. O le galuega lena e tua i ai lo tatou Malo i aso o i luma. E faamalo atu i lo tatou pitonuu i Satufia, faamalo i lo outou talimalo. O ane laia e vaai faalelei lo tatou auala, ia matua fai ni a tatou atinae, ina ia taunuu ai le talitonuga a le Malo, na fai ai lo tatou auala galue. Ia faamanuia le Atua i lo tatou itumalo.

Lau Afioga, ua iu atu ai se leo o le sui usufono nei. Faafetai atu i nai au CEOs o le sector o lo o ou vaaia, malo le galulue, malo lo outou lagolago mai, o fautuaga lelei tou te aumaia. Faamanuia atu foi i CEOs uma a lo tatou Malo, malo i lo outou onosai. Manuia le Fonotaga soifua.

FOFOGA FETALAI: Faamalie atu i lau Afioga i le Palemia, tapa lau Afioga ma le faaaloalo mo se lafo.

LAFO MO LE TOE FAAAUAUINA O ITULA FONO

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai e momoli atu le faamalo, o lea e talavou le po, ua ou manatu ai ua tupu mai le agaga fia galue, e faatu atu ai se lafo, ina ia tatou faaauau e le o toe mamao pe ta le 2:00 ua pasi le tatou Tala i le Tupe.

Lau Afioga i le Fofoga Fetalai, ou te faatu le lafo, *Ina ia faaauau le Fono seia pasia le Tala Faatatau o le Tupe 2018/2019 i le po nanei po o le vaveao foi o le aso a taeao.*

Faalua e le Minisita mo Pisinisi ma Alamanuia ma le Minisita mo le Soifua Maloloina.

Na faamaonia le lafo.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe 2018/2019.

FOFOGA FETALAI: O le a faauua le tatou Fonotaga ma le galuega seia tatou taunuu i le pasia le Tala Faatatau Autu o le Tupe 2018/2019, e pei ona faatuina mai le lafo e le Palemia.

Tapa ma le faaaloalo lau Afioga i le Sui Palemia.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaaauu i luga o le faitauga faalua – Aso 3**

Afioga Hon FIAME NAOMI MATAAFA: E tulai ma tuatala i le ava e tatau ai i luma o le Fono Faitulafono a le atunuu. Le afio a lau Afioga i le Fofoga Fetalai faapea sui usufono mamalu. E faaaauu atu le tatou felafolafoaiga i luga o le Tala o le Tupe o lo o faapea ona taatia i le Laulau a Fono. Ma e ou te faatalofa atu ai i lau Afioga i le Fofoga Fetalai ma le mamalu o le Maota, e i ai se lagona ailoga e umi naua se faamatalaga e le i tele naua ni mataupu sa saunoa mai ai sui usufono i Matagaluega ma matafaioi o lo o ou tauaveina.

Lau Afioga o le a soosoo atu le mataupu lea i fanua ma lisi. Ou te manatu o lea ua saunoa foi le Afioga i le Palemia, e umi foi lana faamatalaga i le Tala Faasolopito o a tatou auala aemaise o fanua o le Malo, i le lisiina ma le faatauina, o lea foi faatoa maea atu le folasaga a le Afioga i le Minisita o le SLC, e faapea foi ona faamalamalama atili nisi o mataupu sa laga mai.

O le a ou le tautala la i le tulaga o le lisi ma le faatauga o fanua, ae pau lava le mea ou te fia talanoa puupuu i ai o le vaega lea o le Water Management po o le tausiga aemaise a tatou Fanua Apovai, Water Management Areas. Ma e o lo o i ai lava le naunautaiga i le saunoa mai foi o sui usufono e lafo atu ia fanua ia e pulea e tatou nuu ma afioaga.

Lau Afioga i le Fofoga Fetalai ma le mamalu o le Palemene, o tatou fanua apovai, e ese le taua, aua o lea lava ua tatou molimauina, e le gata i le talafatai i Apia aemaise o itu e fia o le atunuu le afaina o nuu ma afioaga i lologa o vaitafe. Ma e mafua lava lea ona ua afaina lo tatou fanua apovai, ua tele le ta o eleele, ma ua le mafai le taofiofia o le suavai ma mitiia e le eleele, ona o le taina ma le faaaogaina foi i atinae. O uiga feteenai lava ia o le soifuaga o lo o tatou i ai, o le tuufaafegai o le manao i le atinae ma le faaaogaina o tatou eleele, ma tatou taumafai e puipuia mai a tatou alaoa faalenatura e pei o le suavai, ina ia mafai ona faaaauu gafataulimaina mo tupulaga fai mai. Ma e ua i ai lava se vaaigna a le Matagaluega lenei, o se tasi lenei o vaega e ao ona ave i ai le faamuamua ma faamalosia ai a tatou tulafono e faamaopoopo ma puipuia mai o tatou nofoaga ia o fanua e apoina le suavai. Ma ou te faamoemoe e mafai ona galulue faatasi le tatou Malo ia ma afioaga foi aemaise le pule a alii ma faipule, ina ia faapea ona tatou faamaopoopoina mai lea punaoa faalenatura, ma e ou te lē tau faamatalaina le afaina o le soifuaga faaletagata pe a oo ina faaletonu a tatou vai.

Ia lau Afioga i le Fofoga Fetalai, e laga mai pea e sui usufono mamalu o le Maota ia tatou taligalu ma a tatou talivai. Ia ma e ou te faamalamalama atu foi a outou Afioga, o tatou taligalu o lo o puipuia mai a tatou aseta, e pei o auala ma tulaga faapea, e tele lava lea ina gafa ma le LTA, a o le lautele o le puipuiga o le gataifale e ala i taligalu, e faapea foi tafatafa vai mo tatou talivai, ia o lo o faapena ona taumafai atu i ai ia vaega eseese o le Malo, e i ai foi ma lenei Matagaluega, e tauala atu i le faatupeina i nisi o poloketi o lo o fesoasoani mai ai ia nisi a tatou paaga.

21 IUNI 2018

**Tulafono Tau Faaofi o le Faatatauina o Tupe Faaopopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

Mai le taimi nei e latalata i le selau talosaga mo taligalu ma talivai, ma e le i taitai afa le faasologa lea, ae o lo o faapena lava ona faamauiua ia talosaga o lo o tuuina mai, ia ma faapena ona tuuina i le lisi o lo o faasolosolo ma faapena ona faaoo atu i ai le faasoasoa i a tatou polokalame o lo o faatulaga i lea taimi ma lea taimi.

Ae ou te fia faaogaina foi le avanoa e talatalanoa atu ai e saili foi so outou finagalo o a outou Afioga o alii ma tamaitai sui usufono, o vaega uma ia o le puipui mai o le tatou siosiomaga, ia e i ai lava ia vaega ia e pei ona galueaiina ai a tatou taligalu tetele ma talivai, ae i ai foi a tatou gaoioiga e mafai ona fai i totonu lava o nuu ma afioaga i le totonu o laau i o tatou elelee apovai, e fesoasoani lea i a tatou vaitafe ma tulaga o lo o ua amata ona faatuputupulaia le lolovaia o a tatou nuu ma afioaga. E tele lava le aoga o le toe toto o elelee po o fanua nei, e le gata i lea o le gataifale i le puipui mai foi i le galu ma le siisii o le tai e pei ona maitauina e le gata i Samoa, a o le lalolagi atoa ona o le suiga o le tau. E foliga mai e ono tagatasi le tatou vaai e faapea, o le fai o taligalu ma talivai, o le fofu lea o le tatou faafitauli.

Lau Afioga i le Fofoga Fetalai ma le mamalu o le tatou Palemene, na ona tatou tau togafiti mea o lo o tulai mai, ae o le fofu o le mafuaaga ua faapea ai ona faaletonu ia tatou, o le tatou faatamala foi o tatou i itu nei o le puipui o le tatou siosiomaga. E atonu o le siisii o le sami o le suiga o le tau o se mea e le o mafai ona tatou fofoina i se tulaga foi lea, aua i gaoioiga a atunuu tetele, ia ma le kasa o lo o faapena ona suia ai le tau, e le o se mea o lo o tele ai se sao o atunuu laiti e pei o Samoa. Ae peitai, o lea lava o lo o afaina ai i tatou. E tau feoloolo mai Samoa ona e mauga ia le tatou laueelelee, ae talofa i nisi o tatou tuaoi i le Pasefika, e faapena ona o atolls o atumotu mafola, ia o le tele ia o le afaina o latou. Ae o le a le aveia foi le mauga o tatou e tatou te nofonofu ai ma tatou le taumafai e foia ia faafitauli o lo o tulai mai, ma e ono faigofie lava le vaiga i le sima e fai ai ia le taligalu po o le talivai, ae tele lava isi auala e mafai lava ona tatou galulue ai tatou i totonu o tatou nuu, i o tatou lava laueelelee ma o tatou laufanua, e toe tau putiputi mai ai ma puipui ia le siosiomaga ua afaina ona o tatou lava gaoioiga.

Ia a o faamatalaga lena o polokalame o lo o faapena ona faasolo mo taligalu ma talivai. E tai pei foi o le tatou talanoaga lea e fai i auala, na saunoa atu foi ia Afioga i Minisita o lo o nafa ma ia foi atinae, e faapena lava ona tuufaasolo i luga o talosaga o lo o taatia mai pea.

Lau Afioga i le Fofoga Fetalai, ou te talatalanoa pea i le tulaga o le siosiomaga, e faatauiina ai le lagaina mai o mataupu ia i o tatou togatogo. O togatogo e i ai le faaupuga i totonu o lio faale-Siosiomaga e faapea, o se faatupu elelee ia togatogo, ma e o le itu foi e ao ona tatou ave le faataua ma le faamuamua i o tatou togatogo, e le gata i le itu lea o le sosolo ai o le elelee, ae pei foi ona outou silafia, o nofoaga ia e faafailele ai nisi o figota ma ia o lo o faapena ona tua foi i ai le fofoga taumafa ia ma nisi foi o pisinisi o lo o faavae i luga o ituaiga gaoioiga faapea.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaaauu i luga o le faitauga faalua – Aso 3**

Ma e tusa ma le lua masina talu ai, sa fai ai le aso faapitoa o laufanua lalovaia, e lavea ai la ma togatogo, pei la sa i ai se vaaiga i le talafatai o Apia, ia a o togatogo lava o lo o soo ai lo tatou atunuu ma o le isi atinae taua lea e mafai lava ona gafataulimaina e tatou, e mafai lava ona tatou gaoioi i ai i totonu o tatou nuu, e faapena ona toe faatupu ma toe faaola ia tatou togatogo.

Lau Afioga i le Fofoga Fetalai e laga mai pea ia le tatou vaega lea o le PUMA, na faaalua nisi o finagalo o sui usufono, pe le ua tataua ona tuuina atu ia le PUMA i lalo o le Matagaluega o Galuega, ina ia faafaigofie ai le maua o pemita, e le gata i pemita o le fausaga o fale e pei i ai ia le matafaioi faatulafonoina a le Ofisa o Galuega, ae faapena foi ona fai i ai ma le gaoioiga foi o matafaioi a le PUMA, o le vaai lea o le aafiaga o le siosiomaga, aua o le uiga lena o le pemita o le PUMA, o le aiaia lea po o a aafiaga o le siosiomaga i a tatou atinae e fai.

Ae o lau faamalalamaga puupuu lau Afioga i le Fofoga Fetalai, o le tatou Tulafono o le PUMA na fai i le 2004, ma e sa faavae i luga o le agaga e moomia ia se vaega i totonu o le Malo e faapea ona gafa ma le vaaiga o le atinae gafataulimaina, sustainable development, ina ia le tuusaunua ia atinae i totonu o le atunuu, ae tataua ona i ai se tino i totonu o le Malo, e faapena ona vaavaai ma auiliili ia aafiaga o le tatou siosiomaga. E le gata o le siosiomaga physical environment o tatou fanua ma tatou eleele e aofia ai ma tuaoi, ae faapea foi i aafiaga lava o le tagata soifua i mea e tutupu i a tatou atinae popolega lau Afioga i le Fofoga Fetalai ma le mamalu o le Maota, e pei e i ai se vaaiga o le PUMA o lana galuega, o se galuega e tetee atu i le atinae, e antidevelopment. Ou te faalatalata atu ma le faaaloalo i le Maota, a faapea o lea o lo o i ai se lagona faapena i le Maota e tusa ai ma lea itutino o le tatou Malo, ou te tautino ma faamalalamama atu, e le o le agaga lea. O le atinae ia o le natura lava o le tagata soifua, ae o aafiaga o atinae, ma o lea ua tatou maitauina, o le suiga o le tau lea ua tatou i ai. E mafua aisea? Mafua o atinae. O le lolovaia o tatou nuu ma nofoaga faitete. Aisea? E mafua mai o gaoioiga a tagata soifua.

O le faamoemoe la o itutino nei e pei o le PUMA ina ia faapea ona mafai ona auiliili ma faaitiitia mai ia aafiaga o le tatou siosiomaga ia tatou galuega ma tatou atinae e faatulai mai i lea taimi ma lea taimi. E ese le taua o lea itutino ma o lea ua laga mai e nisi o a outou afioga ona o le mau a lea, ina ia faafaigofie, to make easy. A o le mea moni a lau afioga i le fofoga fetalai ma le mamalu o le Palemene, e le faigofie le mea lea ua oo nei iai le soifuaga o le lalolagi lea tatou te iai. O le fesagai o le uiga tau atiae o le tagata soifua ma aafiaga o lo o tulai mai e afaina ai tagata uma, o mea ia e ao lava ona faia iai a tatou tonu ma tatou fuafuaga ina ia mafai ona gafataulimaina ia tatou atinae e faaaauu atu ai a tatou punaoa i tupulaga faimai. O le itu lena ou te faalatalata atu ai ma le faaaloalo i le maota i la outou silasila foi ma la outou vaai.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 & Tulafono Tau Faaofi o le Faatatauina o Tupe 2018/2019
– felafolafoaiga faaauau i luga o le faitauga faalua – Aso 3**

O tatou uma lava ia atonu foi o le uiga faapolokiki tatou te mananao e faafigofie, e iai a mea e mafai ona faafigofie ae i ai a mea e tatau ona lava le taimi tatou te auiliili ma tatou faasoa ma tatou fuafua lelei iai. Ia atonu lau Afioga i le Fofoga Fetalai na o le pau ia o nai mataupu sa saunoa i ai ia sui usufono mamalu e faasino i si a matou foi matagaluega. Ae pei e faaiu atu sa matou tautalaga i se matou upu faapea, o le a ea le tatou mea lea e fai. E mafai ona tatou faapea, o lea tatou te omai e fai tonu e atinae ma atiae le atunuu. A tatou vaai foi i le vaaiga taulai o lo o afifi ai le atiae o le Malo o Samoa e ala i ana galuega, fai mai e a le faaupuga o le vaaiga lea taulai, ina ia siitia le soifuuga o tagata Samoa. Ia faaleleia le soifuuga o tagata Samoa, o lona uiga o le autu a o le tatou galuega lea e fai o le manuia o tagata, manuia o tagata. O nisi o tatou e faalogologo i failauga aemaise a le au Maori, e iai le latou alagaupu lena e fai mai, o le a le mea e aupito taua, o le a le mea e aupito sili i le soifuuga o le tagata. Fai mai ia le failauga Maori, e tagata, e tagata, e tagata, e tagata. O le tagata, o le tagata, o le tagata. A ou toe mafaufau foi ma matamata i le TV e i ai ia le advertisement lea e sau i le TV pei se advertisement a le Samoa Tourism Authority, o le pisikoa la e alu i le taxi ae faiatu i le avetaavale pe fia le tau o le taxi e sau mai le falemai e alu i le maketi ae fai mai e \$30 ea. Fai ai loa le tala a le pisikoa i le avetaavale, ia ua toe oti a tatou ia tatou. O lea la lau Afioga i le Fofoga Fetalai, o tagata, o tatou tagata ua filifilia i le tatou galuega a o lea tatou te galulue foi mo o tatou tagata. E lelei o tatou tagata ia tatou ae leaga foi o tatou tagata ia tatou, ia manuia le afiafi talosia ia vave le tatou galuega i lenei afiafi, soifua ma ia manuia.

FOFOGA FETALAI: Malo faafetai, malo Malele, faafetai le saunoa ua logo a i tino matagi lelei ua faapena foi ona sausaufialele le manu nai utufiu pei o ia muagagana a le atunuu. Ia malo tapena, ia ma o le avanoa lenei e tapa ai lau Afioga i le Taitai o le Malo, lau Afioga i le Palemia.

SAUNOAGA A LE AFIGOGA I LE PALEMIA

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, ia o lena ua tali atu ia Minisita i mataupu sa laga i saunoaga a outou Afioga i sui usufono. E i ai le faamoemoe ua manino ia ma tali manino atu i nisi foi o mataupu sa laga. O lea matou te malamalama lelei i le tele o finagalo faaalua e agai lava i le tulaga o le faaleleia o tatou nuu ma le tatou atunuu. Ae o le tali atu a le Malo o le tau faasoasoa lea o seleni o lea o lo o mafai ona maua e faatino ai lo outou manao aua tatou te malamalama uma lava e leai a se finagalo e faaalua e le taua.

21 IUNI 2018

Saunoaga a le Afioga i le Palemia

E taua uma a outou finagalo mo le atinae o tatou nuu ma o tatou aiga ina ia ola fiafia, ola saogalemu ma ola fifilemu. Ia ola foi i le tulaga o le itu faaleagaga e saogalemu e tatou te tapuai ai saoloto i tapuaiga ua noatia ai tatou ona o le tele o le mau tapuaiga i totonu o tatou nuu e ui e tasi lava Le o lo o tatou tapuai i ai. O mea uma ia lea tatou te naunau e fai, o le faataua o ma ia ona e i ai le tapulaa o le tatou taimi e faatino ai mea ia e tatau ona faatino i totonu o le Paeaiga lenei e 5 tausaga. O le naunautaiga ina ia silasila mai o tatou itumalo o lea tatou galulue, galulue tali atu i lo latou manao. O le tele foi o tatou itumalo ua lafo mai lava lo latou faatuatuaga ia i tatou, o tatou lea e gafa ma faamatalaga uma lava o le faagaoiina o le Malo. E tatou te malamalama i tupe ia e faagaoioi ai le Malo ma le mutaaga e mafai ona tatou oo iai aemaise ia lipoti o lo o aveatu i le faagaoiina o le Malo. O tatou la lea ua faaaupegaina e tatou te malamalama uma a i le tulaga o mea mafai ma mea e le mafai ona faia, a o le ogatotonu o ia mea uma e le mafai ona tatou gaoioi pe a le lava tupe. E lua lava la ia aupega malolosi lea e faamoemoe atoa a i ai ia tatou faamoemoga, ia lava seleni ma le lona lua ia lava tagata e faatinoina galuega. Ia ona faaopoopo atu loa lea i ai ma le mataala o le Malo, o le tatou Kapeneta lea ma le aufaigaluega a le Malo e unai ia atinae nei. O atinae e fua mai ona manuia ai lea o le tatou atunuu, o lona uiga o tuaoi ia e mafai ai ona tatou gaoioi. O seleni e mafai ona faatino ai galuega ma le lava o tagata faigaluega latou te faatinoina galuega, a le mafai la ona lava mea ia ona tatou o loa lea e sue mai auala e faatino ai. O nonogatupe, o le tatalo i atunuu i fafo ia alolofa mai ae le gata i lea a o le tatou tilotilo ia tatou lava seleni e mafai ona laga i totonu o le lotoifale. Ia tatou manatua foi o seleni ia aumai i fafo e le aumai fua, e aumai ae tilotilo mai po o a tatou mea ia e fai. E faigofie ona fesoasoani mai ia atunuu i fafo pe afai e tilotilo mai o lea foi e taumafai tatou e fesoasoani tatou ia i tatou lava. That we are helping ourselves, tatou te le o ola faalagolago atu i atunuu i fafo, o seleni ia e aumai i atunuu i fafo o seleni e aumai i le afu o latou tagata totogi lafoga. O le ala lena e i ai isi nofoaiga ua leva ua alualu a le mafai ona toe aumaia ma taofi e Niu Sila latou seleni ona toe aumai. E fesili atu i ai le Malo, o le a le mea ua taofi ai? Ae fai mai, oi tou te mananao e avatu tupe o le afu o matou tagata totogi lafoga e faatau ai a outou sikaleti? O le ituaiga lena na aumai ona ua tilotilo mai Malo ia e leai se taumafaiga a tatou e laga ai i totonu o tatou tupe sao mai o tatou lava tagata e atiae le tatou Malo.

Lau Afioga i le Fofoga Fetalai, o mea ia lea tatou te galulue ai. Ina ua oo ina ua tulai mai faiga vaega ona faataoto loa lea, o se taimi muamua la ua amata ai ona faataoto fuafuaga mamao e tatou aveai i o tatou tagata mea ia o le a matou faia. A outou filifilia matou ona matou taumafai lea e fai, o tatou folafolaga na sa fai i o tatou itumalo ona to mai lea o le matupalapala ma aumai le latou faatuatuaga ia i tatou o tatou o tagata e fai mea mafai. O lea ua folafola atu o le a tatou faia lea mea ma fai lea mea e faatino ai le Paeaiga lenei e 5 tausaga. Ua ala ai ona ou faia le mea lea, ona pe i ai ni tagata e mafaufau ua televave tele le tatou alu a o tatou lea na tatou o e folafola i o tatou itumalo, o mea ia o le a matou faia.

21 IUNI 2018

Saunoaga a le Afioga i le Palemia

A le faia la mea ia ona tau ai lea o tatou e tagata o taitai faagutugutulia, o le ala lena e pei e foliga mai e palapala le upu polokiki. O le upu polokiki e faasinotonu lava lea o le signs o le tomai e faatupu ai avanoa e tele mo le lelei o tagata lautele ina ia soifua i se olaga fiafia ma filemu, saogalemu. O le uiga lena o le upu polokiki. O i tatou i vaavaai i so o se avanoa ina ia mafai ai ona maua e o tatou tagata ia galuega o aoga e faaaoga ai a latou fanau. O falemai e togafiti ai ma galuega e galulue ai ma maua ia tupe e tausai ai o latou aiga, ia lelei o latou fale ia mafai ona tapuai saoloto. Ia fiafia ia filemu ia saogalemu, afai e tulai mai ni vevesi e mafai ona faalagolago mai i leoleo e o atu e puipuia i latou.

Lau Afioga i le Fofoga Fetalai, o le polokiki lena ma o le uiga lena o le upu polokiki. A tatou omai la i totonu o le Maota leni i Fonotaga taitasi i tausaga e talanoa le Tala o le Tupe, o mea nei ia tatou manatua. E i ai ē e manatu ua tatou televavave ua tatou televavave tele ona galo ai lea i ina lea i ai le tatou folafolaga e tatau ona faatino pei ona faataoto atu i le anavatau. O le mea lea e taua ai le fuafua o tatou fuafuaga ma manatua a tatou folafolaga na fai i o tatou tagata, o mea ia o le a fai, ona vaai ai lea i ituaiga auala tau tupe eseese e faatino ai ia le galuega. A o nei mea uma e le aoga uma mea uma nei, pe afai e leai se nonofo filemu o tatou tagata o lo o i ai le vevesi i totonu o le tatou atunuu leni. E le stable le Malo, o mea ia na tutupu i le tausaga e 1982 e fai Faigamalo. O le taimi aupito sili lea ona vevesi ai le tatou atunuu, fa Faigamalo fesui ai i le tausaga e tasi faatoa tupu lea o se mea faapea, uma lelei le tausaga leai ma se galuega e faia. O le 1982, e leai ma se atinae e faia, aisea? Aua foi o lea e solomua ona matou vevesi e survive, mua ona matou vevesi i le pule ae galo ai le atunuu lale e faatali mai na tofia tatou, ae vevesi i le pule, o ai o le a pule, o ai o le a pule, o ai o le a pule? Ona faapea lea ona fevesiai faapenei, pule i, oo i le isi vaitaimi ua pule o, oo i le isi vaitaimi ua toe pule o, ae toe oo i le faaiuga o le tausaga ua toe soloai mai le pule i le HRPP, lea la o lo o faaauau ai lava mea ia. E omai le HRPP i totonu ua matua mala paga lava mea o i ai, ua matua tele le faaletonu. O le mea moni lava, ua bankrupt le economy. O mea la ia e ala ai ona pulunaunauina le mea lea o le stability of government ia i ai le saogalemu ma le filemu, aveese lea mea o le vevesi. O le tulaga i Malo o le mea lea ou te taofi e pei ua toatele tagata ua galo, o le Malo leni o le Malo o tatou uma, e le o se Malo na o le Vaega leni, e le o se Malo na o le Kapeneta, o le Malo o tatou uma lava e aofia ai Ekalesia e fia ma afioaga. O le mea la lena lea e ala ai ona taua tele le mea lea o le maua o le nonofo fealofani ma le maopoopoga o se atunuu. O le mea lena lea e ala ai ona taua ia i latou e fia omai e faatu ni a latou pisinisi i Samoa nei e maua ai galuega a o tatou tagata. Ma e leai lava se isi mea tatou te alo i ai, e tatau ona tatou mataalia ina ia faatu pisinisi eseese aua a tatou fanau ia e nonofo mai aoga, tausaga uma, tausaga uma, tausaga uma, e nonofo ai tatou fanau mai aoga ina ia maua ni galuega e faigaluega ai. Ma o le mea lena o lea e ala ai ona tele fuafuaga eseese o lo o fai nei, ina ia maua avanoa ia ina ia faagasolo ai pea galuega mo a tatou fanau. A le mafai ona maua galuega i ine, tatou o i fafo e saili ai ni galuega mo tatou tagata.

21 IUNI 2018

Saunoaga a le Afioga i le Palemia

O le mea lena e ala ai ona tatou o i Niu Sila, o i Ausetalia, talanoa i na Malo e aumai se avanoa e avatu ai o tatou tagata i o ua le maua ni galuega. E i ai foi la le afaina o na mea. Ae a faapefea le galueaiina o le laueleele? E toatele fanau ua o i fafo ae alu atu i uta e faaletonu tuamaota ona o le tele o isi ua o i fafo. A o le tulaga lena e le taofia ai a tatou fuafuaga fai i le faatupulaia pea o le tamaoaiga. I le taimi o le amatalia mai o le tatou Malo, na faatulaga ai atunuu o le lalolagi, o atunuu ua maualuga lo latou tamaoaiga ma atunuu ua feoloolo le latou tamaoaiga ma atunuu mativa elo lava. E \$100 agai i lalo tupe maua a tagata taitoatasi, e fua le mea lena i le tupe maua aofai atoa po o le GDP vaevae i le aofai o tagata o le atunuu ona maua ai lea o le fua. O le fua la sa masani ona faaoga e le Malo faatasi.... O atunuu uma lava e i lalo ifo o le \$100 Amerika a le tagata, o atunuu la na e tuu i lalo, the least and the poor the poorest of the poor. O atunuu aupito mativaelo na lea sa i ai Samoa i le faatulagaga lena.

Oo mai le 2014, ua le mafai ona toe tuu i lalo. Ia a tuu i lalo o lea ua oo tatou i le \$4,000 ma ona tupu tala Amerika, lea la sa ou taua ai le GDP o tupe ia e soloai mai totonu o le Malo mai auala eseese lea e gaoioi ai le tatou tamaoaiga i le tausaga lea la e i ai le Tala o le Tupe lea e faapea atu, e oo atu i le faaiuga o le tausaga lena ua tataua ona \$3.7miliona le mea e tupu ai le atinae. E tupu faapefea? E \$3.7miliona i luga o le \$2piliona \$200miliona lea e i ai e faapoopo i ai ona a lea? Ia ona sau lea ua i luga atu ma le \$2.2miliona. O le mea la lena e fua agai i ai le agai i luma o le atunuu mo le faatupulaia pea, ae fua la i a tatou gaoioiga ia e fai, o le galuega i i ma i ma i. Ia o faatasi e fua i i ma i ma i, ia galulue faatasi le aufaigaluega atoa a le Malo, pispisi ma tatou tagata i tua i nuu. E faapoopo faatasi a latou tupe maua, lea la e i ai le fua lea e fua ai nei le agai i luma. O lona uiga, ua maualuga nei tatou mai le tausaga 2014. O lea la ua la ua tau ai tatou o le middle income level county ua le o toe i le tulaga lea o se atunuu mativa.

Lau Afioga i le Fofoga Fetalai, ua ou manatu e oo i ai se upu i le itu lea ina ia malamalama lelei ai le tulaga lea tatou te i ai ma le mafuaaga e fai ai tatou galuega, lala e tapuai mai tatou nuu, o la e manatua lelei folafolaga sa fai, o mea ioa o le a outou faia, o mea e lelei i Apia, e lelei foi mo Savaii. O la e la e maitau lelei mai, e le valea o tatou tagata. O le matua popoto lava, e popoto foi e faitau mai tatou lauga ia e fai i totonu o le Maota lena. O le mea la lea, e le mafai ona galo ia te au le isi Fono, na tu ai le Taitai o le Itu Agai i lena taimi ua tuumalo nei, le Tofa ia Asiata. Faimai lea o Asiata, Tuilaepa, se faamolemole e a pe a tau taofiofi le televave o le tamaoaiga tau taofiofi ua fai si televave tele. Ou fai atu, ia lelei, ou liliu atu loa i le Kapeneta ou fai atu, le Kapeneta e, o lena ua outou faafofoga i le augani a le Itu Agai, fai mai e tau taofiofi le televave o atinae, a o lea la o le a ou fai atu ia te outou, a o i ai se isi malosi e toe faatope ai, topetope le tou alu e le faatalia tagata la e faatali mai tua, ma e iloagofie lava tagata na soifua ae i tua e naunau e fai mea ia, e le mafai ona faatalia e tagata la e i tua se i oo i le 10 tausaga o lumanai ona faatoa fai lea o latou auala. O le auala galue, o le fatu atoa lea o atinae o faatoaga.

21 IUNI 2018

Saunoaga a le Afioga i le Palemia

O le mea lea po o le a lava le mea tatou te vaai atu i ai, aua le taofia auala o tatou nuu i tua leaga a faatulaga loa atinae i tua, e leai lava se isi mea e tutusa ma le auala, o le auala le mea aupito sili ona taua i le atinae o nuu i tua ona faatoa sosoo atu loa lea ma isi atinae. A o le auala lava ia, o le atinae lea pito sili ona taua e mafai ai ona o tagata i uta ma atinae a latou faatoaga, po o le o matua nonofo ai lava i uta e le toe omai i tai. Ina ua sui nei a tatou fuafuaga ma ua mafai ona ulufale mai taavale tu i le taumatau le ave o le faatoa mafai lea ona tatala mai taavale a aiga mai Niu Sila. O le a la le mea lea ua tupu? O le tele foi o aiga ua maua nai a latou taavale ma o le tele foi o aiga ua o nonofo i uta ua faigofie ona fai i uta o latou fale na ona omai lava i tai toe o i uta nonofo ai, a o lea ua i ai auala ua faafaigofie ai mea uma nei. O a la tulaga o le vaai atu e le o i ai lava ni foliga o vaaia mai? E le o le mea lena e taua ia te au, o le mea taua, ua faigofie le soifuaga o tatou tagata e o ai i uta e lau mai taumafa i tai e taumamafa ai. E tusa lava pe leai ni mea e faatau i le maketi, a ua maua taumafa nei e taumamafa ai ma fai ai taumafataga ma ola fiafia ai.

Lau Afioga i le Fofoga Fetalai, o le tulaga mo le faamautuina o le filemu ma le saogalemua o tatou nuu, o i ina tonu lava e tataua ona oo se upu i le pulega mamalu a alii ma faipule. E le mafai ona maua le mea lena pe a faaletonu le pulega mamalu a alii ma faipule. Ma o le itu lena o lea e malosi ai le uunai a le tatou Matagaluga o lo o nafa ma le itu lena, aemaise lava fonotaga a sui o tatou itumalo i tua. O fonotaga na e faigofie ona maua ai mea e igoa o amio pulea i totonu o nuu, ma o tatou uma lava o matai tausi nuu. O le matou nuu ua ou matai ai, a alu alu lava le Fono ua maea ona aumai loa lea o taulelea faanonono mai tua ae ave i ai le upu faalaeiaua faamalosiua ma le aoa o mea e tataua ona fai e le aumaga. O aso nei o le matua tele lava o mea e sau mai fafo, o pia, o ava, o a uma ituaiga ava malolosi ma onana faavalevalea ai lava i le po. A o le pule mamalu a alii ma faipule e faia le mea lea o le samania mai o taulelea ma faanonono i lalo ma tau i ai le sala e ono oo ia te ia ma sa le mea lea, o i ina e maua ai le filemu i totonu o tatou nuu. O le mea lea ou te matua faanoanoa ai pe a ou faalogo atu ua tutupu mai mea ia pei o mea na tutupu mai Salelologa ma Luatuanuu ma Salelavalu, o le tulai mai o taulelea ia ma o fai ituaiga uiga ia pei e leai se pulega mamalu a alii ma faipule. O le mea lena i le matou feiloaiga, na ave sao lava le tuualalo i toeaiaina e tataua ona fai le tou galuga, aua le tuufaua a tatou fanau, aemaise o tatou fanau lea ua expose, lea ua faigofie ona latou maua mea leaga uma o le soifuaga e sau mai fafo, o mea o drugs, o fualaa faasaina, o ituaiga amioleaga e vaai atu ai i le TV. O le mea lea, a le malosi pulega mamalu a alii ma faipule, o le mea lea e oo i ai tatou, e faigata tele ona taofiofi le filemu ma le fealofani lea tatou te moomoo i ai. Ae toe lava o Samoa lea e malu ana tu ma ana aganuu. Vaai i taitai o le Pasefika, a omai i Samoa, o le latou tala lea, Se amuia oe Tuilaepa o lea e te i le atunuu, o oe o le taitai o le atunuu lea e malosi ma malu ai pea le pulega mamalu a alii ma faipule. Ua leai se mea faapea i Tonga. Ia ae fai mai foi le Fiti ia, ua leai foi ni mea faapea i Fiti, ae fai mai foi le Solomona ia, o matou ia ua matua leai lava ua pule a le tagata ia.

21 IUNI 2018

Saunoaga a le Afioga i le Palemia

O le taua lena o le malosi pea o le taitaiga a le Matagaluega o lo o nafa ma le pulega i totonu o nuu, aemaise foi o tatou nei o matai o nuu, tatou te ave pea le tuualalo ia faataua fono a pulenuu o i ina e taomi ai i lalo le amioleaga, le moemoenoa ma le laufaleaina. Lau Afioga i le Fofoga Fetalai, e pei o nai upu na e taua tele, ma o fonotaga foi na e faafogafoga mai pea i ai o tatou nuu e ono fesoasoani foi ia i latou. E i ai taimi e tupu ifo ai le augata. E i ai taimi i le matou foi nuu o Fasitoo toetiiti 15 tausaga e le i toe faia se fono tuufaatasi a le matou nuu atoa. Ona fai loa lea o le matou fono, o faaiuga o masina taitasi o le a fono ai Fasitoo. Ua ova nei ma le 10 tausaga o fai le mea lena. O faaiuga o masina taitasi o le a fono ai Fasitoo, ona omai uma lea o fuaiala e aumai a latou mataupu i totonu i i ma fofo atu ai i le pulega mamalu a alii ma faipule. Ma e oo mai nei, o le matua maoae o le pulega mamalu a alii ma faipule o Fasitoo. O ituaiga mea ia e taomi ai i lalo le amioleaga ma le amio le pulea o tatou fanau. O le feau malosi lena sa molimoli i afioaga sa tupu mai ai le faalavelave i Salelologa i Faasaleleaga i a matou tatalaga auala ia sa fai. O le mea foi lea sa tupu i le nuu lea o Luatuanuu, o alii lava ma faipule e fofoa le mea lea o amioleaga e tupu ae i taulelea, talu ai o le soifuaga ua tatou i ai ua malosi le osofai mai o uiga fou e ono afaina ai le matagofie o tatou tu ma agaifanua.

Lau Afioga i le Fofoga Fetalai, pei o i ina e faaiu atu ai lau upu. O tatou uma lava e i ai le tatou sao i mea faapea ona o tatou o sui usufono o itumalo e sao atu ai le tatou tuualalo i le tatou asiasi i tatou nuu ma ave le tuualalo i pulenuu aua le faavaivai, valaau fono a pulenuu ia faamalosia, o le isi lea vaivaiga tele lea e tupu mai e totogi atu alauni i pulenuu ae mumusu e valaau fono. E fealoalofai solo e valaau fono, a o le fono lea, o le fatu atoa lena e maua ai le filemu i totonu o nuu.

Lau Afioga i le Fofoga Fetalai, ia aumaia loa le fesili ia fai ai se tatou iuga tatou te see loa i le auiliiliina o le tatou Tala o le Tupe e pei ona sausaunoa i ai alii ma faipule o le Maota.

FOFOGA FETALAI: Malo faafetai ua maea le saunoaga a lau Afioga i le Palemia, ua faagasolo a tatou galuega e tusa ai o le lafo pei ona pasia, ua maea foi ona talifuaitau le Malo e tusa ai o mataupu sa laga e sui usufono i a latou saunoaga faalauaitale i tulaga tau tupe ma le tamaoaiga o Samoa ma faiga faavae tau tupe a le Malo. Ua maea ona faatu le lafo ma ua maea foi le faitauga faalua o le Tulafono Tau Faaofi i le aso 29 o Me 2018. A o lea o le a tuuina atu ai loa le Fesili.

Na tuuina atu le Fesili ma faamaonia ai le lafo na faatuina i le aso 29 Me 2018, ma faitauina faalua ai le Tulafono Tau Faaofi o le Faatatauina o Tupe 2018/2019.

21 IUNI 2018

**TULAFONO TAU FAAOFI O LE FAATATAUINA O TUPE
FAAOPOOPO (NU.2) 2017/2018 – iloiloga auiliili**

FOFOGA FETALAI: O le a sagai atu le Fono Aoao i le Iloiloga Auiliili o le Tulafono Tau Faaofi o le Faatatauina o Tupe Faaopoopo (Nu.2) 2017/2018.

I le faagasologa o le Iloiloga Auiliili o le Tulafono Tau Faaofi e mafai ona saunoa faatepa Sui Usufono i Mataupu o lo o tusia i le Pepa 2018/2019 Nu.1, Tala Faatatau Faaopoopo Lona Lua o Tupe Maua ma Tupe Totogi a le Malo o Samoa mo le Tausaga Faaiuna aso 30 Iuni 2018, atoa ai ma le Pepa 2018/2019 Nu.38, Lipoti a le Komiti o Tupe Maua ma Tupe Totogi a le Malo o Samoa mo le Tausaga Faaiuna aso 30 Iuni 2018.

E tusa ai ma Tulafono Tumau 134, e amata Iloiloga Auiliili o le Tulafono Tau Faaofi i ona Faamatalaga.

**FAAMATALAGA MUAMUA
VAEGATUPE MA TALA FAATATAU
FAAOPOOPOGA I TUPE FAATATAUINA**

MATAGALUEGA	FAAMATALAGA	AOFAI TUPE ALU
TUPE MAUA	Aofai Tupe Alu Faaopoopo	\$62,593.

Faamaonia.

AUAUNAGA SOIFUA MALOLOINA	- \$5,000,000.
----------------------------------	-----------------------

Faamaonia.

AOFAI FAAOOPOGA I TUPE ALU AOAO 2017/2018	\$5,062,593.
--	---------------------

Faamaonia.

**FAAMATALAGA LONA LUA
FAAITIITIGA I TUPE FAATATAUINA**

MATAGALUEGA	FAAMATALAGA	FAAITIITIGA I TUPE ALU
TUPE	Aofai Faaitiitiga Tupe Alu	-\$ (508,653).

Faamaonia.

21 IUNI 2018

**Tulafono Tau Faaofi o le Faatatauina o Tupe Faaopoopo (Nu.2)
2017/2018 – iloiloga auiliili**

TUPE MAUA Aofai Faaitiitiga Tupe Alu $-\$(62,593)$.

Faamaonia.

AOFAI FAAITHITIGA AOA O I TUPE ALU 2017/2018 $-\$(571,246)$.

Faamaonia.

FAAMATALAGA:

Faamaonia.

FUAIUPU 2: Faamatuu atu ma le Faatatauina o le \$5,062,593 mai le Faaputugatupe a le Matagaluega o Tupe.

Faamaonia.

FUAIUPU 3: Faaitiitiga o aofaiga na uluai faatatauina ma toe faasoasoa atu i isi galuega faatino ma galuega faatino laiti.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Faatatauina o Tupe Faaopoopo (Nu.2) 2017/2018.

Faamaonia.

21 IUNI 2018

**TULAFONO TAU FAAOFI O LE FAATATAUINA O TUPE
FAAOPOPO (NU.2) 2017/2018 - faitauga faatolu**

Afioga Hon SILI EPA TUIOTI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Tupe Faaopoopo (Nu.2) 2017/2018 i lona faitauga faatolu.*

Faaluaina e le Minisita mo Aoga, Taaloga ma Aganuu, Minisita mo Tina ma Tamaitai, Atinae o Nuu ma Afioga ma Agafesootai ma le Minisita mo Tupe Maua.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaio Faitulafono.

**TULAFONO TAU FAAOFI O LE FAATATAUINA O TUPE 2018/2019
- iloiloga auiliili**

FOFOGA FETALAI: O le a sagai atu loa le Fono Aoaio i le Iloiloga Auiliili o le Tulafono Tau Faaofi o le Faatatauina o Tupe 2018/2019 ,ma Tala Faatatau Autu o Tupe Maua ma Tupe Totogi a le Malo o Samoa mo le Tausaga Faaletupe Faaaluina aso 30 Iuni 2019 faapea le Lipoti a le Komiti o Tupe Maua ma Tupe Totogi i le Tala Faatatau Autu o Tupe Maua ma Tupe Totogi a le Malo o Samoa mo le Tausaga Faaletupe Faaiiuna aso 30 Iuni 2019.

A o le i alo atu i le Iloiloga Auiliili o le Tulafono Tau Faaofi, ou te fia faailoa atu Faasaoga o le Lomiga Samoa i le Tala Faatatau Autu o Tupe 2018/2019. O ia faasaoga e aofia ai itulau e 10, 94, 95, 96, 97, 176, 201 O lena ua tufatufaina atu i luga o a outou laulau.

E tusa ai ma le Tulafono Tumau 134, e amata le Iloiloga Auiliili o le Tulafono Tau Faaofi i lona Faamatalaga.

FAAMATALAGA

VAEGATUPE MA TALA FAATATAU

MATAGALUEGA

TUPE ALU FAATATAUINA

**FAATOAGA MA
FAIGAFIIVA**

Aofai Tupe Alu Faatatauina

\$17,1154,561.

Faamaonia.

21 IUNI 2018

Tulafono Tau Faaofi o le Faatatauina o Tupe 2018/2019
- iloiloga auiliili

PISINISI ALAMANUIA Aofai Tupe Alu Faatatauina \$18,371,462.
MA LEIPA

Faamaonia.

FESOOTAIGA & FAAMATALAGA TEKONOLOSI \$10,581,790.

Faamaonia.

AOGA, TAALOGA MA AGANUU \$103,678,563.

Faamaonia.

TUPE \$89,326,611.

Faamaonia.

MATAUPU TAU LE VA I FAFO MA FEFAATAUAIGA \$23,274,821.

Faamaonia.

SOIFUA MALOLOINA \$18,405,623.

Faamaonia.

FAAMASINOVA & PULEGA TAU FAAMASINOVA \$12,954,826.

Faamaonia.

PUNAOA FAALENATURA MA SIOSIOMAGA \$25,568,464.

Faamaonia.

21 IUNI 2018

Tulafono Tau Faaofi o le Faatatauina o Tupe 2018/2019
- iloiloga auilili

LEOLEO \$29,773,936.

Faamaonia.

PALEMIA \$7,868,122.

Faamaonia.

TUPE MAUA - \$13,229,346.

Faamaonia.

TINA MA TAMAITAI, ATINAE O NUU MA
AFIOAGA & AGAFESOOTAI \$11,448,451.

Faamaonia.

GALUEGA FELAUAIGA & ATINAE ESEESE \$44,506,804.

Faamaonia.

OFISA O LE LOIA SILI \$4,889,770.

Faamaonia.

PULE MA SUETUSI SILI \$3,768,659.

Faamaonia.

21 IUNI 2018

**Tulafono Tau Faaofi o le Faatatauina o Tupe 2018/2019
- iloiloga auiliili**

KOMESINA O FAIGA PALOTA	\$2,031,454.
<i>Faamaonia.</i>	
FONO AOA O FAITULAFONO	\$6,455,602.
<i>Faamaonia.</i>	
KOMESINA O SULUFAIGA	\$1,110,777.
<i>Faamaonia.</i>	
KOMISI A LE AUFAIGALUEGA O GALUEGA A LE MALO	\$4,839,368.
<i>Faamaonia</i>	
AUAUNAGA FAA-SOIFUA MALOLOINA	\$80,134,187.
<i>Faamaonia.</i>	
GALUEGA TAU ALAMANUIA MA ATINAE A LE MALO	\$2,664,235.
<i>Faamaonia.</i>	
OFISA O FUAINUMERA FAAMAUINA	\$4,682,939.
<i>Faamaonia.</i>	
KOMISI O LE TOEFUATAIGA O TULAFONO A SAMOA	\$1,351,522.
<i>Faamaonia.</i>	

21 IUNI 2018

**Tulafono Tau Faaofi o le Faatatauina o Tupe 2018/2019
- iloiloga auiliili**

AUAUNAGA TAU FALEPUIPUI MA LE TOEFUATAIGA \$9,581,377.

Faamaonia.

**AOFAI O TUPE ALU AOAQ FAATATAUINA A MATAGALUEGA
2018-2019 \$547,614.267.**

FOFOGA FETALAI: O lo o i ai le Teuteuga a le Komiti i le Aofai o Tupe Alu Aoaq Faatatauina a Matagaluega.

Se i tulai mai le Taitaifono o le Komiti o Tupe Maua ma Tupe Totogi.

Afioga ALIIMALEMANU ALOFA TUUAU: Lau Afioga i le Fofoga Fetalai ou te faatu le Teuteuga i le Aofai o Tupe Alu Aoaq Faatatauina a Matagaluega 2018/2019 mai le \$547,614,267 i le \$546,890,252.

Faamaonia le Teuteuga.

Faamaonia le Faamatalaga e pei ona Teuteuina.

**FUAIUPU 2: Faamatuu atu ma le Faatatauina o le \$547,614,267 mai le
Faaputugatupe a le Matagaluega o Tupe.**

FOFOGA FETALAI: O lo o o i ai le Teuteuga a le Komiti i le Fuaiupu 2 e pei ona faaalii i le Pepa Faaopoopo o Galuega.

Tulai mai le Afioga i le Taitaifono.

Afioga ALIIMALEMANU ALOFA TUUAU: Lau Afioga i le Fofoga Fetalai ou te faatu le Teuteuga i le Fuaiupu 2 e faapea;

“TEUTEUGA:

Ia aveese le fuainumera \$547,614,267 ma suia i le fuainumera \$546,890,252 ma faitauina ai le Fuaiupu 2 e faapea:

**Faamatuu atu ma le Faatatauina o le \$546,890,252 mai le
Faaputugatupe a le Matagaluega o Tupe.”**

Famaonia le Teuteuga.

21 IUNI 2018

**Tulafono Tau Faaofi o le Faatatauina o Tupe 2018/2019
- iloiloga auilili**

Faamaonia le Fuaiupu 2 e pei ona Teuteuina.

FUAIUPU 3: Faamatuu atu ma le Faatatauina o le \$398,410 mai le Teugatupe a le Tausi Mavaega.

Faamaonia.

FUAIUPU 4: Faamatuu atu ma le Faatatauina o le \$16,428,428.

FOFOGA FETALAI: O lo o i ai le Teuteuga a le Komiti i le Fuaiupu 4 e pei ona faaalia i le Pepa Faaopopo o Galuega.
Tulai mai le Afioga i le Taitaifono.

Afioga ALIIMALEMANU ALOFA TUUAU: Lau Afioga i le Fofoga Fetalai ou te faatu le Faasaoga i le Fuaiupu 4 e faapea:

“TEUTEUGA:

Ia aveese le fuainumera \$16,428,428 ma suia i le fuainumera \$16,406,708 mai le Faaputugatupe a le Matagaluega o o Tupe.”

Faamaonia le Teuteuga.

Faamaonia le Fuaiupu 4 e pei ona Teuteuina.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Faatatauina o Tupe 2018/2019.

Faamaonia.

Na faagasolo le Tulafono Tau Faaofi o le Faatatauina o Tupe 2018/2019 faatasi ma Teuteuga.

21 IUNI 2018

**TULAFONO TAU FAAOFI O LE FAATATAUINA O TUPE 2018/2019
- faitauga faatolu**

Afioga Hon SILI EPA TUIOTI: Lau Afioga i le Fofoga Fetalai faapea foi le mamalu o sui usufono o le Palemene e avea lenei avanoa e momoli atu ai le faamalo ma le faafetai i le galuega o lea ua tini le faamoemoe e le o se galuega faigofie ma ua faapoopo foi le taimi ina ia faapea ona vave pasia le tatou Tala o le Tupe ma faapena loa ona faagasolo le faaogaina. O lea ou te faatauina ai le lafo, *Ina ia faitauina nei le Tulafono Tau Faaofi o le Faatatauina o Tupe 2018/2019 i lona faitauga faatolu.*

Faaluaina e le Minisita mo Aoga, Taaloga ma Aganuu, Minisita mo Fesootaiga, Faamatalaga ma Fesootaiga Vavave Faaneionapo.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaio Faitulafono.

Na faaalua le agaga fiafia o le Palemene e ala i le patipati o latou aao ina ua pasia le Tulafono Tau Faaofi o le Faatatauina o Tupe 2018/2019.

TOLOPOINA

FOFOGA FETALAI: Ia, ua tatou toai taunuu i le siui o galuega o lenei aso e pei ona faatulai mai le lafo ina ia faaauau a tatou galuega ina ia faapena ona pasia ma vave tuuina atu avanoa i le paia o le Kapeneta aemaise foi o Faaululuga o Matagaluega e faatno ai le atiaeina o le atunuu aemaise foi o le talosaga mai a itumalo taitasi e ala mai o latou sui faipule ina ia atinae auala galue, o eletise, o paipa, o mea uma e ao oma faatino e pei ona faamoemoe i ai lenei Tala Faatatau Autu o le Tupe e pei ona tatou pasiaina nei. Malo faafetai, malo le onosai, malo foi le galulue.

E momoli atu foi le faafetai i lau Afioga i le Palemia, malo le onosai, lau Afioga i le Tamaitai Sui Palemia ma lo outou Aiga Minsita, malo galulue, e le faigofie foi lo outou faiva alofilima aua foi le faamalamalamaina o nisi o mea sa faapena ona laga e sui usufono mamalu. E momoli atu foi le faafetai i Taitaifono ma sui usufono uma o le Palemene aemaise o lea itu o le maota i Minisita Lagolago i o outou faiva alofilima. E i ai lava le manatu e leai a se atoatoa o tatou faiva e pei foi ona avatu i le malama ua sola ma le taeao ua **tuanai, faamagalose upu ua le tautamalii ma faapena ona le logomalie, o le** agaga lava ina ia tatou taunuu i le siui e pei ona i ai lenei taimi.

E momoli atu le faafetai, afai foi ua sala uta, ia tonu tai i la outou faatofalaiga, ae faalagolago mea uma i le Atua aua ana le seanoa le Atua na ia i tatou i lenei aso, e le taunuu ma tini lo tatou faamoemoe i le manuia ma lona filemu.

21 IUNI 2018

Tolopoina

E avea foi lenei avanoa e momoli atu ai le faamalo ma le faafetai i Faauluuluga o Matagaluega a le Malo aemaise o le Matagaluega a Leoleo ma i latou uma o lo o faapea ona tofusao i le galuega faifaatasi, malo faaftetai. Ae a le Failautusi o le Fono ma le aufaigaluega malo faafetai, e le o auaoa lo outou afu maligi ma lo outou taimi ua faapena ona faaluina ona o lo tatou saili manuia o la e faamoemoe mai Samoa ia i tatou. O le matou tala lea e faaiu ai le tatou po, ona o lea ua tatou taunuu i le siui o lenei aso, ae tatou te le i tolopo seia aulia le itula e 9:00 i le aso a taeao, o le a ou faaiuina le tatou Fonotaga i se tatalo.

Na tolopo Taulumaga a le Fono Aoao i le itula e 8:38 i le po seia aulia le itula e 9:00 i le taeao o le Aso Faraile, 22 Iuni 2018.